

GUNCEI **(The Acts of the Apostles)**

Lawk karouknae

¹ Theophilus, ka lungpataw e, Jisuh ni a thaw tawknae hoi a cangkhai e naw pueng a kamtawngnae koehoi a rawi e gunceinaw Kathoung Muitha lahoi kâpoelawknaw a poe hnukkhu, ² Lathueng lah tawm lah ao hnin totouh e akong pueng hah ka thut. ³ A due hnukkhu hoi ama teh kahring e lah ka o tie hah hote gunceinaw koe avai moikapap a kamnue pouh teh, hnin 40 touh thung ahnimouh koe a kamnue pouh. Cathut uknaeram kong hah a pâpho.

Kathoung Muitha patounnae

⁴ Hathnukkhu hoi cungtalah a kamkhueng aw h navah Jisuh ni, Jerusalem kho daw k hoi tâcaw t laipalah apa koe e lawkkam ring aw h. ⁵ Lawkkam poe e teh, Jawhan ni tui daw k Baptisma na poe aw h, hatei nâsittouh o hoehnahlan Kathoung Muitha daw k Baptisma na hmu aw h han telah atipouh. ⁶ Jisuh hoi cung- talah kamkhueng aw hnae koe vah gunceinaw ni, Bawipa a tu maw Isarel miphunnaw hah, uknaeram bout na poe han toung telah a pacei aw h. ⁷ Jisuh ni Pa e kâtawnnae hninthanaw hoi a tuengnaw hah nangmouh ni panue han ngai hoeh. ⁸ Hateiteh, nangmae lathueng vah Kathoung Muitha a tho toteh nangmouh teh

bahu hoi na kawi awh vaiteh Jerusalem hoi na kamtawng awh vaiteh Judah ram, Samaria ram, talai a pout ditouh kai kapanuekkhaikung lah na o a han atipouh.

Kalvan lah tawm lah a o

⁹ Hote lawk a dei hnukkhu hoi ahnimae a mithmu vah Bawipa teh kahlun tawm lah a o, tâmai ni a kayo teh ahnimouh ni hmawt awh hoeh toe.

¹⁰ Hottelah, gunceinaw ni Bawipa kalvan a luen e a khet awh lahun nah ahnimae a teng hnipangaw kâkhu e tami kahni touh a kangdue.

¹¹ Ahnimouh roi ni, Galilee taminaw kalvan lah na khet awh teh bangkongmaw sut na kangdue awh vaw. Nangmouh koehoi kalvan lah tawm e Jisuh hah kalvan lah a luen e na hmu awh e patetlah let bout a kum e na hmu awh han, atipouh.

Cungtalah a ratoum awh

¹² Hathnukkhu hoi ahnimouh teh Olive Mon hoi Jerusalem lah a ban awh. Hote mon teh Jerusalem hoi sabbath hnin hnin touh lamcei ahla. ¹³ Ahnimouh teh khotung a kâen awh teh a luennae imvan a luen awh. Ahnimanaw teh; Piter, Jawhan, Jem, Andru, Filip, Thomas, Bartholomew, Mathai, Alfe capa Jem, miphun kampangkhai Simon hoi Jem capa Judah tinaw doeh. ¹⁴ Ahnimouh ni, Jisuh e a manu Meri, napuinaw hoi a nawngghanaw hoi cungtalah lungkânging lahoi thouk a ratoum awh.

Matthias rawinae

¹⁵ Hatnavah tami 120 touh e hmaunawng-hanaw teh cungtalah a kamkhueng aw h navah, Piter ni a kangdue teh, ¹⁶ Hmaunawngghanaw Jisuh man hanelah lam kapâtuékung Judah Isakarot e kong hoi Kathoung Muitha ni Devit koe sut a dei e lawk Cakathoung daw k a thut e patetlah kuep laipalah aw m mahoe h. ¹⁷ Judah teh maimouh hoi cungtalah rawi e lah ao teh hete thaw daw k na kambawngkhai van. ¹⁸ Ahni teh kathounghoehe kutphu hoi lawhmuen buet touh a ran ei hawvah bungling lah a boteh a von a tangpo daw k a ruennaw hai koung a tâco. ¹⁹ Hete hah Jerusalem kaawm e naw pueng ni a panue aw h teh hote talai hah Akeldama telah a phung aw h. A deingainae teh thi talai tinae doeh. ²⁰ Sam cauk dawkvah aonae hmuen teh tami kingdi lah aw m naseh, im thung pihai aw m hanh naseh. Ahnie thaw a ya ni lawm naseh telah a kâthut.

²¹ Jawhan ni Baptisma a poenae koehoi, kamtawng teh, ²² Bawipa Jisuh maimouh hoi kamphei teh kahlun lah tawm e hnin totouh a hnukkâbangnaw hoi rei ceionae pueng daw k, maimouh koe kambawng e tami buet buet touh ni Bawipa thawnae kong a pâpho teh kaimouh hoi cungtalah kapanuekkhaikung lah ao han telah Piter ni a pâpho.

²³ Hatnavah Barsabbas telah a kaw aw h teh Justus telah a awitawm aw h e Joseph hoi Matthias a rawi aw h. ²⁴ Hahoi a ratoum aw h teh, Bawipa nang ni tami lungthin koung na panue. ²⁵ Taminaw pueng e lungthin ka panuek e Cathut, Judah teh ama onae hmuen koe cei hanelah

kacangkhaikung thaw, guncei thaw dawк hoi a kâtakhoe teh ahnie yueng lah bout ka tawк hane tami kahni touh thung dawкvah na rawi tangcounг e tami na patue haw telah a ratoum awн. ²⁶ Hahoi ahnimouh roi hanlah cungpam a rayu sak awн teh Matthias ni a hmu dawкvah ahni teh guncei hlaibun touh hoi mek touksin lah ao toe.

2

Pentikos hnin

¹ Pentikos hnin a pha toteh ahnimanaw teh hmuen buet touh koe king a kamkhueng awн. ² Hatnavah kahlî katangpounge pawlawк patetlah kalvan lahoi yah hmatara a tho teh ahnimouh onae im dawк muen akawi pouh. ³ Hahoi teh, hmai patetlah e lainaw kampek e a kamnue teh ahnimouh rip koe ao. ⁴ Hahoi teh ahnimouh abuemlah ni Kathoung Muitha hoi akawi awн teh, Muitha ni dei thainae kâ a poe e patetlah alouklouk e lawк lahoi a dei awн.

⁵ Hatnae tueng nah kalvan rahim e ram tangkuem hoi ka tho ni teh Cathut ka bari e Judah miphunnaw teh Jerusalem kho a roe awн. ⁶ Hote pawlawк a thai awн torei teh tami moi a kamkhueng awн teh gunceinaw ni a dei awн e lawк a thai awн navah a kângairu awн. ⁷ Ahnimanaw ni a kângairu awн teh atu hete taminaw pueng heh Galilee taminaw nahohmaw. ⁸ Hottelah pawiteh maimouh ni mama lawк lahoi lengkaleng thai e heh bangtelane. ⁹ Maimanaw teh Parthian ram, Medes hoi Elam ram, Mesopotamia ram, Judea ram,

Kappadosia, Pontus ram, Asia ram, ¹⁰ Frigia ram, Pamfilia ram, Izip ram hoi Lubim ram, Rom kho hoi ka tho e imyinnaw, Sairen hoi e naw nahoehmaw. ¹¹ Maimouh Judah koe kahmawng e Jentel thoseh, hahoi a tangawn teh Krete tuilum hoi Arabia ram hoi ka tho e lah ao awh. Hateiteh Cathut ni kângairu hnonaw a sak e a dei awh e hah amamae lawk lahoi lengkaleng a thai awh telah a kâpankhai awh. ¹² Taminaw pueng ni kângairu lungkâoun awh teh, hete hno bangtelamaw telah buet touh hoi buet touh a kâ pacei awh. ¹³ Tami tangawn ni teh a dudam awh teh, hetnaw heh misurtui a parui awh atipouh awh.

Piter ni kamthang lawk a pâpho

¹⁴ Hatnavah Piter ni guncei hlaibun touh hoi rei a kangdue teh kacaipounglah a dei e teh, Judah miphunaw hoi Jerusalem kho na kaawm e naw hete hnonaw na panue sak hanelah ka ngai. Ka lawk kahawicalah na thai pouh awh. ¹⁵ Atu e tueng heh amom Suimilam tako doeh. Hetnaw teh na pouk awh e patetlah parui awh hoeh. ¹⁶ Het hateh profet Joel ni a dei tangcoung e doeh toe. ¹⁷ A dei e lawk teh, Cathut ni a poe e lawk hah hmalah toreih teh tami pueng e a lathueng vah ka Muitha ka awi han. Hat toreih teh, nangmae na canu capanaw ni profet lawk lahoi a dei awh han. Nangmouh thung dawkvah thoundoun tanglanaw ni kamnuenae a hmu awh han. Matawngnaw ni mang a sak awh han. ¹⁸ Hote hninnaw dawkvah Ka sannu sanpanaw koe ka Muitha ka awi vaiteh profet lawk lahoi a dei awh han. ¹⁹ Kalvan lah

kângairu hnonaw hoi talai van hai thi, hmai hoi hmaikhu tie mitnoutnaw na patue han. ²⁰ Cathut e kalenpounge hninpui a pha hoehnahlan vah kanî a hmo vaiteh thapa thi patetlah kaawm han. ²¹ Hatnavah Cathut min ka kaw pueng ni rungngang lah ao han telah a ti.

²² Isarelnaw ka lawk thai awh haw na panue awh e patetlah Nazareth tami Jisuh ni kângairuhnonaw, kângairunaenaw, hoi mitnoutnaw a sak toe. Hete hno sak e naw lahoi Cathut ni Jisuh teh a kampangkhai toe. ²³ Cathut ni Jisuh teh nangmouh hanlah a hmoun tangcoung e hoi a panue tangcoung e patetlah, kâlawklaipa taminaw kut daw k hoi thingpalam daw k a pathout awh teh a thei awh. ²⁴ Hat nakunghai Cathut ni ahni teh due reithainae thung hoi a thaw sak teh a hlout sak. ²⁵ Devit ni hote Bawipa hoi kâkuen lah a dei e teh, kai teh a yungyoe kahring e Cathut doeh kahma lah pou ka hmu. Bangkongtetpawiteh, Bawipa teh kaie aranglah ao dawkvah kai teh takinae ka tawn hoeh. ²⁶ Hatdawkvah, ka lung a konawm teh ka lai hai a lunghawi. Hothloilah ka takthai ni hai ngaihawinae tawn laihoi a due han. ²⁷ Bangkongtetpawiteh Bawipa ni ka muitha hah phuen daw k na cettakhai mahoe. Bawipa e a Tami Kathoung teh pawk sak mahoe. ²⁸ Bawipa ni hringnae lam na panue sak teh na hmalah lunghawinae hoi na kaw sak han telah a dei.

²⁹ Hmaunawngghanaw mintoe Devit teh a due hoi pakawp lah ao teh tangkom hai sahnin ditouh ao rah. ³⁰ Ahni teh profet buet touh lah ao daw k a catounnaw thung daw k buet

touh teh amae bawitungkhung dawk tahung sak lah ao han telah Cathut ni a kam pouh e hah kancengcalah a panue. ³¹ Devit ni kanceng lah a panue dawkvah Khrih e boutthawnae kong hah hettelah a dei. Bawipa teh phuen dawcettakhai mahoe. A tak hai pawknae hoi kâhmo sak mahoe a ti. ³² Cathut ni hote Jisuh hah a thaw sak toe. Maimanaw hai kapanuekkung lah o awh. ³³ Hottelah Jisuh teh Cathut e aranglah tahungnae poe lah ao hnukkhu, lawkkam lah kaawm e Kathoung Muitha hah Pa koehoi poe lah ao. Nangmouh ni na thai teh na panue awh e patetlah hote Muitha hah na rabaw sin toe. ³⁴ Devit teh kalvannaw koe luen hoe rah, hatei, ahni ni hettelah a dei, Bawipa ni ka Bawipa koe, ³⁵ Na tarannaw na khok tOUNGNAE lah ka hruek hoehroukrak kaie aranglah tahung haw atipouh. ³⁶ Hatdawkvah, thingpalam dawc pathout awh e Jisuh hah Cathut ni Bawipa hoi, Khrih lah a khoe toe tie hah Isarelnaw pueng ni kancengcalah panuek awh naseh telah a ti.

Khrih lahoi coe e yon ngaithoumnae

³⁷ Taminaw ni hote lawk hah a thai awh navah, a lungpuen awh teh Piter hoi alouke gunceinaw hanlah hmaunawngghanaw bangtelamaw ti awh han tOUNG telah a pacei awh. ³⁸ Piter ni nangmae na yonnae ngaithoum lah ao nahanlah pankângai awh nateh Jisuh Khrih min dawc baptisma rip coe awh. Hattoteh Kathoung Muitha poehno na coe awh han. ³⁹ Bangkongtetpawiteh, hete lawkkamnae teh nangmouh hoi, nangmae na catounnaw hane

hoi, ahlanae koe kaawm e Cathut ni a kaw e naw pueng hane doeh a ti.

⁴⁰ Piter ni alouklouk e lawk lahoi a pâpho teh hete tamikathoutnaw thung hoi hlout nahanlah kârungngang aw haw telah ahnimanaw hah a hroecoe. ⁴¹ Hattoteh Piter e lawk ka dâw e naw ni baptisma a coe aw haw teh, hat hnin vah tami thong thum tabang a kâthap aw haw. ⁴² Ahnimouh teh gunceinaw e cangkhae, vaiyei kâraeanae, kâhuikonae hoi ratoumnae pou a tawn aw haw.

Hnopai cungtalah a hmawng aw haw

⁴³ Tami pueng ni a taki aw haw teh, gunceinaw teh kângairu hnonaw hoi mitnout hnonaw moi a sak aw haw. ⁴⁴ Ka yuem e pueng teh cungtalah a kamkhueng aw haw teh, a tawn aw haw e pueng hai reirei a hmawng aw haw. ⁴⁵ A tawn aw haw e hnopai pueng hai a yo aw haw teh, a pankinae patetlah a kârei aw haw. ⁴⁶ Ahnimouh teh hnintangkuem Bawkim vah a kamkhueng aw haw teh, im touh hnukkhu im touh vaiyei a raen aw haw teh, lungthoung lunghaw i nalaihoi rawca a canei aw haw. ⁴⁷ Cathut a pholen aw haw teh taminaw e hmalah minhmai kahawi a hmu aw haw. Hnintangkuem rungngang lah kaawm e taminaw hah Bawipa ni kawhmoun thung a thap sin.

3

Khokkhem e a dam sak

¹ Vai touh teh, tangmin lah suimilam kathum nah e ratoumnae tue nah Piter hoi Jawhan teh Bawkim lah a cei roi. ² A manu von thung hoi kamkhuen e buet touh a hrawm aw haw teh

a thokhai aw. Bawkim kacetnaw ni poe e a coe thai nahan kahawipoung e takhang koe ahni teh ouk ao sak aw. ³ Piter hoi Jawhan tinaw Bawkim koe lah a tho e a hmu nah na poe haw titeh a hei. ⁴ Hatnavah Piter hoi Jawhan ni ahni hah kheikhei a khet teh kaimouh na kenhaw! atipouh. ⁵ Ahni ni buetbuet touh ka hmu han telah a pouk teh a ngaihawi nalaihoi a khet. ⁶ Piter ni sui ngun ka tawn hoeh, ka tawn e hno na poe han, Nazareth tami Jisuh Khrih min lahoi thaw nateh cet atipouh. ⁷ Aranglae a kut daw k hoi a pathaw tahmaca vah khok roi hoi a khoksaluemnaw a thao. ⁸ A thaw teh lam a cei. Lamtu laihoi Cathut a pholen teh gunceinaw hoi bawkim thung a kâen. ⁹ Hottelah lamcei laihoi Cathut a pholen e hah taminaw ni a hmu navah, ¹⁰ hote tami teh Bawkim meihawi longkha koe kut ka dâw e tami doeh tie a panue aw dawkvah, ahni koe ka kamnuek e hnonaw daw puenghoi a kângairu aw.

Solomon rim koe a pâphonaë

¹¹ Hote tami ni Piter hoi Jawhan tinaw pou a kuet lahun nah, tami pueng a kângairu aw teh, Solomon e vaikhap koe lah a yawng aw teh a kamkhueng aw. ¹² Piter ni a hmu nah, Isarel taminaw bangkong hete hno daw na kângairu a vaw. Hete tami a cei thinae heh kaimouh ni kamamae bahu hoi kamamae hawinae lahoi ka poe thai e patetlah bangkongmaw kaimouh kheikhei na khet a vaw. ¹³ Abraham, Isak, Jakop, ahnimaë Cathut, maimaë mintoenaw e Cathut ni a Capa e a Bawilennaë a kamnue sak toe. Hote Bawipa teh nangmouh ni Pailat siangpahrang

e kut dawk na poe awh teh ahni ni hlout sak han pouknae a tawn eiteh nangmouh ni hote Bawipa hah na pahnawt awh. ¹⁴ Kathoung kalan e Bawipa hah na pahnawt awh teh namamouh hanelah tami ka thet e hah hlout sak hanelah na hei awh. ¹⁵ Hringnae na kapoethaikung Bawipa teh na thei awh toe. Hatei Cathut ni ahni hah duenae koehoi bout a thaw sak toe. Kaimouh teh hete konglamnaw kapanuekkhaikung lah ka o awh. ¹⁶ Hote ahni e min yuemnae lahoi hote ahni e min teh nangmouh ni na hmu awh e hete tami hah a tha ao sak toe. Hote Bawipa kecu dawk coe e yuemnae ni nangmae mithmu vah hete tami hah kuepcingnae a poe toe.

¹⁷ Hmaunawngghanaw nangmouh koehoi kamtawng teh khobawinaw panuek laipalah hottelah na sak awh tie hah kai ni ka panue. ¹⁸ Khrih teh a rucacat patang a khang han tie hah Cathut e profetnaw ni a dei tangcoung e patetlah a kuep sak toe. ¹⁹ Hatdawkvah na yonnae ngaithoum lah ao nahan pankângai awh nateh na lungkâthung awh. ²⁰ Het hateh Cathut koehoi lungpahawinae tueng a pha vaiteh, nangmouh hanlah rawi tangcoung e Khrih tie a patoun nahane doeh. ²¹ Cathut ni talai kamtawng hoi kathoung profetnaw koehoi a la dei awh e patetlah bangpueng a katha lah sak kathanae tueng a pha hoehroukrak kalvan vah Bawipa teh ao han. ²² Mosi ni hai nangmae BAWIPA hah nangmae hmaunawnggha thung dawkhoi kai hoi kâvan e profet buet touh hah nangmouh hanelah a tho sak han. Ahni ni a dei e naw pueng nangmouh ni na tarawi awh han. ²³ Hote profet

e lawk hah ka tarawi hoeh e pueng mipahun dawk hoi takhoe vaiteh raphoe lah ao han.

²⁴ Samuel koehoi kamtawng teh a hnukkhu lah ka tho e profetnaw pueng ni hai hete hninthakong hah a pathang aw. ²⁵ Nangmouh teh profetnaw e catoun lah na o aw. Cathut ni Abraham koe nange catoun dawk hoi talai van e mipahun pueng ni yawhawinae a coe aw han telah a pâpho. Nangmouh teh lawkkam e catoun lahai na o aw. ²⁶ Cathut ni nangmouh buet touh rip e hawihoe hnae a raphoe vaiteh nangmouh yawhawi na poe nahanlah amae Capa Jisuh hah a thaw sak hnukkhu nangmouh koe hmaloe a patoun telah taminaw koe Piter ni a dei.

4

Piter hoi Jawhan a man aw

¹ Piter hoi Jawhan tinaw ni tami moikapap koe lawk a dei aw navah, vaihmanaw, bawkim kaukung hoi sadusinaw teh ahnimouh koe a tho aw. ² gunceinaw ni duenae koehoi Jisuh boutthawnae kong hah tami pueng koe a dei aw dawkvah, ahnimouh teh a lungphuen aw. ³ Hatdawkvah, Piter hoi Jawhan a man aw teh, khohmo toung dawkvah, thongim thung rum touh a paung aw. ⁴ Hateiteh, Cathut lawkkatang ka thai ni teh ka yuem e tami tongpa dueng 5,000 touh a pha aw.

Kacuenaw hoi a kâhmonae

⁵ Atangtho vah khobawinaw, kacuenaw, cakathutkungnaw teh Jerusalem vah a kamkhueng aw. ⁶ Vaihma kacue Annas,

Kaiaphas, Jawhan, Alexander hoi vaihma kacuenaw pueng hai a kamkhueng aw. ⁷ Ahnimouh ni Piter hoi Jawhan teh tamimaya hmalah a kangdue sak aw. Teh api kâ lahoi maw, api min lahoi maw hete hno heh na sak aw. Vaw telah a pacei aw.

⁸ Hatnavah Piter teh Kathoung Muitha hoi akawi teh khobawinaw hoi kacuenaw, ⁹ sahnin vah kaimouh ni a tha kayoun e tami buet touh kabawp aw. E hah lawk na ceng aw. Dawkvah, ¹⁰ nangmouh abuemlahoi Isarelnaw abuemlah panue sak hanlah ka ngai e teh, thingpalam daw. Na pathout aw. Ei, duenae koehoi Cathut ni a thaw sak e Nazareth tami Jisuh Khrih min lahoi hete tami ni a dam teh nangmae hmalah a kangdue e doeh. ¹¹ Hote Bawipa teh im kasakkungnaw ni na pahnavt aw. E talung, patopatang poung e takinlung lah ao.

¹² Hote Bawipa min hloilah kalvan rahim tam-inaw koevah ka rungngang thai e rungngangnae min alouke aw. Mhoeh telah Piter ni a pâpho.

Jisuh min dei hoeh hanelah a cakâ aw

¹³ Lawkcengkungnaw ni Piter hoi Jawhan e taran ahawi roinae hah a hmu aw. Navah, a kângairu aw. Hatnavah, ahnimouh roi teh Jisuh hoi reirei kaawm e tie hah a panue aw. ¹⁴ Hahoi, ahnimouh koe damnae kahmawt e tami hai ahnimouh koe a kangdue e a hmu aw. Navah banghai oun hane tawn hoeh. ¹⁵ Hatnavah, ahnimouh ni gunceinaw sanhedrin lawkcengnae imthung hoi a tâco hanelah kâ a poe aw. Teh bangtelamaw ti aw. Han telah amamouh dueng

a kâpan awh. ¹⁶ Ahnimanaw heh bangtelamaw ti awh han. Bangkongtetpawiteh ahnimouh koehoi kângairuhno kamnuek e teh Jerusalem kho kaawm e tami pueng ni a panue awh toung dawkvah maimouh ni oun thai awh hoeh toe. ¹⁷ Hete kamthang teh tami pueng koe a kampai hoeh nahanlah Jisuh e min kâuep laihoi hmalah apipatet koehai bout a dei hoeh nahanlah pakhi awh sei ati awh.

¹⁸ Hathnukkhu gunceinaw hah a kaw awh teh, Jisuh min lahoi khoeroe pâpho awh hanh, cangkhai awh hanh telah a cakâ awh. ¹⁹ Piter hoi Jawhan ni, Cathut e lawk hlak nangmae lawk ka tarawi awh pawiteh, Cathut hmalah a kamcu hoi a kamcu hoeh e hah pouk awh haw. ²⁰ Kaimouh teh ka thai awh, ka hmu awh e hah pâpho laipalah kaawm thai awh hoeh ‘ atipouh awh.

²¹ Hote kamthang dawkvah tami pueng ni Cathut a pholen awh teh, gunceinaw hah bangtelah hoi ne runae poe han tie a lamthung a hmu awh hoeh dawkvah, ahnimouh ni gunceinaw hah bout a pakhi awh teh bout a tha awh. ²² Hete kângairuhno lahoi ahmaloe e patetlah ka dam e tami teh a kum 40 hlai a pha toe.

Taran hawi nahanelah ratoumnae

²³ Gunceinaw teh bout a tha awh navah amamae a huinaw koe bout a ban awh navah vaihma bawinaw hoi kacuenaw ni a dei pouh e hah a dei awh. ²⁴ Ahnimouh ni be a thai awh hnukkhu, Cathut koe lungkânging lahoi a ratoum awh e teh, Bawipa nang teh kalvan hoi talai rahak e hnopueng hoi tuipei thung e hnopueng hai na

sak, telah ati awh. ²⁵ Bawipa ni Kathoung Muitha lahoi kaimae mintoe lah kaawm ni teh na pa-toun e Devit koehoi bangkongmaw khoramnaw kâpo awh hoeh, taminaw hai bangkongmaw ayawmyin lae hnonaw sak hanelah a kâcai. awh. ²⁶ Talai e siangpahrangnaw pueng a kamkhueng awh teh, BAWIPA hoi Bawipa Jisuh hah tuk han telah ati awh.

²⁷ Herod hoi Pontius Pailat bawi teh Isarelnaw hoi Jentelnaw a hroecoe teh, Bawipa nang ni satu na awi tangcoung e, Capa Jisuh hah a taran awh teh hete kho daw k a kamkhueng awh toe. ²⁸ Na pouk tangcoung e lahoi ka tho hane kawinaw hah a kuep sak awh toe. ²⁹ Bawipa atuvah ahnimouh ni pakhinae daw k hoi taran kahawicalah lawk ka pâpho thai nahanlah lungtangnae na poe aw haw. ³⁰ Patawnae pueng a roum nahanlah Bawipa na kut dâw haw. Kathoung na San Jisuh min lahoi kângairu mitnoutnaw sak thai nahanlah na poe haw telah a ratoum aw h.

³¹ Hottelah be a ratoum aw h hnukkhu a kamkhuengnae hmuen a kahuet teh ahnimanaw pueng teh, Kathoung Muitha hoi akawi aw h dawkvah Cathut e lawk hah lungtang laihoi a pâpho aw h.

Hnopai rei hmawngnae

³² Kayuemnaw e kamkhuengnae teh lung suetalah ao dawkvah apipatet ni hai mae hnonaw heh, kama e hno doeh tet aw h laipalah, kaawm e hno pueng teh cungtalah hno hanlah a hmoun aw h. ³³ Gunceinaw ni Bawipa e boutthawnae kong hah kalenpounge bahu hoi a kampangkhai

awh dawkvah, kalenpounge lungmanae teh ahn-
 imae lathueng vah a pha. ³⁴ Ahnimouh thungvah
 ka roedeng e tami buet touh hai awm hoeh.
 Bangkongtetsapawiteh laikawk, im a tawn awh
 e pueng hah a yo awh teh, a hmu awh e
 tangkanaw pueng a sin awh teh, ³⁵ Gunceinaw
 e khok koevah a tâ awh teh lengkaleng a panki
 e patetlah a rei awh.

³⁶ Lungpahawinae capa tinae lah kaawm e,
 gunceinaw ni Barnabas telah a kaw awh e,
 Saipras tuilum tami, Levih catoun, Joseph teh,
³⁷ a tawn e laikawk a yo e phu, tangka hah a
 sin teh gunceinaw e khok koe a ta.

5

Kathoung Muitha dumnae

¹ Hatei Ananias tie tami hoi a yu Sapphira ni
 a tawn roi e hnopai a yo roi. ² A yu hoi lung
 a kânging roi teh apfu tangawn e a la roi, a
 tangawn dueng hah gunceinaw e khok koevah
 a thokhai roi. ³ Hatnavah, Piter ni Ananias
 bangkongmaw nang ni Setan hah na lungthin
 dawc uk hanlah hmuen na poe teh Kathoung
 Muitha hah na dумыen teh talai phu a tangawn
 na kapek. ⁴ Na talai teh na yo hoeh na hai
 nama e nahoehmaw, na yo hnukkhu hoi hai
 apfu teh nama e kâ lah awmhoeh na maw.
 Bangkongmaw hottelah sak hane lungthin thung
 na kâcai, tami koe laithout laipalah Cathut koe
 na laithoe atipouh.

⁵ Hote lawk Ananias ni a thai nah a rawp teh
 a due, hote kong ka thai pueng ni puenghoi a

taki awh. ⁶ Hahoi nawsainaw a kâen awh teh a ro hah hni hoi a kayo hnukkhu a kâkayawt awh teh a pakawp awh.

⁷ Suimilam kathum touh ao hnukkhu a yu ni bang hno maw ka tâcawt tie panuek laipalah a kâen. ⁸ Hatnavah Piter ni ahni koe nangmouh roi ni talai nâ yit touh maw na yo ka tang tie a pacei nah, ahni ni oe het yit touh doeh ka yo telah a ti. ⁹ Piter ni hai nangmouh roi ni bangkong lungkânging laihoi Cathut e Muitha hah na tanouk roi. Kenhaw! na vâ ro kapakawmnaw teh takhang koe a pha toe. Ahnimanaw ni nang hai na hrawm awh han atipouh.

¹⁰ Hatnavah vai touh lahoi Piter e khok koe a rawp teh a due. Nawsainaw a kâen teh a ro a hrawm awh teh a vâ teng a pakawp awh.

¹¹ Kawhmoun abuemlahoi hote lawk kathainaw pueng ni puenghoi a taki awh teh a pâyaw awh.

Gunceinaw ni sak e kângairu hnonaw

¹² Gunceinaw ni taminaw e hmalah mitnout-naw hoi kângairunae a sak awh. Ahnimouh abuemlah Solomon e vaikhap dawк lungkânging lahoi ouk kamkhueng awh. ¹³ Alouke taminaw ni ahnimouh teh a ouphlawp a eiteh ahnimouh koe bawк hanelah ngam awh hoeh. ¹⁴ Cathut ka yuem e napui, tongpanaw teh ahnimouh koe a kâthap awh. ¹⁵ Taminaw ni ka dam hoe e taminaw a hrawm awh teh ikhun, phaileinaw khuehoi lam dawк a ta awh. Piter a tho torei teh, ahnie a tâhlip hah tami kapatawnaw e atak dawк a pha hanelah a kâyawm awh. ¹⁶ Jerusalem teng-pam e khopuinaw koehoi tami moikapap naw ni ka dam hoeh e naw hoi kakhine muithanaw ni a

man e naw hah a hrawi aw h, ahnimanaw pueng ni damnae a hmu aw h.

Thongim bonae hoi bout hloutnae

¹⁷ Hatnavah vaihma kacue hoi ahnimouh koe kaawm e Sadusinaw pueng a thaw aw h teh puenghoi a lungkhuek aw h. ¹⁸ Gunceinaw hah a man aw h teh thongim a pabo aw h. ¹⁹ Hateiteh tangmin vah Bawipa e kalvantami ni thongim takhangnaw a paawng pouh teh gunceinaw hah a tâco sak hnukkhu, ²⁰ cet aw h nateh bawkim thungvah kangdout nateh hete hringnae lawknaw pueng heh taminaw koe dei aw h telah atipouh. ²¹ Gunceinaw ni hote lawk a thai aw h teh, amom vah bawkim thung a kâen aw h teh taminaw a cangkhai aw h. Hatnavah vaihma kacue hoi ahnimouh koe kaawm e naw teh a tho aw h. Sanhedrin lawkcengkungnaw hoi Isarel kacuenaw pueng a kamkhueng sak aw h teh gunceinaw hah kaw hanlah thongim karingkungnaw hah thongim a patoun aw h. ²² Hahoi thongim a pha aw h navah ahnimouh karingkungnaw ni gunceinaw teh hmawt aw h hoeh, bout a ban aw h teh sanhedrin lawkcengkungnaw koe, ²³ thongim takhang hai kahawicalah a kâkhan teh karingkungnaw hai thongim hmalah a kangdue e kaimouh ni ka hmu aw h. Hatei ka paawng aw h navah, a thungvah tami buet touh hai awmhoeh telah a dei pouh aw h. ²⁴ Bawkim kaukkung hoi vaihma bawinaw ni hote lawk a thai teh bang hno maw ka tâcawt telah kângairu hoi ao aw h. ²⁵ Hatnavah tami buet touh a tho teh nangmouh ni thongim na pabo aw h e naw ni bawkim thung a kangdue

teh taminaw hah a cangkhai aw h telah a dei pouh. ²⁶ Hatnavah im karingkung ransabawi hoi karingkungnaw ni a cei aw h teh, gunceinaw hah a hrawi aw h. Taminaw ni talung hoi dei aw h langvai h tie a taki aw h dawkvah thama lah hrawi aw h hoeh. ²⁷ Hahoi gunceinaw teh a hrawi aw h teh Sanhedrin hmalah a kangdue sak teh vaihma kacue ni, hote Jisuh e min lahoi cangkhai hoeh nahan nangmanaw teh kâ na poe aw h nahoe h maw.

Gunceinaw lawk a khei aw h

²⁸ Hatei nangmouh ni Jerusalem khopui daw k na cangkhae a kâkahei teh ahnie thi teh kaimae lathueng vah a pha hanelah na noe aw h bo ma telah a pacei aw h. ²⁹ Hahoi Piter hoi guncei alouknaw ni taminaw e lawk ngâi hlak Cathut lawk ngâi hanlah ao atipouh. ³⁰ Nangmouh ni thingpalam daw k na pathout aw h teh na thei aw h e Jisuh teh maimae mintoenaw e Cathut ni a thaw sak toe. ³¹ Cathut ni Isarel mipunnaw yon pankângainae hoi yonthanae poe hanelah Bawi Jisuh teh Bawi hoi Rungngangkung hanlah amae aranglah a tawm teh a tahung sak toe. ³² Kaimouh teh hote kongnaw kapanuekkhaikung lah ka o aw h. Cathut ni amae lawk kangâinaw koe poe lah kaawm e Kathoung Muitha hai kapanuekkhaikung lah ao telah bout a dei pouh aw h.

Gamaliel ni pouknae a poe

³³ Ahnimanaw ni hote lawk a thai navah a lungkhuek aw h teh gunceinaw thei hanelah a kâcai aw h. ³⁴ Hatei sanhedrin daw k

kâpa e Farasi tami Gamaliel, teh kâlawk kancanghaikung ahni teh tami pueng ni bari e lah a o. Sanhedrin koehoi kacanghaikung buet touh a kangdue teh gunceinaw hah dongdengca alawilah tâco sak hanlah kâ a poe. ³⁵ Isarel miphunnaw ahnimae a lathueng vah bangpatet e hno maw ka sak han tie kâhruetcueth awh. ³⁶ Bangkongtetpawiteh, vai touh teh Theudas tie tami a tâco. Amahoima tami ka lentoe lah a kâdei teh a hnuk vah tami cumpali touh a kâbang. Hatei ahni teh tami alouknaw ni a thei awh teh ama kayuemnaw pueng a kâkapek teh a kahma awh. ³⁷ Hathnukkhu vah milu parei navah Galilee tami Judah a tâco teh amae hnukkâbang hanelah Judahnaw hah a coun. Ahni ni hai a due takhai teh ahnie a hnukkâbang e naw hai alouklah koug a kampek awh. ³⁸ Hatdawkvah nangmouh teh ahnimanaw kâbet awh hanh. Tami koe lahoi e pawiteh karawk hane doeh. ³⁹ Hatei Cathut koe lahoi e lah awm pawiteh nangmouh ni na raphoe thai mahoeh. Cathut na ka taran e lah doeh na awm ati. Hattoteh ahnie lawk hah ahnimouh ni a lungkuep awh. ⁴⁰ Hote lawk a thai awh hnukkhu vah gunceinaw hah a kaw awh teh, a hem awh hnukkhu a tu hoi teh Jisuh min lahoi cangkhae sak awh hanh lawih telah kâ a poe awh teh a cei sak awh. ⁴¹ Gunceinaw ni Jisuh min lahoi kang hane a kamcu tie a pouk awh dawc sanhedrin lawkcengnae koehoi lunghawicalah hoi a tâco awh. ⁴² Bawkim dawc hai thoseh, im dawc hai thoseh, hnintangkuem a cangkhai awh teh Jisuh teh Khrih doeh telah

pout laipalah a pâpho awh.

6

Tami sari touh a rawinae

¹ Hatnae tueng dawkvah a hnukkâbangnaw moi apap awh toe. A hnintangkuem a paca awh navah, Grik lawk kapan e Hellenist lahmai napuinaw ni kaimouh teh na paca awh hoeh telah Hebru lawk kapannaw phuenangnae a tawn awh. ² Hatnavah gunceinaw hlaikahni touh ni a hnukkâbangnaw pueng a kaw awh teh maimouh teh Cathut e a lawk paktoung awh vaiteh canei koelae thaw tawk hane kaw na-hoeh. ³ Hatdawkvah hmaunawngghanaw muitha hoi, lungangnae hoi, kaawm e tami sari touh nangmouh thung tawng awh. Hete thaw tawk sak hanelah ahnimouh hah kaimouh ni ka rawi awh han. ⁴ Maimouh teh ratoumnae hoi lawk pâphonae thaw maha pou tawk awh sei telah a dei awh.

⁵ Hote lawk teh kamkhueng e tami pueng ni a hnâbo awh teh, yuemnae lahoi thoseh, Kathoung Muitha hoi thoseh, kakawi e Stiven, Filip, Prokhoras, Nikhanaw, Timon, Parmenas, hoi Judah phung lah ka kâen e Antiok tami Nikolas tinaw a rawi awh. ⁶ Ahnimouh teh gunceinaw hmalah a kangdue sak awh teh gunceinaw ni ratoum laihoi ahnimae lathueng kut a toung sin awh.

⁷ Hettelah hoiyah Cathut e lawk a kampung teh Jerusalem kho thung a hnukkâbangnaw hoehoe apap. Vaihmanaw pueng ni hai yuemnae lawk a thai awh.

Stiven mannae

⁸ Stiven teh lungmanae a bahu hoi akawi teh puenghoi kângairunae mitnoutnaw hah taminaw hmalah a sak. ⁹ Hah navah sanhlout tie sinakok daw k kamkhuengnaw koehoi kamtawng teh Sairen, Alexandria, Silisia ram, Asia ram hoi ka tho e taminaw ni Stiven teh a oun aw. ¹⁰ Hatei muitha lungangnae hoi Stiven ni a dei e hah ahnimanaw ni oun thai aw hoeh.

¹¹ Hatnavah rangpuinaw hah arulah a uen aw teh hete tami ni Mosi hoi Cathut e lawk ka tapuet lah a dei aw e hah ka thai ati aw.

¹² Rangpui, kacuenaw hoi cakathutkungnaw ni ahni hah a man aw teh sanhedrin lawkcengnae hmuen koe a hrawi aw. ¹³ Laithoe e kapanuekkhaikungnaw a kaw aw teh ahnimouh ni, ahni teh kathoung e hmuen hoi kâlawnaw a tapuet telah kâhat laipalah a dei aw. ¹⁴ Hote Nazareth tami Jisuh ni hete hmuen a raphoe vaiteh kaimouh koe Mosi ni na poe e kâlawnaw kâthung sak han ati aw e kaimouh ni ka thai aw toe telah a dei aw. ¹⁵ Sanhedrin lawkcengnae koe ka tahungnaw ni Stiven hah kheikhei a khet aw teh ahnie minhmai teh kalvantami e minhmai patetlah ao e hah a hmu aw.

7*Stiven ni a pâpho*

¹ Vaihma kacue ni Stiven koe, ahnimouh ni a dei aw e heh atang maw, telah a pacei.

² Stiven ni, hmaunawngnaw hoi apanaw thai aw haw. Maimae na pa Abraham teh Haran kho a cei hoehnahlan, Mesopotamia ram ao nah

ka lentoe e Cathut ni a kamnue pouh teh, ³ na ram hoi na imthungkhu cettakhai nateh kai ni na patue e ram dawk cet haw, atipouh.

⁴ Hatdawkvah ahni ni Khaldean ram a ceitakhai teh Haran khovah ao. A na pa a due hnukkhu hoi Cathut ni atu maimouh onae ram dawk a kampuen sak. ⁵ Hatei, hote ram dawk e râw pang hanlah bang tica hai poe hoeh. Abraham ni a ca a cun hoehnahlan Cathut ni ahni hoi catounnaw hanlah hote ram teh râw lah poe hane lawk a kam toe. ⁶ Cathut ni ahnie catounnaw teh ayânaw e ram dawkvah imyin lah ao awh han tie hoi hote ram dawk a kum cumpali touh thung san lah ao a vaiteh rektapnae a khang awh han telah a ti. ⁷ Cathut ni ahnimouh san lah ka hno e naw lawk ka ceng han ati. Hahoi ahnimanaw ni hote ram dawk hoi a tâco awh vaiteh hete a hmuen koehoi kai na bawk awh han, telah a ti. ⁸ Cathut ni vuensomanae hoi kâkuen e lawkkamnae hah Abraham koe a poe teh, a ca Isak a sak hoi hnin taroe navah vuensomanae a sak pouh. Isak ni a capa Jakop a sak teh mintoe hlaikahni touh e na pa lah ao.

Izip ram ka phat e mintoenaw

⁹ Mintoenaw ni Joseph hah a ut awh dawkvah Izip ram lah a yo awh. Hateiteh Cathut ni Joseph teh a okhai. ¹⁰ Ahnie a rucatnae koehoi a hlout sak. Lungangnae hah a poe teh Izip siangpahrang ni Izip ram hoi Faro siangpahrang e a imthungnaw a uk sak.

¹¹ Hahoi, Izip ram hoi Kanaan ram pueng dawak takang a tho teh rucatnae puenghoi a

kâhmo awh dawkvah maimae mintoenaw teh a ca hane tawn awh hoeh. ¹² Hatei Jakop ni Izip ram vah rawca ao e a thai navah maimae mintoenaw apasuek lah a patoun. ¹³ Apâhni lah a cei awh navah Joseph ni a hmaunaw koe amahoima a kâpâpho teh Joseph miphunnaw hah Faro siangpahrang ni a panue. ¹⁴ Hahoi, Joseph ni tami a patoun teh a na pa Jakop hoi a miphunnaw tami 75 touh e hah koung a kaw. ¹⁵ Hottelah Jakop ni Izip ram lah a cei teh, ahni hoi maimae mintoenaw teh hote ram dawkvah a due awh toe. ¹⁶ Ahnimae ronaw teh Shekhem kho lah a kâkayawt awh teh hote kho dawk hoi Abraham ni Hamor canaw koe tangka hoi a ran e phuen dawkvah a pakawp awh.

Kahloutkhaikung Mosi a pahnawt awh

¹⁷ Cathut ni Abraham koe lawkkam e atueng akuiep e patetlah Izip ram kaawm e taminaw puenghoi a kamphung, ¹⁸ A hnukkhu teh Joseph ka panuek hoeh e Siangpahrang alouke ni Izip ram a uk. ¹⁹ Hote siangpahrang ni maimae miphun a dum teh, camonaw hah tâkhawng vaiteh hring sak hoeh hanelah a ngai dawkvah maimae mintoenaw a rektap awh. ²⁰ Hote tueng navah, Mosi a khe. Ahni teh Cathut hmalah a mei kahawipoung e camo lah ao teh, a na pa e im dawk thapa yung thum touh thung khetyawt e lah ao. ²¹ Im dawk hoi a tâcokhai hnukkhu Faro canu ni a ca lah a kaw. ²² Mosi teh Izipnaw e thouthainae pueng hah a cang teh, lawk dei koe lahai, tawksak koe lahai a thakaawme lah ao.

²³ Mosi teh kum 40 touh a pha navah a miphun Isarelnaw khetyawt hane lungpouk a tawn. ²⁴ Tami buet touh teh Izip tami tongpa ni a rektap lahun navah a hmu teh amae miphun kampangkhai teh Izip tami hah a thei. ²⁵ Mosi ni a kut hoi amae hmaunawnghanaw hlout nahanlah Cathut ni kâ na poenae kong hah ahnimouh ni a panue han doeh toe telah a pouk ei ahnimouh ni panuek thai aw h hoe h. ²⁶ A tangtho vah, Mosi ni Isarel miphunnaw amamouh hoi mamouh lawkpungnae a sak aw h e hah a hmu navah, bangkongmaw hettelah na o aw h, atipouh hnukkhu a rahak daw k kâponae a sak. ²⁷ Hateiteh ka yon e ni Mosi a tanawt teh, apinimaw nang hah kaie lathueng vah lawkcengkung lah na ta vaw. ²⁸ Nang teh paduem e Izip tami na thei e patetlah kai hai thei hanelah na noe maw atipouh. ²⁹ Hote lawk hah Mosi ni a thai toteh Midian ram lah a yawng teh, hawvah imyin lahoi capa kahni touh a sak. ³⁰ A kum 40 touh a kuep hnukkhu Sinai mon daw k e thingyei yon dawkvah, kalvantami teh Mosi koe buruk daw k hmai ka kang e lahoi a kamnue. ³¹ Mosi ni a hmu e hah a kângairu dawkvah kahnai lahoi khet hanelah buruk koe lah a cei navah Bawipa e lawk a thai teh, ³² Kai teh na mintoenaw e Cathut, Abraham, Isak, hoi Jakop e Cathut lah ka o ati. Mosi teh a taki lawi vah a pâyaw teh khen pateng khen ngam hoe h. ³³ Bawipa ni Mosi hanlah, na khokkhawm hah rading, bangkongtetpawiteh, na kangduenae hmuen teh kathoung e hmuen doeh. ³⁴ Izip ram thung kaie taminaw ni a khang e hah ka hmu. A

hramki awh e ka thai teh ahnimanaw rungngang hanelah ka kum toe. Atu cet leih! Nang teh Izip ram lah na patoun han atipouh.

³⁵ Mosi heh Isarelnaw ni a pahnawt e doeh. Maimae lathueng vah apinimaw lawkceng han e, hoi na ka uk hanlah a ta, ati awh. Hateiteh, ahni teh buruk thung kamnuek e kalvantami ni ukkung hoi kahloutkhaikung lah a patoun. ³⁶ A taminaw hah Izip ram hoi a tâcokhai teh, Izip ram, tuipui paling, hoi thingyei yon dawkvah kum 40 touh thung kângairunae hoi, mitnoutnae hnonaw a sak.

Isarelnaw ni Cathut lawk ngâi awh hoeh

³⁷ Hote Mosi teh Isarelnaw koe, Cathut ni nangmae hmaunawngghanaw thung dawk kai hoi kâvan e profet buet touh nangmouh hanlah ka tâco sak han, telah dei e hah doeh. ³⁸ Ahni teh Sinai mon vah, ahni koe lawk ka dei e kalvantami hoi, maimae mintoenaw cungtalah kahrawngum vah kaawm e taminaw koe ao teh maimouh na poe hane kahring e lawk maimouh koe ka phatsakkung lah ao. ³⁹ Hatei, maimae mintoenaw ni a lawk ngâi awh hoeh, ahni hah a hnoun awh teh ahnimae a lungthung vah Izip ram dueng a doun awh. ⁴⁰ Hatdawkvah Aron koe maimouh Izip ram hoi na katâcawtkhaikung hote Mosi teh bangtelamaw ao tie maimouh ni panue hoeh toung dawkvah maimouh hmalah kahrawikung hane cathutnaw hah kaimouh han lah sak awh leih telah a hei awh. ⁴¹ Hottelah hoiyah ahnimouh ni hatnae atueng dawk maitoca meikaphawk a sak awh teh, hote meikaphawk koe thueng hanelah

a sin awh teh, amamae kut hoi sak e dawk a konawm awh. ⁴² Hatnavah Cathut ni ahnimouh a hnamthun takhai teh ahnimouh han kalvan âsi, thapanaw a bawk sak. Profetnaw e cauk dawkvah, Isarelnaw nangmouh ni kahrawngum vah kum 40 touh thung thueng hanelah saringnaw hoi thueng e naw teh kai koe ouk na sin a maw. ⁴³ Nangmouh ni Molek e rim hoi namamae âsi cathut Rephan hah na sin awh. Hotnaw teh nangmouh ni bawk han kawi lah na sak awh e meikaphawknaw doeh. Hatdawkvah kai ni nangmouh teh Babilon ram hloilah ditouh na hrek awh han telah a thut.

Cathut e lukkareiim katang

⁴⁴ Mosi ni a hmu e hoi kâvan lah lawkpanue-saknae sak hanelah, kâ ka poe e ni a lawk poe e patetlah hote lukkareiim teh kahrawngum maimae mintoenaw koe ao. ⁴⁵ Maimae mintoenaw ni hote rim hah a pang awh teh maimae mintoenaw e hmalah Cathut ni pâlei e Jentelnaw e ram a la awh toteh Joshua hoi hote rim hah a sin awh teh Devit se totouh ao. ⁴⁶ Devit ni Cathut e a lungmanae a coe teh Jakop e Cathut ao, nahane hmuen sak hanlah a ratoum, ⁴⁷ Hateiteh, Cathut hanelah im kasakkung teh Solomon doeh. ⁴⁸ Hatei, Lathueng Pong ni tami kut hoi sak e bawkim dawk awm hoeh. ⁴⁹ Hete kong dawkvah Bawipa ni, kalvan teh kaie bawitungkhung doeh, talai teh khok ka tOUNGNAE doeh. Nangmouh ni bangpatet e im maw kai han na sak awh han. Bang patet e hmuen dawk maw kai ni ka o han. ⁵⁰ Hete hno pueng teh kama e kut sak

nahoehmaw. , telah Cathut ni ati e profetnaw ni a dei e patetlah khoup ao.

Kathoung Muitha tarannae

⁵¹ Na lung a len teh, hnâ hoi lungthin dawkvah vuensoma lah kaawm hoeh e nangmanaw haiyah na mintoenaw patetlah Kathoung Muitha na taran awh. ⁵² Nangmae na mintoenaw ni a rektap boihoeh e profetnaw ao maw, ahnimouh teh kathoung bawi a tho han tie sut ka dei e naw a thei awh. Atuvah nangmouh teh hote Tami Kalan hah ka pahnawtkungnaw hoi kathetkungnaw lah na o awh. ⁵³ Nangmouh teh kalvantaminaw koehoi poe e Cathut e phung lawk hah na hmu awh ei, sak han na ngai awh hoeh atipouh.

Cathut hanelah hringnae hmaloe ka pasoung e

⁵⁴ Ahnimouh teh hete konglam a thai awh navah a lungthung hoi Stiven koe puenghoi a lungkhuek awh teh hâ a katâ awh. ⁵⁵ Hatnavah Stiven teh Kathoung Muitha hoi akawi teh kalvan lah a moung navah Cathut e bawilennae hoi Jisuh teh Cathut e aranglah a kangdue e hah a hmu. ⁵⁶ Khen haw kalvannaw a kamawng teh tami Capa ni Cathut e aranglah a kangdue e ka hmu telah a dei.

⁵⁷ Hatnavah ahnimouh teh puenghoi hram lai-hoi a hnâ a tabuem awh teh Stiven koe a yawng awh. ⁵⁸ Ahni hah kho alawilah a sawn awh teh talung hoi a dei awh. Kapanuekkhaikungnaw ni hai amamae angkinaw Sawl tie thoundoun e a khok koe a ta awh. ⁵⁹ Stiven ni, Bawipa Jisuh ka muitha hah dâw leih, telah talung hoi a dei

awh lahun nah Cathut koe a ratoum. ⁶⁰ Hahoi Stiven ni a khokcuengkhuem teh Bawipa hete yonnae teh ahnimaie lathueng bawt sak hanh telah puenghoi a hram teh a due. Sawl ni hai Stiven a thei aw h e hah a lungkuep van.

8

Pacekpahlekkung Pawl

¹ Hat hnin roeroe vah Jerusalem e kawhmoun thungvah rektapnae a tâco. Gunceinaw hoeh e pueng teh Judah ram hoi Samaria ram lah koun g a kampek aw h. ² Cathut bawknae koe lah kacaknaw ni Stiven e a ro teh kahawicalah a kuem aw h teh puenghoi a khuikakhai aw h. ³ Sawl ni im buet touh hnukkhu buet touh a luen teh, ka yuem e napui tongpanaw hah a man teh thongim a paung teh kawhmoun hah a raphoe.

Samaria ram ka phat e Filip

⁴ Voivang lah kâkapek e naw ni lawkkatang teh yuengyoe a pâpho aw h. ⁵ Filip hai Samaria ram e kho buet touh daw k a cei teh Khrih e kong hah a pâpho van. ⁶ Tami pueng ni Filip ni a sak e kângairuhnonaw hah a hmu aw h navah ahnie a pâpho e naw hah rip a thai aw h. ⁷ Bangkongtetpawitech tami moikapap koe kaawm e kakhine muithanaw teh hramki laihoi a tâco aw h. Kamkhuen e hoi khokkhemnaw hai moikapap a dam aw h. ⁸ Hatdawkvah, hote kho thungvah lunghawinae kalenpoung a tawn aw h.

Camkathoum e Simon

⁹ Hote kho daw k Simon tie tami buet touh ao. Ahni teh camthoum e lahoi yah. Samaria taminaw koe kângairu ka sak thai e tami doeh telah a

mahoima ouk a kâdei. ¹⁰ Camo matawng pueng ni hete tami teh ka lentoe Cathut e bahu doeh ati aw. ¹¹ Ahnimouh ni bangkongmaw a yuem aw, tetpawiteh cam thoum e lahoi kumtha moi kasawlah ahnimouh koe kângairunae a sak daw. ¹² Hatei, Filip ni Cathut uknaeram hoi Jisuh Khrih e min hah a pâpho navah taminaw ni a yuem aw teh, tongpanaw dueng laipalah napuinaw hai tui baptisma a coe aw. ¹³ Simon ama hai a yuem dawkvah tui baptisma a coe teh Filip koe a kâbang. Mitnoutnae hoi kângairuhnonaw hah a hmu aw teh kângairu laihoi hmawn a ngam aw.

Simon e yonnae

¹⁴ Samaria taminaw ni Cathut a yuem aw toe tie hah Jerusalem khopui kaawm e gunceinaw ni a thai aw navah, Piter hoi Jawhan teh ahnimouh koe a patoun aw. ¹⁵ Ahnimouh roi a pha toteh, Kathoung Muitha ahnimouh ni a coe thai aw nahanlah a ratoum pouh roi. ¹⁶ Bangkongtetpawiteh, ahnimouh teh Jisuh min lahoi tui baptisma dueng heh a coe aw rah dawkvah, ahnimouh thung daw. ¹⁷ Hahoi, Piter hoi Jawhan ni ahnimouh van kut a toung hnukkhu ahnimouh teh Kathoung Muitha a coe aw.

¹⁸ Gunceinaw ni kut toung sin e lahoi taminaw ni Kathoung Muitha a coe aw e heh, Simon ni a hmu navah, gunceinaw koe tangka a sin teh, ¹⁹ kai ni kut ka toung sin e tami pueng ni Kathoung Muitha a coe aw nahanelah, het

patetlah e hnosakthainae hah kai hai na poe haw atipouh. ²⁰ Hatnavah Piter ni nang ni Cathut e lungmanae hah tangka hoi ran thai telah na pouk dawkvah nama hoi na tangka teh mek kamko naseh. ²¹ Na lungthin teh Cathut hmalah a lan hoeh dawkvah hete thaw dawk nang teh na tawk thai hoeh, nange na ham hai awm hoeh. ²² Hatdawkvah, na pouknae kahawihoehe hah pankângai nateh Bawipa koe ratoum haw. Hot-telah na tetpawiteh na pouknae kahawihoehe naw Bawipa ni doum na ngaithoum yawkaw han doeh. ²³ Bangkongtetpawiteh nang teh utnae hoi na kawitah yon thongkabawt e lah na o e hah ka hmu telah atipouh. ²⁴ Simon ni, nangmouh ni na dei e buet touh boehai kai koe a pha hoeh nahanlah Bawipa koe na ratoum pouh awh telah bout a dei pouh.

²⁵ Piter hoi Jawhan teh Bawipa e lawkkatang a kampung laihoi a pâpho roi hnukkhu, Samaria ram thung e khonaw koe kamthang kahawi a pâpho roi teh Jerusalem lah bout a ban roi.

Ethiopia kalaw bawi kâthungnae

²⁶ Hahoi Cathut e kalvantami ni Filip koe thaw nateh Jerusalem hoi Gaza kho lah cathuknae lam dawak akalah cet loe atipouh. Hote lamthung teh thingyeiyawn lamthung lah ao. ²⁷ Hatdawkvah, Filip ni a thaw teh a cei. Hatnavah Ethiopia siangpahrangnu Kandeis e bawi lah kaawm ni teh siangpahrangnu e kâtaawnae kalen lah kaawm e Ethiopia tami buet touh teh, ²⁸ Jerusalem vah bawaknae a sak hnukkhu a ban navah amae rangleng van hoi profet Isaiah e

Cakathoung hah a touk. ²⁹ Hatnavah Kathoung Muitha ni Filip koevah hote rangleng koe cet nateh hnai haw atipouh. ³⁰ Filip ni hai rek a yawng sin. Ahni teh profet Isaiah ni a thut e heh vawtvawt a la touk. Filip ni, na touk e hah na thai panuek maw atipouh. ³¹ Hote bawi ni na ka dei pouh e awmhoeh pawiteh bangtelamaw ka thaipanuek han ati teh Filip heh ama koe reirei tahung hanelah a coun. ³² Ahni ni a touk e teh, ahni teh thei hanlah sut hmoun e tu patetlah a hrawi awh. Tuca ni muen ngaw navah a hram hoeh e patetlah hram laipalah ao. ³³ A dudam awh navah, ahni kampangkhai api awm hoeh. A hringnae teh talai van hoi takhoe lah ao dawkvah a catoun hah apinimaw bout a dei thai han va tie doeh. ³⁴ Hahoi bawi ni Filip hanelah na pacei haw nei, profet ni api e kong maw hettelah a dei aw. Ama e kong ma aw. Hoeh teh alouke buet buet touh e kong ma aw atipouh. ³⁵ Hatteh Filip ni hote kongnaw hno lahoi Jisuh e kamthang hah a dei pouh.

³⁶ Ahnimouh teh pou a cei awh navah tui koe a pha awh teh bawi ni tui baptisma ka hmu hoeh nahanelah bang ni maw kai na rakhan telah a ti. ³⁷ Filip ni, na lungthin abuemlahoi na yuem pawiteh tui baptisma na hmu han, telah atipouh. Jisuh Khrih teh Cathut capa doeh tie hah ka yuem telah a ti. ³⁸ Hahoi, bawi ni rangleng kâhat hanelah kâ a poe hnukkhu, tui daw k a cei roi teh, Filip ni tui baptisma a poe. ³⁹ Tui thung hoi bout a tâco roi toteh, Bawipa e Kathoung Muitha ni Filip teh oun a tawm teh, hote bawi ni

hmawt hoeh toe. Hateiteh, lunghawi laihoi amae lamthung dawk pou a cei. ⁴⁰ Filip teh Azotus kho a tâco teh, Kaisarea ram totouh kho tangkuem Cathut e kamthang kahawi a pâpho.

9

Sawl kâthungnae

¹ Sawl ni Bawipa a hnukkâbangnaw hah a pakhi teh thei hanlah ngainae a tawn, ahni ni vaihma kacue koe a cei teh, ² Damaskas kho e sinakoknaw koe poe hanelah panue nahane ca a hei. Bangkongtetpawiteh, Bawipa lamthung ka dawn e naw tongpa hoi napui thoseh, a hmu e pueng katek vaiteh Jerusalem lah hrawi thai na hanelah doeh. ³ Hottelah ahni ni a cei teh Damaskas khopui teng a pha navah, kalvan lahoi angnae ni pheng a tue. ⁴ Talai dawk a rawp teh, Sawl, Sawl bangkong kai na rektap telah ahni koe dei e lawk a thai. ⁵ Bawipa nang apimaw, telah a pacei navah Bawipa ni kai teh nang ni na rektap e Jisuh doeh. ⁶ Thaw nateh kho thung kâen lah, na sak hane thaw na dei pouh han, telah atipouh.

⁷ Ahni hoi kahlawng rei kacetnaw ni lawk teh a thai aw h ei apihai a hmu aw h hoeh dawkvah muen a ka ngai aw h teh lawkkamuem lahoi hawvah a kangdue aw h. ⁸ Sawl teh hluet a thaw ei banghai a hmu thai hoeh dawkvah, taminaw ni a kut daw k hoi a hrawi teh, Damaskas khopui lah a ceikhai aw h. ⁹ Ahni teh hnin thum touh thung a mit a dawn teh rawca cat laipalah ao.

Sawl Baptisma coenae

¹⁰ Damaskas kho dawk Ananias tie a hnukkâbang buet touh ao. Kamnueaenae lahoi, Bawipa ni, Ananias telah a kaw. Ahni ni, kai hivah ka o, Bawipa, telah atipouh. ¹¹ Bawipa ni ahni koe, thaw nateh, lam kalan tie koevah cet nateh Judah im vah Tarshish tami, Sawl tie hah tawng haw. Bangkongtetsapawiteh, ahni teh a ratoum lahun. ¹² A kamnueaenae dawk a mit kho bout a hmu thai nahanlah Ananias tie a kâen vaiteh a van vah kut a toung e a hmu, telah a ti. ¹³ Ananias ni, Bawipa, ahni ni Jerusalem kho e na tami kathoungnaw koe hno kahawihoehe moi a sak tie tami moikapap ni a dei e ka thai. ¹⁴ Vaihma bawinaw koehoi kâtaawnnae hoi hivah a tho. Na min kakawnaw pueng man thainae kâ a tawn, telah atipouh. ¹⁵ Hateiteh, Bawipa ni cet haw ahni teh Jentelnaw, siangpahrangnaw hoi Isarelnaw hmalah ka min ka sin hanelah ka rawi toe. ¹⁶ Ahni teh ka min kecu dawc rucataenae a khang hane naw ka panue sak han, telah a ti.

¹⁷ Hahoi, Ananias ni a cei teh, imthungkhu vah a kâen. Sawl van vah a kut a toung teh, ka nawnggha, Sawl na tho nah lam vah nang koe ka kamnuek e Bawipa Jisuh ni na mit bout ang sak teh, Kathoung Muitha hoi na kawi thai nahan kai na patoun, telah atipouh. ¹⁸ Hatnavah, vai touh lahoi a mit dawc hoi tanga lakep patetlah a kâkhawc teh, kho bout a hmu thai. Ahni ni a thaw teh Baptisma a coe. ¹⁹ Hahoi, rawca a ca hnukkhu a tha bout a sai. Sawl teh Damaskas khovah a hnukkâbangnaw koevah dongdengca ao.

Jisuh kong Sawl ni a pâpho

²⁰ Sawl ni Khrih teh Cathut e ca doeh telah sinakoknaw dawk tang a pâpho. ²¹ Hote lawk ka thai e naw abuemlah ni kângairu awh teh, hete tami teh Jerusalem kho e Bawipa min kakawnaw raphoe hanlah ka kâyawm e tami nahoehmaw, Ahnimanaw katek vaiteh vaihma bawinaw koevah hrawi hanelah hivah ka tho e nahoehmaw telah ati awh. ²² Hatei, Sawl teh a tha hoe ao. Jisuh teh Khrih doeh ati teh kampangkhai dawkvah Damaskas kho kaawm e Judahnaw hah a kângairu sak.

²³ A hnin moi ao toteh, Judahnaw ni Sawl hah thei hanlah kho a khang awh. ²⁴ Hatei, Sawl ni a khokhang awh e a panue. Sawl thei hanelah kho a khang awh dawkvah tangmin tangtho longkha hah a ring awh.

Sawl Jerusalem bout a phanae

²⁵ Hatnavah, a hnukkâbangnaw ni Sawl hah a hrawi awh teh, tangmin vah tapawm dawk hoi kho kalupnae rapan hloilah a pabo awh.

²⁶ Sawl ni Jerusalem a pha navah, a hnukkâbangnaw koe huiko hanlah a panki eiteh a yuem awh hoeh dawkvah a taki awh.

²⁷ Hatei Barnabas koevah bangtelamaw, Bawipa a hmu teh, Bawipa ni Sawl koe bangtelamaw lawk a dei tie naw hoi Damaskas kho dawk Jisuh min taranhawi lahoi a pâpho e kongnaw kacaicalah a dei pouh. ²⁸ Sawl teh Jerusalem vah gunceinaw hoi rei a ceio navah, Bawipa min lahoi taranhawi laihoi a pâpho awh. ²⁹ Sawl teh Grik lawk ka dei e Judahnaw hoi a kâoun awh teh ahnimouh ni Sawl teh thei hanlah a kâcai awh. ³⁰ Hote kong hah a hmaunawngnanaw ni a

thai awh navah, Kaisarea kho lah a ceikhai awh teh, Tarshish kho lah a patoun awh.

³¹ Hatnavah Judah kho, Galilee kho, Samaria kho kaawm e kawhmoun pueng ni teh karoum-calalah ao awh. Ahnimanaw ni Bawipa takinae dawkh thoseh, Kathoung Muitha e thapoenae dawkh hai thoseh, a hring awh teh tami hoe a pung awh.

Aeneas damnae

³² Piter ni hnintangkuem kahlawng a cei teh Lidda khovah a pha. Hote kho dawkh kaawm e tami kathoungnaw koe a pai. ³³ Hote kho dawkvah Aeneas tie tami teh kum taroe touh thung a kamkhuen teh ikhun dawkh sut ayan e hah a hmu. ³⁴ Hatnavah Piter ni Aeneas koe Jisuh ni nang teh na dam sak toe, thaw nateh na iphah kalawng leih, atipouh navah ahni teh hluet tang a thaw. ³⁵ Lidda kho hoi Sharon kho e kaawm e naw ni ahni a hmu awh navah Cathut koe lah a lungkâthung awh.

Dawka bout hringnae

³⁶ Joppa kho kaawm e Dawka tie Tabitha teh a hnukkâbang e napui buet touh lah ao. Ahni teh hnokahawi pou ka sak ni teh poenae lahoi thaw ka tawkh e lah ao. ³⁷ Hatnae hnin navah ahni teh a pataw dawkh a due. Taminaw ni a ro teh tui a pâhluk awh hnukkhu imvan e irakhan dawkh a ta awh. ³⁸ Joppa kho pui teh Lidda khopui hoi a hnai dawkvah Lidda khothung vah Piter ao tie a hnukkâbangnaw ni a thai toteh ahni koe tami kahni touh a patoun awh. Kaimanaw koevah karang tho ei telah ati pouh.

³⁹ Hatdawkvah, Piter ni hluet a thaw teh ahnimouh hoi imvan e rakhan thung cungtalah a kâen. Piter a pha toteh lahmainunaw ni Piter e a teng a kangdue awh teh a kâ awh. Ahnimanaw ni Dawka a hring nah a khui e khohnanaw a pâtue awh. ⁴⁰ Piter ni ahnimanaw alawilah a tâco sak hnukkhu, a khokcuengkhuem teh a ratoum. Hahoi a ro koe lah a kamlang teh Tabitha thaw leih atipouh navah ahni teh a mit a padai teh Piter hah a hmu toteh a thaw teh a tahung. ⁴¹ Hahoi Piter ni Dawka hah a kut dawk hoi a pathaw teh a kangdue sak. Tami kathoungnaw hoi lahmainunaw a kaw teh bout a hring toe telah ahnimouh koe a patue. ⁴² Hote kamthang teh Joppa kho thung pueng dawk a kamthang teh tami moikapap ni Bawipa a yuem awh. ⁴³ Hot hnukkhu hoi Piter teh Joppa kho dawk phaivuen ka sak e Simon im vah hnin ka saw lah ao.

10

Piter hoi Konilias

¹ Kaisarea kho dawk Itali ransahu tie ransa cum touh kaukkung Konilias teh ao. ² Ahni teh bawknae koe lah kâyawm poun e lah ao, a imthung ni Cathut ka bari e lah ao awh teh, Judah tami dawk e karoedengnaw a kabawp teh Cathut koe pou a ratoum, ³ Hnin touh teh tangmin lah suimilam kathum tapat navah vision kacaicalah a hmu. Hote vision a hmu e dawk, Cathut e kalvantami buet touh a kâen teh Konilias telah a pato. ⁴ Kalvantami hah lungpuen lahoi khei a khet teh bangne Bawipa telah ati.

Kalvantami ni yah Cathut ni na ratoumnae hoi karoedengnaw na kabawp e poehnonaw teh pâkuem hane kawi lah Cathut hmalah a pha toe. ⁵ Hatdawkvah atu Joppa khovah tami patoun nateh a min Piter tie Simon hah kaw sak loe. ⁶ Ahni teh tuipui teng kaawm e phaivuen ka sak e Simon im a luen telah ati. ⁷ Hottelah ka dei e kalvantami a cei hnukkhu Konilias ni, ⁸ a vaica kahni touh hoi Cathut lawk daw k kaawm e ransa buet touh a kaw teh Joppa kho lah a patoun.

Piter ni vision a hmu

⁹ Atangtho teh Joppa kho a pha tawmlei suim- ilam kahni kalekkalak nah Piter teh ratoum han- lah lempu van a luen. ¹⁰ A vonhlam teh ayânaw ni coungkacoe lah rawca a lawng lahun nah, Piter ni kamnuenae a hmu. ¹¹ Kalvan kamawang teh hni hoi ka kâvan e a takin pali touh e talai daw k ama koe ka bawt e hah a hmu. ¹² Hote tangoung thungvah tava phunkuep, kâroe e phunkuep, saring phunkuep ao. Hathnukkhu Piter thaw nateh, thet nateh cat haw tie lawk a thai navah, ¹³ Piter ni coung thai hoeh Bawipa, ¹⁴ kathounghoehe hno, kakhin e hnonaw kai ni vai touh hai ka cat boihoeh atipouh.

¹⁵ Hathnukkhu apâhni lawk bout ka tho e teh Cathut ni a thoung tie hno hah thoung hoeh telah dei hanh atipouh.

¹⁶ Hettelah avaithumnae a kamnue hnukkhu, Cathut ma ni hote hno teh kalvan lah bout a tawm.

Konilias im Piter a pha

¹⁷ Piter ni a hmu e vision hah bang ngainae vaimoe titeh kângairu lahun nah, Konilias ni a patoun e naw ni Simon im pacei laihoi a tawng awh teh longkha koehoi, ¹⁸ Piter telah kaw e Simon hah hete im dawk a luen maw telah a pacei awh.

¹⁹ Piter ni vision kong a pouk lahun nah Muitha ni tami kathum touh ni nang na tawng awh. Thaw nateh kum haw ahnimouh teh, ²⁰ kai ni ka patoun e doeh. Lung kâounnae awm laipalah kâbang lawih atipouh. ²¹ Hatdawkvah Piter ni a kum teh na tawng awh e teh kai doeh. Bang panki laihoi maw na tho awh, atipouh. ²² Ahnimouh ni hettelah atipouh, ransabawi Kornilias ni na patoun awh e doeh. Ahni teh Cathut ka taket e hoi tami kahawi lah ao teh Judah taminaw ni a baripoung e doeh. Ahni ni na lawk a thai panuek nahan Cathut e kalvantami buet touh ni nang hah coun loe atipouh.

²³ Piter ni taminaw teh imthungkhu kâen awh atipouh teh hote tangmin teh hawvah a roe awh. A tangtho a kârasoup awh teh ahnimouh koe a cei. Joppa kho e hmaunawnggha a tangawn hai a cei van. ²⁴ Tawkkahnin Kaisarea a pha awh teh hawvah Kornilias hoi avaica a huikonaw a coun e naw ni a ring awh. ²⁵ Piter a kâen tahma Konilias ni a dawn teh a hmalah a tabo. ²⁶ Piter ni kangdout atipouh, kai hai tami van doeh atipouh.

²⁷ Piter ni Konilias pato laihoi imthungkhu a kâen nah, tami moikapap a kamkhueng e hah a hmu. ²⁸ Ahnimouh koe, Judahnaw teh Jentelnaw hoi kamyawng phung nahoeh, ahnimouh koe

kahlawng hai cei phung na hoeh tie nangmouh ni kacaicalah na panue awh. Hateiteh tami bang patet hai kakhin hoi kathoung hoeh lah ka pouk hoeh nahan Cathut ni na patue toe. ²⁹ Hatdawkvah na kaw awh navah banghai oun han awm laipalah ka tho. Hatdawkvah bangkongmaw na kaw awh, dei a haw telah atipouh. ³⁰ Konilias ni hettelah ati. Atu totouh rawca ka hai, suimilam kathum nah im vah ka ratoum. Atu hnin pali a pha toe. Hnipangaw a kâkhu teh kaie hmalah a kangdue. ³¹ Kornilias na ratoum pawlawk kai ni ka thai toe. Nange poehnonaw haiyah Cathut hmalah pahnim hoeh hanelah ao. ³² Hatdawkvah Joppa kho kaawm Piter tie Simon hah kaw hanlah patoun leih. Tuipui teng phaivuen thaw ka tawk e Simon im doeh a luen. Ahni a tho torei teh nang koe a dei han doeh na ti pouh. ³³ Hatdawkvah kai ni nang koevah tami tang ka patoun. Tang na tho thai dawk ka lung hroung ahawi. Atu kaimanaw pueng ni nang koe Cathut ni a dei e thai thai hanelah na hmalah ka o awh telah Kornilias ni a dei pouh.

Jentelnaw hanlah kamthang kahawi

³⁴ Hatnavah Piter ni a kâko a paawng teh, lawkkatang lah Cathut teh tami minhmai khen hoeh ati. ³⁵ Alouklouk e taminaw hai Cathut taki laihoi thaw kathoungrouk lah ka tawk e tami teh minhmai kahawi a hmu tie kai ni ka panue. ³⁶ Tami pueng e Cathut ni Jisuh Khrih lahoi roumnae kamthang kahawi a dei e hah, Isarel miphunnaw koe poe e lawk nangmouh ni na panue awh. ³⁷ Jawhan teh baptisma kong

hah a dei hnukkhu Galilee ram hoi a kamtawng teh, Judah ram hmuen tangkuem dawk kaawm e hnonaw nangmouh ni na panue aw. ³⁸ Cathut ni Kathoung Muitha e bahu hoi Nazareth tami Jisuh hah satui a awi. Ahni teh Cathut e kâ lahoi hnokahawi a sak teh kahraimathout ni a rektap e naw damnae a poe.

³⁹ Kaimouh haiyah, Jerusalem kho hoi kamtawng teh, Judah ram thung a sak e hnonaw hah kapanuekkhaikung lah ka o aw. Hote tami teh, thingpalam dawk a pathout aw teh a thei aw. ⁴⁰ Apâthum hnin Cathut ni bout a thaw sak teh tak kamnuenae kâ a poe. ⁴¹ Tami pueng koe koug kamnuek pouh hoeh. Cathut ni a rawi tangcoung e kapanuekkhaikung kaimouh koe a kamnue, duenae koehoi bout a thaw hnukkhu, hote Bawipa hoi kaimouh teh rei ka canei aw. ⁴² Hote Bawipa ni kahringnaw hoi kadoutnaw lawkcengkung lah, Cathut ni a rawi e lah ao tie tami pueng koe dei pouh hane hoi kampangkhai hanelah kaimouh koe kâ na poe aw. ⁴³ Hote Bawipa ka yuem e pueng a min lahoi lungmanae lahoi yonthanae a coe aw han telah profetnaw pueng teh hote Bawipa kapanuekkhaikung lah ka o aw telah Piter ni a dei.

Jentelnaw baptisma coenae

⁴⁴ Hote lawk a dei lahun navah ka thai pueng koe Kathoung Muitha teh a pha. ⁴⁵ Jentel miphunnaw ni Kathoung Muitha e lungmanae a coe aw daw, vuensom ka a e, Piter hoi a hnukkâbangnaw a kângairu aw. ⁴⁶ Bangkongtetpawiteh, ahnimouh ni

alouklouk lae lawk lahoi Cathut a pholen aw. ⁴⁷ Hathnukkhu Piter ni kaimouh patetlah Kathoung Muitha ka coe e hetnaw heh baptisma poe sak hoeh hanlah apipatet maw na ka ngang thai han ati hnukkhu ⁴⁸ Jisuh Khrih e min lahoi baptisma coe sak hanlah kâ a poe. Hathnukkhu teh Piter hah ahnimanaw ni atueng ka saw hnawn lah okhai hane a kâhei aw.

11

Jerusalem e kawhmoun koe Piter ni a dei

¹ Judah ram thung kaawm e gunceinaw hoi hmaunawngghanaw ni Jentelnaw ni Cathut lawk a dâw aw toe tie a thai aw. ² Hahoi teh Piter ni Jerusalem kho a pha toteh vuensom ka a naw ni ahni teh a pathoe aw. ³ Nangmanaw vuensom ka a hoeh e naw koe na kâen aw teh na canei aw telah yon a hnei aw.

⁴ Hahoi teh Piter ni hote a konglamnaw kahawicalah buet touh hnukkhu buet touh a dei pouh. ⁵ Joppa kho ka ratoum navah vision ka hmu. Hni kalenpui buet touh a takin pali touh kaawm e kalvan lahoi kabawt e ka hmu teh ka teng vah a pha. ⁶ Athung vah kahawicalah ka khet teh talai van e a khok pali touh e moithangnaw, sarangnaw, a vawn hoi kâva e naw hoi tavanaw hah ka hmu. ⁷ Hahoi lawk buet touh ka thai. Piter thaw nateh, thet haw, hahoi teh cat loe, na ti pouh. ⁸ Hatei, kai ni coung thai mahoe Bawipa, bangkongtetpawiteh, kathounghoehe hno teh ka kâko daw kâen boihoeh ka ti pouh.

⁹ Hatnavah apâhni lah kalvan hoi e a lawk teh Cathut ni a thoungsak e nang ni thoung hoeh tet

hanh a ti. ¹⁰ Hettelah vai thum touh thung ati hnukkhu hotnaw pueng teh kalvan lah bout a tawm.

¹¹ Hat navah, Kaisarea kho lahoi kai koe a patoun e tami kathum touh kai ka onae im hmalah a kangdue awh. ¹² Hatnavah Kathoung Muitha ni oupvoutnae awm laipalah ahnimouh hoi rei cet lawih telah na ti pouh. Hete hmaunawngaha taruk touh hai kai hoi rei a cei awh teh kaimouh teh ahni im ka kâen awh. ¹³ Hote tami ni kalvantami ni ahnie imthungkhu a kangdue teh Joppa kho lah tami patoun nateh Piter tie Simon hah kaw loe. ¹⁴ Ahni ni nangmouh imthungkhu abuemlah rungngang lah na o awh nahanlah a hmu e hah na dei pouh han ti teh a hmu e hah kaimouh koe a dei. ¹⁵ Hahoi teh tang ka dei teh, Kathoung Muitha teh ahmaloe maimae lathueng a pha e patetlah ahnimouh lathueng hai a pha van. ¹⁶ Hatnavah Jawhan ni tui baptisma a poe. Nangmouh teh Kathoung Muitha dawkw baptisma na hmu awh han telah Bawipa ni a dei e lawn ka pouk.

Kabawpnae

¹⁷ Hat torei teh, Cathut ni Bawipa Jisuh Khrih ka yuem e nangmouh na poe e poehno patetlah, ahnimouh haiyah a poe van dawkvah, bangtelah vai khuet ka rakhout thai toung va telah atipouh.

¹⁸ Ahnimouh teh hote lawk a thai navah sairasuepcalah ao awh. Hathnukkhu Cathut a pholen awh teh Cathut ni hringnae dawkw pha sak lah kaawm e pankângainae phunglawk hah Jentelnaw koe haiyah a poe toe titeh a dei awh.

Antiok kho e Kawhmoun

¹⁹ Stiven rektap kecu daw kâkapek awh e naw teh, Phoenicia ram koehoi saipras tuilum hoi Antiok kho totouh a cei awh. Ahnimouh teh Judah mipahun dei laipalah, api koehai kamthang lawk teh dei awh hoeh toe. ²⁰ Hatei, Saipras hoi Grik kho e tami a tangawn ahnimouh koe a bawk teh Antiok kho a cei awh. Grik lawk ka dei e Judahnaw koe haiyah a dei pouh teh Bawipa Jisuh e kamthang kahawi teh a dei awh. ²¹ Bawipa e thaonae kut teh ahnimouh hoi rei ao dawkvah, tami moikapap ni a yuem awh teh Bawipa koe a kâthung awh.

²² Ahnimae kamthang teh Jerusalem kaawm e kawhmoun ni a thai navah, Barnabas hah Antiok kho cei hanlah a patoun awh. ²³ Barnabas a pha teh, Cathut e lungmanae a hmu torei teh a lunghawi, ahnimanaw hanlah yuemnae lahoi Bawipa koe pou kâhnai hanelah tha a poe teh a hroecoe. ²⁴ Bangkongtetpawitech, ahni teh tami kahawilah ao dawkvah, Kathoung Muitha hoi thoseh, yuemnae hoi thoseh, kakawi e lah ao. Hatnavah tami moikapap Bawipa daw k a kâthung awh.

²⁵ Barnabas teh Tarshish kho a cei teh, Sawl hah a tawng. ²⁶ A kâhmo toteh Antiok khovah a thokhai teh kum touh thung kawhmoun hoi a kamkhueng awh teh tami moikapap a cangkhai awh. Antiok khovah ahnukkâbangnaw hah Khristennaw telah hmaloe a kaw awh.

²⁷ Hatnae tueng dawkvah Jerusalem hoi Antiok khovah profetnaw a cei awh. ²⁸ Ahnimouh thung dawkvah Agabus tie ni a kangdue teh, talaivan pueng dawkvah takang kalenpoung a

tho han telah muitha lahoi a pâpho. Hote takang teh Kalawdias siangpahrang a tawk nah a tho. ²⁹ Hatnavah a hnukkâbangnaw ni a tithai awh e patetlah kabawp hanelah lengkaleng a tâcokhai awh. ³⁰ Ahnimouh ni hottelah a tâcokhai e hah Barnabas hoi Sawl koehoi patuen kacuenaw koe a patawn awh.

12

Jem theinae

¹ Hatnae tueng nah Herod siangpahrang ni kawhmoun thungvah tami tangawn rektap hanelah a man awh. ² Ahni ni Jawhan e hmau Jem hah tahloi hoi a thei. ³ Hettelah a thei nah Judahnaw a lunghawi awh tie a hmu dawkvah Piter hai man hanlah bout a kâcai. Hatnae tueng teh tonphuenhoehe vaiyei pawih lah ao. ⁴ Herod ni Piter a man hoi thongim thung a pakhum teh ka ring hanelah ransa phu touh dawkh pali touh kaawm e, phu pali touh koe a poe. Ahni ni ceitakhai pawih a baw toteh tamimaya hmalah a tâcokhai han a ngainae ao.

Piter thong bonae hoi hloutnae

⁵ Hettelah hoi Piter teh thongim thung a paung awh. Hatnavah kawhmoun ni Piter hanlah Cathut koe puenghoi a ratoum pouh awh. ⁶ Herod ni tamimaya hmalah a tâcokhai nahane hnin a pha hoehnahlan tangmin vah Piter hah sumbawtarui kahni touh hoi a pakhi awh teh ransa roi e rahak a i sak awh. Ka ring e naw ni hai takhang koe king a ring awh. ⁷ Hatnavah Cathut e kalvantami a tho teh

thongim thung pheng a ang. Kalvantami ni Piter e a na koe a tek pouh teh, karang thaw leih atipouh. Hat nah tahma vah sumbawtaruinaw ahni kut dawk hoi pak a ca pouh. ⁸ Kalvantami ni, taisawm kâyeng nateh khokkhawm khawm leih atipouh e patetlah Piter ni a kâroe. Hahoi, hni kâkhu nateh ka hnuk kâbang, bout atipouh. ⁹ Piter ni a thaw teh ahnie a hnuk a kâbang. Hatei kalvantami ni ati e hah kankak nahoe h mue, vision mue ka hmu a ti. ¹⁰ Thongim karingkungnaw ni, ringnae apasueke hoi apâhni e hmuen a tapoung teh kho thung kâennaë sum longkha koe a pha roi. Hote longkha hai a mahmawk a kamawng teh hote hmuen koehoi a tâco roi. Hahoi lamthung buet touh dawk a cei navah, kalvantami ni Piter teh a ceitakhai . ¹¹ Hatnavah Piter a lungcai teh, Bawipa ni a kalvantami a patoun teh, Herod bawi e kut dawk hoi Judahnaw ni a sak e naw thung hoi, kai hah na hlout sak katang e ka panue telah a dei.

¹² Hote hno kaawm e a lungcai katang hoiyah Mark ati awh e Jawhan e a manu Meri im lah a cei. Hote im dawk taminaw a kamkhueng awh teh a ratoum awh. ¹³ Piter ni takhang tho a takhawng pouh nah Rhoda tie sannu ni tho paawng hanlah a cei. ¹⁴ Piter e a lawk tie a nout navah, tho paawng pouh laipalah lunghawinae lahoi im thung lah a yawng teh, tho koe Piter a kangdue, tie a dei pouh. ¹⁵ Ahnimouh ni, na pathu maw atipouh awh. Hatei napui ca ni a tang doeh telah makkhak a dei. Hatdawkvah ahnimouh ni yah, ahnie a kalvantami vai aw, atipouh awh. ¹⁶ Hatnavah Piter ni tho a

takhawng. Ahnimouh ni a paawng teh a hmu navah a kângairu aw h. ¹⁷ Sairasuep lah awm aw h telah a kut hoi a kamnue sak. Bawipa ni bangtelah hoi maw thongim thung hoi na tâco sak tie a dei pouh. Hete konglamnaw hah, Jem hoi hmaunawngghanaw koehai dei pouh aw h atipouh teh alouklah a ceitakhai .

¹⁸ Amom khodai toteh, Piter heh bangne ka tet ati aw h teh ransanaw teh ruengrueng ati aw h e heh kathoenge nahoe h. ¹⁹ Herod ni tawng aw h atipouh. Hatei hmawt aw h hoe h. Karingkungnaw pacei nateh thet aw h telah kâ a poe. Hathnukkhu vah Herod teh Judah ram hoi Kaisarea kho lah a cei teh hawvah dawngdeng ao.

Herod pâri laihoi a due

²⁰ Herod teh Taire hoi Sidon taminaw koevah, puenghoi a lungphuen dawkvah, ahnimanaw ni Herod koe a tho aw h teh, Herod ka ring e Blastus hah kâmai hawikhai hanelah a dei pouh aw h. Bangkongtetpawiteh ahnimae ram teh siangpahrang e ram thung hoi canei ka hmawt e lah ao aw h.

²¹ Ahnimouh kamkhueng hnin vah Herod teh ama Siangpahrang e a puengcang kâmahrawk teh a bawitungkhung dawkvah a tahung teh tamimaya koe lawk a dei pouh. ²² Kamkhueng e taminaw ni, Lawk kadeikung heh tami kahring e lawk nahoe h cathut e lawk doeh titeh a hram aw h. ²³ Herod ni Cathut hah a bari hoe h dawkvah Bawipa e kalvantami ni vai touh lahoi a hem. Ahni teh pâri ni a ca teh a due. ²⁴ Cathut lawk teh a kampai teh hoe a kamphung.

²⁵ Barnabas hoi Sawl ni kabawpnae thaw a cum roi hnukkhu Mark tie Jawhan hai a hrawi roi teh Jerusalem hoi bout a ban awh.

13

Thaw kârokuengnae

¹ Antiok kho kaawm e kawhmoun dawkvah Barnabas, Niger telah kaw e Simeon, Sairen tami Lusius, Herod bawi e a hui Manean, Sawl tinaw, profetnaw hoi kacangkhaikungnaw teh ao awh. ² Ahnimouh ni rawca hai lahoi Bawipa a baw awh navah Kathoung Muitha ni Barnabas hoi Sawl heh kai ni ka hmoun pouh e thaw taw hanelah na takhoe pouh awh telah a ti. ³ Hatnavah ahnimouh ni rawcahai ratoum hnukkhu ahnimouh roi e lathueng kut a toung awh teh a patoun awh.

Saipras tuilum koe thaw tawknae

⁴ Hahoi, ahnimouh teh Kathoung Muitha ni a patoun awh e patetlah Seleukia kho lavah a cei awh teh Saipras lah long hoi a cei awh. ⁵ Salamis kho a pha awh navah, Judahnaw e sinakoknaw dawkvah Cathut lawk hah a pâpho awh. Ahnimouh ni kabawmkung lah Jawhan hai a hrawi awh.

⁶ Hote tuilum pet a kâhei hnukkhu Paphos kho totouh a pha awh navah camkathoum e profet kaphawk Barjisuh a kâhmo awh. ⁷ Ahni teh, hote tuilum ka uk e bawi Sergius tie teh Pawlus e a hui lah ao. Khobawi ni Cathut lawk thai hanelah puenghoi a ngai dawkvah Barnabas hoi Sawl teh a kaw. ⁸ Hatei camkathoum e Elymas ni khobawi

hah yuemnae koehoi phen sak hanelah a panki teh Barnabas hoi Sawl teh a ngang. ⁹ Hatnavah Pawl telah kaw e Sawl teh Kathoung Muitha hoi akawi dawkvah, ¹⁰ hote tami heh khei a khet teh, dумыennaе hoi kakawi e kahraimathout capa, lannaе taran lah kaawm e nang teh Cathut e lannaе lamthung heh raphoe laipalah na awm thai hoeh maw. ¹¹ Khenhaw! Cathut kut teh na tak dawк atu a pha toung dawkvah, na mit dawn vaiteh kho hmawt laipalah hninthа kasawlah na o han atipouh. Hat nah tahma vah, a mit amom teh kho lah a hmo pouh dawkvah ka hrawi hane tami vaivai a payam laihoi a tawng. ¹² Hote khobawi ni a hmu navah Bawipa hoi kâkuen e cangkhai e naw hah kângairu lahoi a pholen teh a yuem.

Antiok kho Pawl kamthang lawk a dei

¹³ Pawl hoi a huinaw teh Paphos kho hoi long hoi a cei awh teh Pamfilia ram Perga khovah a pha awh. Hatnavah Jawhan teh ahnimouh hoi a kamphei teh Jerusalem kho lah a ban. ¹⁴ Ahnimanaw teh Perga kho hoi bout a cei awh teh, Pisidia ram Antiok kho a pha awh. Sabbath hnin vah sinakok thung a kâen awh teh a tahung awh. ¹⁵ Kâlawk cauknaw hoi profet cauknaw a touk awh navah, sinakok kaukungnaw ni tami a patoun teh, ka hmaunawngghanaw tamimaya thapoelawк dei han awm pawiteh dei awh loe telah atipouh awh.

¹⁶ Hatnavah, Pawl ni a thaw teh, kut a dâw hnukkhu Isarel miphunhaw hoi Cathut ka taket e naw ka lawk thai awh haw. ¹⁷ Isarel miphunhaw

Cathut ni maimae mintoenaw hah a rawi teh Izip ram san lah ao awh navah miphun kalenpoung lah a coung sak teh, a kut thakaawmpoung hoi ahnimouh teh hote ram thung hoi a tâco sak toe. ¹⁸ Kum 40 touh thung thingyei yon dawk a khetyawt. ¹⁹ Hahoi, Kanaan ram kaawm e miphun phun sari touh e naw hah a raphoe teh ahnimae ram dawk a taminaw hah râw a rei awh teh ao sak. ²⁰ Hatteh, kum 450 touh a ro. Hahoi, profet Samuel se totouh lawkcengkung-naw a poe. ²¹ Ahnimouh ni siangpahrang a hei awh navah Cathut ni Benjamin miphun lah kaawm e Kish capa Sawl teh kum 40 touh thung siangpahrang hanelah a poe awh. ²² Hahoi ahni hah a takhoe teh, Isarel siangpahrang lah Devit hah a tawm pouh. Ahni hah a kampangkhai teh hettelah a dei, ka lung ka youk ni teh kaie ngainae ka kuep sak hane tami Jesi capa Devit ka hmu toe, telah a ti.

²³ Cathut lawkkam patetlah Isarelnaw hane rungngangkung Jisuh teh Devit catoun dawk hoi a tâco sak. ²⁴ Hote Bawipa a tho hoehnahlan vah Jawhan ni Isarelnaw pueng koe pankângainae baptisma kong sut a pâpho toe. ²⁵ Jawhan teh a tawk e thaw a cum tawmlei nah, nangmouh ni kai hah api lah maw na pouk awh vaw. Kai teh ka tho hane Bawipa nahoe. Ahni teh ka hnuklah doeh a tho. Ahni khok dawk e khokkhawm rui patenghai rasu pouh hanlah kai kamcu hoeh a ti.

²⁶ Abraham catoun lah kaawm e naw hoi nangmouh thung e Cathut ka bari e hmaunawng-hanaw, hete rungngangnae kamthang kahawi

teh kaimouh koe poe lah ao toe. ²⁷ Jerusalem e taminaw hoi kacue e naw ni, hote Bawipa hoi Sabbath hnintangkuem touk lah kaawm e profet lawknaw hai a thai panuek aw hoh dawkvah, hote Bawipa hah a theinae lahoi profet lawknaw teh a kuep sak aw hoh toe. ²⁸ Ahnimouh ni Bawipa hah thei thai nahane yon a tawng a ei a hmu aw hoh nahlangva vah thei hanelah Pailat Bawi koe a hei aw hoh. ²⁹ Hottelah hoiyah Bawipa noe lahoi thut lah kaawm e pueng a kuep sak aw hoh hnukkhu, a ro hah thing daw k hoi a rasu aw hoh teh, tangkom daw k a pakawp aw hoh. ³⁰ Hatei, Cathut ni Bawipa teh duenae koehoi a thaw sak toe. ³¹ Bawipa teh Galilee hoi Jerusalem totouh kahlawng lah a cei navah, amae a hnukkâbangnaw koe hnin moikapap a kamnue pouh. Ahnimouh teh, Bawipa kapanuekkhaikung lah ao aw hoh. ³² Atuvah, hete lunghawinae kamthang teh nangmouh koe a pha thai nahanlah hi ka tho e doeh. ³³ Cathut ni Jisuh hah a thaw sak teh, mintoenaw e catoun lah kaawm e maimouh han lah, hote lawkkam hah a kuep sak toe. Het hateh apâhni e Sam daw k nang teh kaie Ka Capa lah na o. Sahnin vah nang hah na khe sak toe, telah a thut tangcoung e patetlah ao. ³⁴ Duenae koehoi bout a thaw nahane kong hoi rawknae daw k bout pha hoe nahanelah Cathut ni a dei e teh, kathounge hoi yuemkamcu e yawhawinae Devit koe lawk ka kam tangcoung e hah nangmouh koe na poe aw hoh han tie hah doeh. ³⁵ Hatdawkvah alouke Sam la daw k hai Bawipa hanlah houk kathounge naw teh bout pawk sak mahoh toe telah bout a dei.

³⁶ Devit ni amae tueng dawk Cathut thaw a tawk teh a due hnukkhu, mintoenaw e phuen thung pakawp teh pawknae koe a pha. ³⁷ Hateiteh Cathut ni thaw sak lah kaawm e Bawipa teh pawk hoeh toe. ³⁸ Hatdawkvah ka hmaunawng-hanaw, hote Bawipa lahoi yon ngaithoumnae kamthang nangmouh koe pâpho e hah, ka yuem pueng ni Mosi e kâlawk lahoi lan sak thai hoeh e thung hoi na lan sak toe tie panuek awh. ³⁹ Hote Bawipa lahoi na lan toe telah khoe lah onae nakunghai, nangmouh ni panuek awh haw. ⁴⁰ Hatdawkvah, ayâ ka pacekpahlek e naw, khen awh, kângairu awh nateh, rawknae koe phat awh. ⁴¹ Bangkongtetpawiteh kai ni nangmae se dawk hno buet touh ka sak han. Tami buetbuet touh ni hote hno hah nangmouh koe pheng ka pâpho nakunghai, nangmouh ni khoeroe na yuem a mahoe telah profetnaw hno lahoi dei tangcoung e teh, nangmouh koe a bo hoeh nahanlah kâhruetcuat awh atipouh.

Pawl hoi Barnabas Antiok kho a pha

⁴² Pawl hoi Silas a ban roi navah hmalae sabbath hnin haiyah hete kamthang bout dei pouh hanelah Jentelnaw ni a kâhei awh. ⁴³ Sinakok hoi a tâco awh hnukkhu vah, Judahnaw hoi Judah phung lah kâen ni teh Cathut ka bawk e naw ni Pawl hoi Barnabas hnuk a kâbang awh. Cathut lungmanae dawk pou awm a loe telah ahnimouh roi ni tha a poe roi.

⁴⁴ Hmalae sabbath hnin dawk teh lawkkatang thai hanelah khobuem a kamkhueng awh.

⁴⁵ Hatei, Judahnaw ni hote tamihupui hah a hmu

awh navah, a ut awh teh Pawl ni a dei e hoi kâtaran lah dudamnae lawk a dei awh.

⁴⁶ Hatnavah Pawl hoi Barnabas ni lungtang laihoi a dei roi e teh, Cathut e lawkkatang hah nangmouh koe hmaloe pâpho han ka ngai ei teh nangmouh teh a yungyoe hringnae na hmu awh nahanlah na kamcu awh hoeh dawkvah, Jentelnaw koe lah ka kamlang awh toe.

⁴⁷ Bangkongtetpawiteh, Bawipa ni, nangmouh teh rungngangnae hah talai pout totouh pâpho hanelah, kai ni nangmanaw teh Jentelnaw e angnae lah na ta awh toe telah kaimouh koe kâ na poe toe atipouh.

⁴⁸ Jentelnaw ni hote lawk a thai awh navah, a lunghawi awh teh, Bawipa e lawk hah a bawilen sak awh. Yungyoe hringnae coe hanelah hmoun tangcoung e tami pueng nihaiyah a yuem awh. ⁴⁹ Hettelah hoi Bawipa e a lawkkatang teh haw e khoram pueng dawk a kamthang.

⁵⁰ Hatei, Judahnaw niyah Cathut ka bawk ni teh bari kaawm e napuinaw hoi khobawinaw hah a hroecoe awh teh Pawl hoi Barnabas hah rektap sak hanelah a tacuek awh. Ahnimouh roi hah amamae kho dawk hoi a pâlei awh. ⁵¹ Hattoteh Pawl hoi Barnabas ni a khok dawk e vaiphu a takhawng sin teh Ikonium kho lah a cei roi. ⁵² A hnukkâbangnaw hai lunghawinae hoi thoseh, Kathoung Muitha hoi thoseh, akawi awh.

14

Pawl hoi Barnabas Ikonium phanae

¹ Pawl hoi Barnabas ni Ikonium kho Judah miphunaw e sinakok vah a kâen roi teh, a

pâpho roi navah, Judah miphunnaw hoi Grik miphunnaw tami moikapap ni a yuem awh. ² Hatei ka yuem hoeh e Judah miphunnaw niyah Jentelnaw hah a tacuek awh teh a hmaunawngaha rahak kâpohoehnae a tâco sak. ³ Hatdawkvah ahnimouh roi ni moi kasawlah ao sin roi teh Cathut e lawkkatang hah taranhawi laihoi a kampangkhai roi. Bawipa ni hai ahnimouh roi e kut dawk hoi mitnoutnaw hoi kângairu hnonaw hah sak thainae kâ a poe teh, amae lungmanae lawkkatang koe lah a kampangkhai. ⁴ Kho thung e taminaw teh kahni touh lah a kâkapek awh. Atangawn teh Judahnaw koelah a tangawn teh gunceinaw koe lah a kampang awh. ⁵ Jentelnaw hoi Judahnaw ni amamae khobawinaw hoi cung-talah gunceinaw hah rektap vaiteh talung hoi ka dout lah dêi han ati awh e hah, ⁶ Gunceinaw ni a panue awh toteh, Likonia ram kaawm e Listra hoi ‘Derbi kho tengpam vah koung a yawng awh teh, ⁷ haw e hmuen koe kamthang kahawi a pâpho awh.

Barnabas hoi Pawl hah cathut ati awh

⁸ Listra khovah kaawm e, a manu vawn thung hoi vai touh hai ka cet boihoeh e khokkhem tami buet touh teh Pawl ni a dei e lawk a thai. ⁹ Pawl ni a khet teh yuemnae a tawn e, a hmu navah, ¹⁰ thaw nateh kangdout haw telah kacaipounglah a dei pouh teh hluet a thaw teh a cei thai.

¹¹ Pawl ni a sak e hno a hmu awh navah ‘Ikonia lawk hoi a dei awh e teh cathutnaw heh tami lah a kâsak teh maimouh koe a kum ati awh. ¹² Ahnimouh ni Barnabas hah Zeus ati awh teh, Pawl heh phung kadeikung hoi

kahrawikung lah ao dawkvah, Hermes atipouh aw. ¹³ Vaihma Zeus e bawkim teh kho alawilah ao teh, tamimaya hoi thuengnae sak hanelah a ngai aw. dawkvah, maitotannaw hoi a peinaw hah kho thung a kâenkhai aw.

¹⁴ Guncei Barnabas hoi Pawl ni hottelah ati aw e a thai navah amamae khohna a ravei teh taminaw e rahak a kâen. ¹⁵ Barnabas hoi Pawl ni hei nangmanaw bangdawkmaw hettelah na sak aw. Kaimouh hai nangmouh patetlah talai daw. kho ka sak aw van e nahohmaw. Nangmouh ni het patet e ayawmyin hno na sak aw e hah cettakhai aw. Kalvan, talai, tuipei hoi a cawngca kasakkung kahring Cathut daw. na lungkâthung aw. nahanlah kaimouh teh kamthang kahawi ka dei e doeh. ¹⁶ Yo kaloum e senaw dawkvah, Cathut ni taminaw pueng hah amamae lamthung a dawn thai nahan pak a hnoun. ¹⁷ Hatei nangmouh koe hnokahawi a sak e, canei kakhoutcalah a poe teh a lunghawi sak nahanlah, kalvan hoi kho a rak sak teh, atimunaw a paw sak. Ratui ahawi sak teh Bawipa hawinae kampangkhai laipalah kaawm thai aw. hoeh telah Pawl hoi Barnabas ni a hramkikhai roi. ¹⁸ Ahnimouh roi ni hottelah a hramkhai roi dawkvah thuengnae sak hoeh nahanlah rangpuinaw hah puenghoi a cakâ thai aw.

¹⁹ Hathnukkhu Antiok kho hoi Ikonium kho lahoi Judah mipunnaw teh a tho aw. teh rangpuinaw pueng a pâkhueng aw. teh Pawl hah talung hoi a dêi aw. A due toe ati aw. teh kho alawilah a sawn aw. ²⁰ Hatei a hnukkâbangnaw ni a khet lahun nah Pawl bout

a thaw teh kho thung bout a kâen. A tangtho vah Pawl teh Barnabas hoi Derbi kho lah a cei toe.

Kawhmoun a kangdue sak

²¹ Ahnimanaw ni hote kho dawkvah, kamthang kahawi a dei awh teh tami moikapap ni a hnukkâbang lah a coung awh. Hahoi teh Lистра lah a ban awh teh, Ikonium hoi Pisidia ram Antiok kho lah a cei awh. ²² Yuemnae daw kacaklah kangdout awh telah tha a poe hnukkhu, maimanaw teh Cathut uknaeram daw kâen nahanlah rucatnae moi kang awh han telah a dei pouh. ²³ Kawhmoun tangkuem daw hai kacuenaw a rawi pouh teh, rawcchai laihoi a ratoum awh hnukkhu, amamouh ni a yuem awh e Bawipa e kut daw ahnimanaw hah a hnawng awh. ²⁴ Hahoi teh Pawl hoi Barnabas teh Pisidia ram a tapoung roi teh Pamfilia ram lah a pha roi. ²⁵ Perga kho lawk a pâpho hnukkhu Attalia kho lah a cei roi.

²⁶ Hote kho koehoi atu e a tawk awh e thaw a cum awh nahanelah a patounnae Antiok kho lah long hoi bout a cei roi. ²⁷ Hawvah a pha toteh, kawhmoun hah a kamkhueng sak teh, ahnimouh roi hno lahoi Cathut ni a sak e hno hoi Jentelnaw koe yuemnae takhang a kamawngnae hah a dei pouh awh. ²⁸ Hathnukkhu haw vah hnukkâbangnaw koe hnin moi kasawlah ao awh.

15

Antiok kho hoi kâounnae

¹ Tami bangpatetnaw ni Judah ram lahoi a tho awh teh, Mosi e kâlawk patetlah vuen-somanae ka hmawt hoeh e ni rungngang lah na awm thai mahoe, telah hmaunawngghanaw a cangkhai awh. ² Hatnavah Pawl, Barnabas ti hoi ahnimanaw teh kâounnae puenghoi ao dawkvah, hmaunawngghanaw ni, Pawl, Barnabas hoi alouke a hnukkâbangnaw hoiyah hote laidei hanelah Jerusalem kaawm e gunceinaw hoi kacuenaw koe a cei awh hane lawk a dei awh. ³ Kawhmoun ni ahnimanaw yo a thak awh. Phoenicia hoi Samaria ram lahoi pou a cei awh navah, Jentelnaw koe a lungpatawnae kong ahnimouh ni a dei awh teh hmaunawngghanaw pueng a lunghawi sak awh. ⁴ Jerusalem a pha awh navah, kawhmoun hoi Gunceinaw, kacuenaw ni a dawn awh. Ahnimouh ni Cathut ni ahnimouh hno lahoi hno a sak e naw a dei pouh awh.

⁵ Hatei Farasinaw koe lahoi ka yuem e tami tangawn ni a kangdue awh teh, Jentelnaw hah vuensoma sak hane hoi Mosi e kâlawk tarawi sak hanelah lawkthui hanelah ao ati awh.

Jerusalem kamkhuengnae

⁶ Hatdawkvah gunceinaw hoi kacuenaw ni hote lawk paceinae pouk hanelah a kamkhueng awh. ⁷ Tha hoi a kâoun awh hnukkhu vah Piter ni a kangdue teh hmaunawngghanaw, Jentelnaw ni kamthang kahawi a thai awh teh, a yuem awh thai nahanlah Cathut ni nangmouh thung hoi kai heh kadeikung lah na rawi e na panue awh. ⁸ Lungthin be ka panuek e Cathut ni Kathoung

Muitha heh maimouh na poe e patetlah ahnimouh hai a poe awh teh ahnimouh koelah a kam-pangkhai. ⁹ Cathut ni ahnimouh hoi maimouh khoeroe kapeknae awm laipalah yuemnae lahoi ahnimae lungthin a thounsak. ¹⁰ Hatdawkvah nangmouh ni mintoenaw hoi maimouh ni hai phu thai hoeh e hno teh ahnimae a loun daw na patue e lahoi atuvah Cathut tanouk hanlah na ngai awh. ¹¹ Maimouh hai ahnimouh patetlah Bawipa Jisuh Khrih e a lungmanae kecu daw rungngang lah o teh yuem awh, atipouh.

¹² Hatnavah ka kamkhueng e tami pueng teh sairasuep lah ao awh teh, Barnabas hoi Pawl ti ni ahnimouh koehoi Jentelnaw koe Cathut ni a sak e mitnoutnae hoi kângairunae a dei awh e a thai awh. ¹³ Ahnimanaw ni lawk dei e a pâbaw awh hnukkhu, Jem ni hmaunawngghanaw, kaie ka lawk thai awh haw. ¹⁴ Cathut ni ama hanlah Jentelnaw thung hoi a mipun lah a coe nahan, ahnimouh koe hmaloe a thonae hah Simeon ni apasuek vah a dei toe. ¹⁵ Profetnaw e a lawk dei e hai hete a lawk hoi a kâvan. ¹⁶ Cakathoung ni, hetnaw e hnuklah kai ni bout ka tho vaiteh ka rawm tangcoung e Devit e lukkareiim hah bout ka sak han. Raphoe tangcoung e hote rim hah bout sak lah ao vaiteh ka caksak han. ¹⁷ Ka min lahoi ka kaw e Jentelnaw hai a yungyoe ka hring e Cathut a tawng awh nahane doeh telah, ¹⁸ ayan hoi hete lawk ka panueksakkung Bawipa ni a dei atipouh. ¹⁹ Hatdawkvah Jentelnaw koehoi Cathut koe lah a lungkâthung e naw koe runae poe hanlah awmhoeh. ²⁰ Meikaphawk daw thounghoehnae, kamsoumhoeh napui tongpa

yonnae, lahuen kara e moi hoi a thinaw hah roun hanelah ahnimouh koe ca lahoi thaisak hanlah ka pouk. ²¹ Bangkongtetpawiteh ayan hoi kho tangkuem vah Mosi e phung lawk ka dei e ao teh, hote lawk hah sabbath hnintangkuem sinakoknaw dawk ouk touk awh atipouh.

Jentelnaw koe poe e ca

²² Hatnavah Gunceinaw, kacuenaw hoi Kawh-moun abuemlah ni amamouh thung dawk e tami a rawi awh teh, Pawl, Barnabas hoi hmaunawng-hanaw thung dawk e kahrawikung lah kaawm awh e Barsabbas telah a kaw awh e Judah hoi Silas a rawi awh. ²³ Ahnimouh koe a sin sak awh e ca dawkvah, gunceinaw kacuenaw hoi hmaunawngghanaw ni Antiok kho Siria ram hoi Cilicia ram kaawm e Jentel hmaunawngghanaw kut na man awh. ²⁴ Kaimouh koe e tami bangpatet ni kaimouh ni patoun laipalah a cei awh teh lawk aphunphun lah a dei awh teh, nangmouh na lungpuen awh teh, a rucatnae na poe awh tie ka thai awh. Vuensom na a awh vaiteh, kâlawk hai na tarawi awh roeroe han a ti awh. Hotpatetlae lawk dei hanelah ahnimouh koe kâpoelawk banghai ka poe awh hoeh. ²⁵ Hatdawkvah kaimouh ni ka kâhmo awh teh, maimouh ni pahren e Pawl hoi Barnabas hoi cungtalah nangmouh koe tami patoun hanelah ka lung a kuep awh. Hatdawkvah maimouh ni Bawipa Jisuh Khrih min kecu dawkvah amamae hringnae kâphumnaw lah kaawm e, ²⁶ maimouh ni lungpataw awh e Barnabas hoi Pawl tinaw hoi reirei patoun hanelah tami kahni touh rawi hane ka lungkuep awh. ²⁷ Hatdawkvah Judas hoi Silas

hah ka rawi aw h teh nangmouh koe ka patoun aw h. Ahnimouh ni lawk hoi hai a dei aw h han doeh. ²⁸ Hete phunglamnaw hloilah alouke hnokari titca hai nangmouh van toung sak hoeh nahanlah Kathoung Muitha hoi kaimouh ni ka hnâbo aw h. ²⁹ Hote phunglam teh nangmouh ni meikaphawk bawknae hno, thi, lahuen kara e moi, hoi kamsoumhoehe napui tongpa yonnae hah roun aw h. Nangmouh teh hete hnonaw hoi kathoung lah na aw m aw h pawiteh ahawi. Na tak dam aw h naseh telah a thut pouh aw h.

Jerusalem hoi patawn e ca ahawinae

³⁰ Gunceinaw a patoun navah Antiok kho lah a cei aw h teh, haw a pha hoi kayuemnaw a pâkhueng aw h hnukkhu ca hah ahnimae kut daw k a poe aw h. ³¹ Ahnimouh ni hote ca a touk aw h teh thapoenae lawk daw k a konaw m aw h. ³² Judah hoi Silas amamouh roi hai profet lah ao roi daw kvah ahnimouh koe thapoenae lawk a dei pouh roi. ³³ Ahnimanaw teh hnin dongdeng ao aw h teh, hmaunaw nghanaw ni lungmaw ng lah a thak aw h teh kapatoungkunaw koe let a ban sak aw h. ³⁴ Hatei Silas teh haw vah tongtang ao. ³⁵ Pawl hoi Barnabas teh Antiok kho ao navah alouke taminaw hoi cungtalah Bawipa e lawk hah a cangkhai aw h.

Pawl hoi Barnabas a kamphei roi

³⁶ A hnin moi ao hoi Pawl ni Barnabas koe, Bawipa e lawk pâpho tangcounghae kho daw k kaaw m e hmaunaw nghanaw, bangtelane ao aw h tie yo hloe hanelah ahnimouh koe bout cet aw h sei atipouh. ³⁷ Barnabas ni Mark tie Jawhan

hai hrawi hanelah a ngai. ³⁸ Hateiteh, Pawl ni Pamfilia ram vah ahnimouh hoi a kamphei teh oun a cei dawkvah, a thaw tawknae koe ahnimouh hoi reirei ka cet ngai hoeh e teh kaw hanelah awmhoeh telah a pouk. ³⁹ Hatnavah puenghoi kâounnae ao dawkvah buet touh hoi buet touh a kamphei roi toe. Barnabas ni Mark a hrawi teh Saipras tuilum lah a cei. ⁴⁰ Pawl ni Silas a rawi teh hmaunawngghanaw lahoi Bawipa e lungmanae dawk hnawng lah ao hnukkhu a kamthaw. ⁴¹ Ahni teh Siria ram hoi Cilicia ram lah tawngtang a cei teh, kawhmounnaw hah a cak sak.

16

Pawl ni Timote a kamyawngkhai

¹ Hathnukkhu hoi Pawl teh Derbi kho hoi Lustra kho a pha. Lustra kho dawk Timote telah a min poe e a hnukkâbang buet touh ao. Ahnie a manu teh ka yuem e Judah tami napui buet touh doeh, a na pa teh Grik tami doeh. ² Ahni teh Lustra lahoi, Ikonium kho dawk kaawm e hmaunawngghanaw thung bari kamcu e lah ao. ³ Pawl ni Timote hrawi hanelah a ngai. Ahnie a na pa Jentel tami tie hote hmuen koe kaawm e Judah tami pueng ni a panue aw h dawk vuensom a a pouh aw h. ⁴ Ahnimouh teh khopuinaw koe yuengyoe a cei aw h navah, Jerusalem kho dawk kaawm e gunceinaw hoi pastornaw lawk a poe e naw hah kayuemnaw tarawi hanelah a poe aw h. ⁵ Hottelah kawhmounnaw teh yuemnae dawk kacaklah ao teh, hnin touh hnukkhu hnin touh a pung aw h.

Masidonia tami hram lawk

⁶ Frigia ram, Galati ram lah a cei aw h hnukkhu Asia ram daw k lawk katang hah dei hoeh hanelah Kathoung Muitha ni a ngang dawkvah, ⁷ Misia ram lah a pha aw h teh, Bitunia ram lah cei han ati aw h navah, Muitha ni kâ a poe hoeh dawkvah, ⁸ Misia ram a tengpam a cei aw h teh, Troas kho a pha aw h. ⁹ Tangmin vah Pawl koe vision a kamnue. Masidonia tami buet touh ni a kangdue teh, Masidonia ram lah raka nateh, kaimouh na kabawm haw telah a kâhei. ¹⁰ Hote vision a hmu nah, Masidonia ram daw k kamthang kahawi dei sak hanelah Bawipa ni kaimouh na kaw aw h toe telah hnâ ka bo aw h teh, hote ram koe lah cei hanelah tang ka kâcai aw h.

Lidia kâthungnae

¹¹ Hatdawkvah, Troas kho hoi long hoi ka cei aw h teh Samotaret tuilum koe lah kuekluek ka cei aw h teh, a tangtho vah Neapolis khovah ka pha aw h. ¹² Hote kho daw k hoi bout ka tâco aw h teh Masidonia ram thung kaawm e Filippi khopui ka pha aw h teh dongdeng hnin ka saw lah ka o aw h.

¹³ Sabbath hnin vah kaimouh kho alawilah ka tâco aw h teh ratoumnae hmuen ao han mue telah ka pouk aw h teh tuipui rai lah ka cei aw h. Hote hmuen koe ka tahung aw h teh napuinaw hanlah ka dei pouh aw h. ¹⁴ Hatnavah hnipaling kâyawt e Tiatira kho e Lidia telah a kaw aw h e napui, Cathut ka baw k e buet touh ao. Pawl ni a dei e phung lawk hah sairasuepcalah a thai nahan Cathut ni a lungthin tho a paawng pouh. ¹⁵ Hote napui teh a imthungkhunaw hoi

Baptisma a coe hnukkhu, kai hah Bawipa koe yuemkamcu e tami lah na pouk aw h pawiteh, kai im kâen nateh awm aw h ei telah a kâhei teh kaimanaw koe na dei pouh aw h.

Pawl hoi Silas thongim bonae

¹⁶ Hathnukkhu hoi kaimouh teh ratoumnae im koe ka cei aw h navah hmalah han ka dei thai e, a thung kahrai kaawm e napui hoi ka kâhmo aw h. Hote napui teh amae a bawipanaw hane ahawinae moi ka sak e lah ao. ¹⁷ Hote napui ca teh Pawl hoi kaimae hnuklah a kâbang teh ahnimouh teh kalenpounge Cathut e kamthang lawk rungngangnae lawk ka dei e doeh telah a hram. ¹⁸ Hottelah, napuica ni a ngelawn dawkvah, Pawl ni a kamlang sin teh Jisuh Khrih min lahoi nang teh tâcawt telah kâ na poe. Hat nah tahma vah a thung hoi kahrai teh tang a tâco toe.

¹⁹ Ahnie bawinaw ni a bawireng thai nahanelah ngaihawinae awmhoeh toe tie a panue torei teh Pawl hoi Silas hah a man aw h teh khobawinaw koe a thak aw h. ²⁰ Khobawinaw koe a pha roi toteh hetnaw hah Judah taminaw law pawiteh maimae khopui rucacat a poe aw h. ²¹ Rom tami lah kaawm e maimanaw ni yuem hoeh han e, taw k hoeh hane phunglawknaw a cangkhai aw h telah ati aw h.

²² Kamkhueng e taminaw ni ahnimouh koe lah tang a kampangkhai aw h teh Pawl hoi Silas hah a taran aw h. Khobawinaw ni ahnimae angki a rading pouh teh ruitaboung hoi hem sak hanelah kâ a poe. ²³ A hem aw h teh, hmâtan a ca aw h. Kahawicalah ring aw h telah thongim

kaukkung koe kâ a poe teh thongim thung a paung aw. ²⁴ Hottelah lawkthui e patetlah thongim kaukkung ni thongim thung a paen teh a khok hlong a buet pouh aw.

Thongim karingkung lung kâthungnae

²⁵ Karumsaning Pawl hoi Silas teh Cathut koe ratoum laihoi Cathut a pholen roi. Thongim ka bawt e naw ni hai a thai pouh aw. ²⁶ Pouk laipalah Tâlî puenghoi a no dawkvah thongim a kâhuet. Takhangnaw koug a kamawng. Thongkabawtnaw pâkhinae sumrui pueng pak a ca pouh. ²⁷ Thongim kaukkung a kâhlaw teh thongim takhangnaw a kamawng e a hmu navah thongim kamungnaw koug a yawng aw mue toe telah a pouk dawkvah tahloi hoi amahoima kâthei hanelah a kâcai. ²⁸ Hatei Pawl niyah namahoima runae kâpoe hanh, kaimanaw hete hmuen koe be ka o aw telah kacaipounglah a dei pouh.

²⁹ Hattoteh thongim a kaukkung ni hmaito hoi yawng laihoi a kâen teh Pawl hoi Silas e hmalah pâyaw laihoi a tabo. ³⁰ Hathnukkhu ahnimouh roi alawilah a tâcokhai teh ka bawipa, rungngang lah o thai nahanlah bangmaw ka sak han ti teh a pacei. ³¹ Ahnimouh roi ni Bawipa Jisuh Khrih hah yuem haw. Hottelah na yuem pawiteh nama hoi na imthungnaw rungngang lah na o aw han atipouh roi. ³² Hathnukkhu ama hoi a imthungkhu dawkaawm e naw pueng koe Bawipa e lawk hah a dei pouh roi. ³³ Thongim kaukkung ni hatnae tangmin vah ahnimanaw hah a hrawi teh, a hmâtannaw tâsi a hluk

pouh. Hathnukkhu ama hoi a imthungkhu naw abuemlah baptisma koug a coe awh. ³⁴ Ahni ni Pawl hoi Silas hah ama im a kaw teh, rawca a pacapanei teh, imthung abuemlahoi Cathut a yuem awh dawkvah a konawm awh.

Hmantang kâheinae

³⁵ Khodai toteh khobawinaw ni, ram karingkungnaw a patoun teh, ahnimanaw hah tha awh leih atipouh awh. ³⁶ Hatnavah thongim kaukung ni hote kamthang hah Pawl koe a dei pouh. Khobawinaw ni tami a patoun awh teh, nangmanaw hah tha hanelah lawk na thui awh. Hatdawkvah, atu tâcawt awh nateh lungmawngcalah cet awh lawih atipouh. ³⁷ Hatei Pawl ni ram ka ring e naw koe Rom tami lah kaawm e kaimanaw hah akungkhei laipalah taminaw hmalah na hem awh teh, thongim thung na paung awh hnukkhu, atu kaimanaw hah arulahoi maw na tha awh han vaw. Hottelah ti kawi na maw. Amamouh kuekluek tho awh naseh, kaimouh na rasat awh naseh atipouh

³⁸ Hattoteh ram karingkungnaw ni hote lawknaw hah khobawinaw koe a dei pouh awh. Ahnimouh roi teh Rom tami roi doeh tie a panue awh torei teh, a taki awh dawkvah, ³⁹ amamouh kuekluek a tho awh teh a kâhei awh. Hathnukkhu a tâco sak awh teh, hote kho thung hoi tâco hanelah a kâhei awh. ⁴⁰ Ahnimouh hai thongim thung hoi a tâco awh toteh, Lidia im a cei awh teh, hmaunawngghanaw hoi a kâhmo awh. Ahnimouh thapoelawknaw a dei pouh hnukkhu alouklah a cei awh.

17

Thesalon khovah kamthang lawk a pâpho awh

¹ Hahoi teh Pawl hoi Silas teh Amphipolis kho hoi Apollonia kho a tapuet roi teh Thesalon kho a pha roi. Hote kho dawkvah Judahnaw e sinakok ao. ² Pawl ni ahmoun e patetlah ahnimanaw kamkhuengnae koe a cei teh Sabbath hnin hnin thum touh thung Cakathoung hah a kâdeikhai awh. ³ Khrih teh reithainae a khang vaiteh due-nae koehoi bout a thaw han tie kamcengcalah a pâpho teh, nangmouh koe ka pâpho e hete Jisuh raw doeh Khrih toe atipouh. ⁴ Ahnimouh thung dawk a tangawn ni yuemnae dawk a pha teh, Pawl hoi Silas tinaw hnuk a kâbang awh. Cathut ka bawk e Griknaw moikapap hoiyah napui kam kamsawng e naw ni hai a yuem awh.

Jason im vah kamcan onae

⁵ Hatnavah Judahnaw ni a ut awh dawkvah tami kaponaw a kaw awh teh a pâkhueng awh. Khopui thung ruengruengti khai awh, Jason im hah khik a kalup awh teh, Pawl hoi Silas hah taminaw hmalah tâcokhai hanelah a tawng awh. ⁶ Hatei ahnimouh roi teh a hmu awh hoeh dawkvah Jason hoi a hmaunawngghanaw hah, ukkungnaw koe a hrawi awh teh, kho tangkuem talaivan heh ka pakhuppathan e naw hi haiyah a pha awh toe. ⁷ Jason ni ahnimouh ama im a luen sak. Ahnimanaw teh Sizar bawi hloilah alouke siangpahrang tie Jisuh ao ati awh teh, Sizar bawi hah a taran awh telah a hramki awh. ⁸ Hote lawk ka thai e khobuem hoi ukkungnaw a lungpuen awh. ⁹ Jason hoi alouke hmaunawngghanaw koe

e rawngkhannae tangka a la teh ahnimouh teh bout a tha awh.

Berea khonaw

¹⁰ Pawl hoi Silas teh karum vah Berea kho a patoun awh. Hote kho dawk a pha roi toteh, Judahnaw e Sinakok vah a cei roi. ¹¹ Berea kho e taminaw teh, Thesalon kho e kaawm e naw hlak a talue awh. Pawl tinaw ni a dei e hah lungtho-calah hoi a dâw awh teh, laithoe maw atang maw tie hah a panue thai awh nahanelah, Cakathoung hnintangkuem a touk awh. ¹² Ahnimanaw thung dawk tami moikapap ni a yuem awh. Bari kaawm e Grik napuinaw hoi tongpanaw ni hai a yuem awh. ¹³ Hateiteh Thesalon kho kaawm e Judah taminaw ni Pawl teh Berea kho hai Cathut lawk a dei tie hah a thai awh toteh, taminaw a tacuek awh teh, ruengrueng ati sak awh. ¹⁴ Hatdawkvah hmaunawngghanaw ni Pawl hah karanglah tuipei totouh a thak awh. Silas hoi Timote teh hote khothung ao roi. ¹⁵ Pawl ka thak e naw ni Athen kho totouh a thak awh. Silas hoi Timote hah a coung thai nathung karanglah kai koe tho roi loe tie kâ a poe e a sin awh teh a ban awh.

Athen khovah Pawl phanae

¹⁶ Pawl ni Athen khovah ahnimouh a ring lahun nah hote kho teh meikaphawknaw seng lah ao e hah a hmu dawkvah, a lungthung khang thai hoeh. ¹⁷ Hatdawkvah ahni teh sinakok dawk Judahnaw hoi Cathut ka bawk e taminaw hoi a kâdei awh teh, anhla yonae koehai a kâdeikhai. ¹⁸ Epikurian hnukkâbangnaw hoi Satoiknaw nihai, Pawl hoi a kâdei awh. A

tangawn ni hete tami ni bangmouh a deingai aw ati awh. A tangawn ni teh ramlouknaw e cathut kong vai a dei aw ati awh. Hettelah tinae teh Pawl teh Jisuh hoi boutthawnae kong a pâpho dawk doeh. ¹⁹ Hattoteh Pawl hah Aripakas yungim a kaw awh teh, hete cangkhae a katha e heh kaimouh hai panue kaw maw ati awh. ²⁰ Bangkongtetpawiteh, ka thai awh boihoeh e, ka panue aw hoi boihoeh e na dei e hah, kaimanaw hai panue hane ka ngai atipouh aw. ²¹ Athen khocanaw hoi imyinnaw teh kamthang lawk thai ngainae a hloilah alouklah hoi a tueng baw sak aw hoi.

Aripakas yungim vah a pâpho

²² Hatdawkvah Pawl ni yungim lungui a kangdue teh, Athen nangmouh heh phunglam koe lah na thahmei poung aw tie ka hmu. ²³ Na baw aw e naw ka khet navah, panue hoeh e Cathut hanelah titeh ca na thut aw e thuengnae khongroe buet touh ka hmu. Nangmouh ni na panue aw hoeh e Cathut lawk kai ni ka dei han. ²⁴ Talaivan hoi talai daw kaawm e a cawngca kasakkung Cathut teh, kalvan hoi talai ukkung Bawi lah ao teh, tami e kut hoi sak e bawkinaw thung awmhoeh. ²⁵ Hathloilah, Cathut teh tami hringnae hoi kâhanaw pueng hoi hno cawngca pueng kapoekung lah ao dawkvah, ka panki e boiboe lah tami ni khetyawtnae panki hoeh. ²⁶ Cathut ni tami buet touh daw hoi mipun abuemlah a sak teh, talai van pueng ao sak teh, a tue hoi ao aw nahane hmuen pueng

hai lengkaleng a hmoun pouh. ²⁷ Hettelah a tingainae teh, taminaw ni Cathut hah a tawng aw h teh, a hmu hai khoun a hmu aw h nahane doeh. Atangcalah maimouh buet touh rip hoi Cathut teh kahlat e nahoe h. ²⁸ Bangkongtetpawiteh, la ka phuengkungnaw ni, atangcalah maimouh teh amae catoun doeh telah a phueng aw h e patetlah maimouh teh Bawipa lahoi hring aw h, kâroe aw h, o aw h. ²⁹ Maimanaw teh Cathut e canu capa lah o aw h dawkvah, Cathut hah tami e thounnae hno lahoi sui hoi sak e, talung hoi sak e meikaphawknaw hoi a kâvan telah pouk hanelah aw mhoeh.

³⁰ Cathut ni taminaw ni panue thai hoeh e a tue hah banglahai pouk hoeh eiteh, atuteh ram tangkuem kaawm e tami pueng hah pankângai hanelah kâ a poe toe. ³¹ Bangkongtetpawiteh, Cathut ni amamouh ni a khoe e Bawipa lahoi yah, talaivan heh lawkceng nahane hnin sut a hmoun toe. Hote Bawipa hah duenae koehoi a thaw sak teh, tami pueng koe mitnoutnae kancengcalah a poe toe.

³² Duenae koehoi boutthawnae kong hah a thai aw h toteh, tami tangawn ni a dudam aw h. A tangawn ni hmalah bout thai eisei ati aw h.

³³ Hattoteh Pawl teh ahnimouh koehoi a tâco.

³⁴ Hatei tami tangawn ni Pawl koe a kambawng aw h teh a yuem aw h. Ahnimanaw thung daw k Aripakas yung e tami buet touh lah kaawm e Dionisia hoi alouke napui Damaris tinaw hloilah napuinaw hai a baw k aw h.

Kawrin kho kawhmoun a kangdue

¹ Hathnukkhu, Pawl teh Athen kho hoi a cei teh Kawrin kho a pha. ² Hote hmuen koe Pontus ram e Judah tami buet touh Aguila a kâhmo. Rom siangpahrang Klaudias ni Judah taminaw pueng Rom kho hoi tâco hanlah kâ a poe dawkvah, Aguila teh Itali lahoi a yu Priscilla hoi Kawrin kho lah a yawng roi. ³ Pawl teh ahnimouh roi kâhmo hanlah a cei teh, thaw tawk e a kâvan dawkvah, ahnimouh roi hoi rei ao awh teh thaw a tawk van. A thaw tawk awh e teh rimkasakkung lah ao awh. ⁴ Pawl ni Sabbath hnintangkuem sinakok dawk a cangkhai teh, Judahnaw hoi Griknaw hah a pâkhueng.

⁵ Silas hoi Timote teh Masidonia ram hoi a tho roi nah, Pawl ni Judahnaw koe Jisuh teh Khrih doeh tie kacailah a dei pouh. ⁶ Hatei Judah miphunnaw ni ahni teh a taran awh teh, a dudam awh navah, ahni ni angki a kathuek teh, nangmae thi teh nangmae lû dawk bawt seh. Kai teh ka hlout. Atu hoi teh Jentelnaw koe ka cei han toe atipouh. ⁷ Hote hmuen koehoi a tâco teh Cathut ka bawk e Justus im vah a cei. Ahnie im teh sinakok teng vah ao. ⁸ Sinakok kaukung Krispas hoi imthungkhunaw ni Bawipa teh a yuem awh dawkvah, Kawrin kho e kaawm e tami moikapap ni a thai awh teh a yuem awh dawkvah Baptisma a coe awh.

⁹ Tangmin buet touh teh Cathut ni vision lahoi Pawl koe, taket hanh, pou pâpho. ¹⁰ Bangkongtetpawiteh, nang hoi cungtalah ka o. Apinihai nang koevah rektapnae thosak mahoeh. Hete kho dawk kaie tami moikapap ao atipouh.

¹¹ Hatdawkvah Pawl teh hote khopui dawk kum touh hoi thapa yung taruk touh ao. Ahnimanaw hah Cathut e lawk a cangkhai.

¹² Hatei, Gallio ni Akhaia ram dawk khobawi lungkângingcalah hoi a tawk nah Judahnaw ni Pawl a taran awh teh lawkcengnae tungkhung hmalah a tâcokhai awh. ¹³ Ahnimouh ni kâlawk hoi kâtaran lah Cathut bawk hane taminaw a pâkhueng telah ati awh.

¹⁴ Pawl ni hai lawk dei hanlah a pahni a ang navah, Gallio ni Judahnaw koevah nangmouh Judahnaw kalan hoeh e lawk, nahoe pawiteh kâdumkâyenna lawk buetbuet touh lah awm pawiteh kai ni na lawk ka ngai han. ¹⁵ Hatei nangmae lawknaw, kâlawnaw, minnaw hoi ka kâkuen e lah awm pawiteh, namamouh roeroe ni na dei awh han. Kai teh hot patet e naw hah ka dei ngai hoeh atipouh teh, ¹⁶ ahnimanaw hah lawkcengnae tungkhung koehoi a pâlei awh. ¹⁷ Hattoteh sinakok ukkung Sosthenes hah a man awh teh, lawkcengnae tungkhung hmalah a hem awh. Hatei Gallio ni hotnaw hah banglahai ngai laipalah ao.

Antiok lah bout a bannae

¹⁸ Pawl teh Kawrin khovah tueng moikasaw ao hnukkhu a hmaunawngghanaw koevah ka dam lah atipouh teh, Siria ram lah long hoi a cei. Ahni hoi Priscilla hoi Aguila haiyah a cei van. Lawk a kam e patetlah Kenkhrea khovah a lû a ngaw. ¹⁹ Hahoi Efisa kho a pha awh navah, hote hmuen koe Priscilla hoi Aguila teh a ceitakhai teh sinakok vah a kâen teh, Judahnaw hoi kamthang lawk a kâpankhai. ²⁰ Taminaw ni ahni teh

hnin kasawlah o hanlah a dei aw h ei, ngai pouh hoeh. ²¹ Cathut ngainae lah awm pawiteh, nangmouh koe hmalah bout ka tho han, ati pouh teh ahnimanaw kut a man hnukkhu Efisa kho hoi long hoi a tâco. ²² Kaisarea kho a pha hnukkhu Jerusalem lah a takhang teh kawhmoun hah kut a man. Haw hoi Antiok kho a cei cathuk.

²³ Pawl teh hote hmuen koe hnin kasawlah ao hnukkhu Galati hoi Frigia ramnaw pueng daw k a kâhlai teh a hnukkâbangnaw a cak sak.

Lawk deikathoum Apollos

²⁴ Hatnavah, Alexandria kho kaawm e Judah tami buet touh Apollos ati aw h e Efisa khovah a tho. Ahni teh lawk dei ka thoum e hoi Cakathoung daw k athakaawm e lah ao. ²⁵ Ahni teh Bawipa e lamthungnaw a panue teh muitha koe lah thao laihoi Jisuh e kamthang hah taminaw koe a cangkhai. Hatei Jawhan e baptisma dueng doeh a panue. ²⁶ Ahni teh sinakok vah taranhawi laihoi a pâpho. Priscilla hoi Aquila ni a lawk dei e a thai roi nah alouklah a hrawi teh Cathut e lawk hah kacaicalah a cangkhai roi.

²⁷ Apollos ni Akhaia ram lah a cei hane a ngai navah a hnukkâbangnaw ni, hote hmuen koe kaawm e a hnukkâbangnaw ni a dawn thai aw h nahanelah, ca a thut pouh aw h. Hawvah a pha toteh Cathut pahren lahoi ka yuem e moikapap a kabawp. ²⁸ Jisuh teh Khrih lah ao tie hah kancengcalah Cakathoung daw k kahawicalah a patue teh Judahnaw hah reprep a yue.

19

Efisa khovah misin taw knae

¹ Kawrin kho Apollos ao navah Pawl teh mon lam hoi Efisa kho a cei. ² A hnukkâbangnaw hoi a kâhmo toteh, nangmouh ni na yuem awh navah, Kathoung Muitha na coe awh toung maw telah a pacei. Ahnimouh ni Kathoung Muitha coe hoi coe hoeh e ka panuek awh hoeh atipouh awh. ³ Hattoteh Pawl niyah, bangpatet e baptisma maw na coe awh vaw, telah let a pacei navah, ahnimouh ni, Jawhan e baptisma doeh ka coe ati awh. ⁴ Pawl ni Jawhan teh amae a hnuklah ka tho hane Bawipa hah yuem awh haw titeh pankângainae baptisma doeh na poe awh. Hottelah a dei navah Jisuh Khrih doeh a dei ngai nah atipouh. ⁵ Ahnimouh ni a yuem awh toteh Jisuh min dawk baptisma a coe awh. ⁶ Pawl ni ahnimouh lathueng kut a toung pouh toteh ahnimouh koe Kathoung Muitha a pha. Hatdawkvah ahnimanaw teh alouke lawknaw a dei awh teh, profet lawk a pâpho awh. ⁷ Ahnimanaw teh abuemplahoi hrahlaikahni touh a pha.

Sinakok vah kamthang lawk a pâpho

⁸ Hathnukkhu Pawl teh thapa yung thum touh thung sinakok vah Cathut uknaeram kamthang hah taranhawi laihoi a pâpho. ⁹ Hatei tami tangawn teh a lungpata awh dawkvah yuem laipalah tamimaya hmalah lamthung pathoe lawk a dei awh dawkvah, a hnukkâbangnaw hah a kaw teh ahnimouh koehoi a tâco teh, Tiranus sengim dawkvah hnintangkuem a cangkhai. ¹⁰ Kum hni touh thung hottelah a kêroe dawkvah

Judah naw, Griknaw hoi Asia ram kaawmnaw pueng ni Bawipa e lawkkatang teh a thai aw h.

Efisa kho camthoumnae a raphoe pouh

¹¹ Cathut ni Pawl kut daw k hoi ka talue e kângairuhnonaw a sak. ¹² A tak daw k e hnica, hoehpawitech a kâyeng e hnica a sin aw h teh, ka dam hoe h e tak daw k a nep aw h navah, ahnimae patawnae a kahma teh muitha kathoutnaw hai a tâco aw h.

¹³ Hatnavah yuengyoe kâva e Judah mip hun, camkathoumnaw ni, muithakathout ni a man e taminaw koevah, Pawl ni a pâpho e Jisuh min lahoi kâ na poe titeh, Jisuh min hah tanouknae lah a hno aw h. ¹⁴ Hottelah ka tet e naw teh Judah tami vaihma bawi Skiva e capa sari touh hah doeh. ¹⁵ Hatnavah muitha kathoutnaw ni, Jisuh hai ka panue, Pawl hai ka panue, nangmanaw teh apinaw maw telah ati hnukkhu, ¹⁶ Hote muitha kathoutnaw ni a man e tami ni, ahnimanaw hah a cu sin teh, a kathuek a kayak daw kvah caici lah hmâtan hoi a yawng aw h. ¹⁷ Efisa kho kaawm e Judahnaw hoi Griknaw ni hote kamthang a thai aw h navah, a taki aw h teh Bawipa Jisuh min hah bari kaawm lah a pholen aw h. ¹⁸ Ka yuem e tami moikapap a tho aw h teh, amamae a tawksak aw h e naw hah a pâpho aw h. ¹⁹ Camkathoumnaw ni hai amamae hnopainaw hoi cauknaw hah tamimaya hmalah a tâcokhai aw h teh, hmai a pau aw h. Hote cauknaw phu to navah ngun tangka thong 50 touh phu a pha. ²⁰ Hettelah hoiyah, Bawipa e lawkkatang teh thaonae hoi a roun g teh tânae a hmu.

Efisa kho ruengrueng ati awh.

²¹ Hathnukkhu Pawl teh Masidonia ram hoi Akhaia ram lahoi Jerusalem cei hanelah Muitha patounnae lahoi lawk a tâtueng teh, Jerusalem ka cei hnukkhu Rom khopui hai ka hmu han a ti. ²² Hatdawkvah ahni kabawmkung Timote hoi Erastas hah Masidonia ram lah a patoun. Ama teh Asia ram vah dongdeng ao.

²³ Hatnavah kamthang lawk kecu dawk ruengrueng ati awh. ²⁴ Bangkong nama tetpawiteh nguntui kahlun e Demetrias teh Atemis cathut napui e bawkimca hlun laihoi nguntui kahlunnaw hanlah tawntanae lah a coung sak. ²⁵ Demetrias ni ama patet e taminaw hah a pâkhueng teh, huikonaw, hete thaw hoi maimouh teh tawnta awh tie teh na panue awh. ²⁶ Hatei, hete Pawl tie niyah, kut hoi sak e teh Cathut nahoeh ati teh Efisa kho e taminaw dueng laipalah Asia ram e tami pueng hai a dumyen teh lam a hmang sak toe. ²⁷ Hete lawk ni maimae min a mathoe sak dueng laipalah ka lentoe e Atemis cathut napui e bawkim hai banglah noutna hanlah awmhoeh toung vaiteh, Asia ram hoi talaivan pueng ni bawk awh e cathut napui e bahu teh a kahma han toe tie ngaihrinae ao telah a dei.

²⁸ Hote lawk hah ahnimouh ni a thai awh navah, a lung thouk a khuek awh teh, Efisanaw e Atemis teh a lentoe telah a hram awh. ²⁹ Hattoteh khobuem ruengrueng ati awh. Tam-inaw niyah Pawl hnukkâbang e Masidonia tami Gaius hoi Aristarkas hah a man awh teh, pawl thungvah vai touh lahoi a kâen awh. ³⁰ Hote

taminaw koe Pawl ni kâen hane a ngai ei a hnukkâbangnaw ni a ngang awh. ³¹ Pawl e a hui, Asia ram e khobawinaw ni hai pawl thung kâen hoeh hanelah a kahei awh.

³² Taminaw teh ruengrueng ati awh dawkvah alouklouk lah a hram awh. Bangpatet ni teh bangdawkmaw kamkhueng a aw tie hai kamceng lah panuek awh hoeh. ³³ Judahnaw ni Alexander hah hmalah a tâco sak awh teh tami tangawn ni a lungkuep awh dawkvah, Alexander ni a kut a kahek teh kamkhuengnaw koe a dei pouh hanelah a kâcai. ³⁴ Hatei ahni teh Judah tami doeh tie a panue awh navah, tami pueng ni, Efisanaw e Atemis teh a lentoe, telah suimilam kahni touh hane lawk suetalah a hram awh.

³⁵ Hathnukkhu khothung e cakathutkung ni kamkhueng e taminaw cing ati sak teh, Efisa taminaw voi Efisa kho teh lentoe Atemis cathut napui e bawkim hoi, kalvan hoi kabawt e meikaphawk hah ka pâkuem e kho lah ao tie hah ka panuek hoeh e tami apimaw kaawm. ³⁶ Het hateh oun thai hoeh e lah ao dawkvah bangcahai pouk laipalah, hrumhram sak laipalah duem o hanelah ao. ³⁷ Bangkongtetpawiteh nangmouh ni na man awh e hete taminaw ni nangmae bawkim na lawm awh hoeh, maimae cathut napui hah pacekpahlek awh hoeh. ³⁸ Hatdawkvah Demetrias hoi nguntui kahlun e naw, nangmouh ni buetbuet touh toe hane awm pawiteh toeim paawng lah ao na yoe. Khobawinaw hai ao dawkvah ama maroi kâhmo na nei. ³⁹ Hatei alouke kong dawk pawiteh kamceng lah kamkhuengnae koe lawk tâtueng hanlah ao.

⁴⁰ Sahnin e hno ka tâcawt e dawkvah kamceng e banghai awmhoeh. Hettelah ruengruengtinae dawkvah maimouh letlang na toe awh pawiteh, kaimouh ni hete kambawngnae dawkvah ka dei thai a mahoeah atipouh teh, ⁴¹ kamkhuengnaw hah koug a kâkayaw sak.

20

Masidonia kho Pawl a pha

¹ Ruengrueng tinae a roum hnukkhu, Pawl ni a hnukkâbangnaw a kaw teh kut a man hnukkhu kadamcalah awm awh titeh Masidonia ram lah a ceitakhai . ² Haw e ram thung kaawm e a hnukkâbangnaw thapoe lawk a dei hnukkhu Grik ram a pha. ³ Haw e ram thung thapa yung thum touh ao hnukkhu, Siria ram lah long hoi cei han a kâcai nah Judahnaw ni arulahoï padim han ati awh toreï teh, Masidonia ram koe lahoï bout ban hane a kâcai. ⁴ Pawl hoi cungtalah Berea tami Pirrhas capa Sopater hoi Thesalon tami Aristarkas Sekandus, Ðerbi tami Gaius hoi Asia tami Timote, Taisikas hoi Trophimus tinaw teh ahni koevah cungtalah a cei awh. ⁵ Hmalah a cei teh Troas kho hoi a ring awh. ⁶ Tonphuenhoehe vaiyei pawï abaw hnukkhu Filippi kho hoi long hoi a tâco teh hnin panga touh a ro hnukkhu Troas kho a pha awh, Hawvah yat touh ao awh.

Utikhas bout a hring

⁷ A yat e apasuek hnin vah vaiyei raen hanelah ahnukkâbangnaw a tho awh teh, cungtalah a kamkhueng awh. A tangtho teh Pawl a

cei hanelah councakoe lah ao toung dawkvah karumsaning totouh a pâpho. ⁸ Kaimouh ka kamkhuengnae imvan hmaiim moikapap a paang awh. ⁹ A min Utikhas tie thoundoun teh hlangaw teng a tahung. Muet a i teh Pawl ni kamthang lawk a dei lahun nah imvan hoi talai pou a bo teh a ro lah a rakhun awh. ¹⁰ Pawl ni a kum teh ahnie a tak dawkvah a tabei teh calumcalum tet awh hanh haw, bangkongtetpawiteh a hringnae kâha pout hoeh rah ati teh, ¹¹ imvan a luen, vaiyei a ca awh teh khodai totouh a pâpho pouh hnukkhu hoi a ceitakhai. ¹² Hote bout kahring e thoundoun ca hah a hrawi awh teh, a lungmawng awh.

Troas kho hoi Miletus kho a pha awh

¹³ Long koe hmaloe ka cei awh teh, Assos kho koehoi Pawl kâcui sak hanelah ka cei awh. Bangkongtetpawiteh, Pawl teh mon lam lahoi cei hanelah a kâcai teh hottelah lawk a thui dawk doeh. ¹⁴ Assos kho dawk kaimouh hoi kâhmo awh toteh long dawk a kâcui van teh Mitilen kho lah ka cei awh. ¹⁵ Haw hoi ka tâco awh teh a tangtho vah Khios tuilum ka pha awh. A tangtho patuen vah Samos ka pha awh teh a tangtho hnin vah Miletus ka pha awh. ¹⁶ Hettelah karang karang cei ngainae teh Asia ram dawk atueng baw sak laipalah Efisa kho ceitakhai hanlah kâcai awh dawk doeh. Bangkongtetpawiteh, coung thai pawiteh pentikos hnin hoehnahlan Jerusalem vah pha hanelah ka ngai awh dawkvah hettelah karang karang cei ngainae doeh.

Efisa kho kacuenaw lawk a thui

¹⁷ Miletus kho a pha hoi Pawl ni Efisa kho lah tami a patoun teh kacuenaw hah a kaw. ¹⁸ Ahnimouh a pha toteh Pawl ni, Asia ram ka pha hnin hoi, nangmae hmalah bangtelamaw ka hring tie na panue awh. ¹⁹ Kai teh kârahnoumnae, mitphi bonae, hoi Judahnaw ni rucut na poenae thungup hoiyah Bawipa e a thaw hah ka tawk. ²⁰ Kai ni nangmouh hanelah hawinae kaawm hane naw hah hnuk kâhnawn laipalah, nangmouh koe ka pâpho teh, taminaw hmalah nakunghai, im touh hnukkhu im touh nakunghai na cangkhai awh teh, ²¹ Cathut hmalah pankângainae hoi maimae Bawipa Jisuh Khrih yuemnae kongnaw hah, Judahnaw hoi Griknaw hah ka cangkhai.

²² Atuteh muitha lamhrawinae lahoi Jerusalem ka cei han, kho thung bangpatet runae maw kâhmo han ka panuek hoeh. ²³ Hat nakunghai runae hoi rektapnae ni sut na ring e hah Kathoung Muitha teh kho tangkuem kai kapanuekkhaikung lah o. ²⁴ Hatei, ka yawng hane kawi hah a pout totouh ka yawng teh, Cathut lungmanae kamthang kahawi kampanghai hanelah, Bawipa Jisuh koehoi ka coe e thaw tawknae hah lunghawi laihoi ka cum thai nahanelah awm pawiteh ka hringnae patenghai ka pasai hoeh.

²⁵ Atuteh Cathut uknaeram kong ka dei nah nangmanaw ni ka mei bout na hmawt a mahoe toe tie ka panue. ²⁶ Hatdawkvah tami pueng e thi hoi kai kamthoung toe tie sahnin vah nangmouh koe ka pâpho. ²⁷ Lung kâounnae awm laipalah Cathut e pouknae pueng teh

nangmouh koe he ka dei toe. ²⁸ Nangmouh teh namahoima nakunghai, tuhunaw pueng nakunghai, kâhruetcuet laihoi khenyawn awh. Bawipa amae a thi hoi a ran e kawhmoun hah nangmouh ni khetyawt sak hanelah, Kathoung Muitha ni nangmouh teh tukhoumkung lah na rawi awh toe. ²⁹ Bangkongtetpawiteh, ka yinhnuk nah, ka huencawn e Asuinaw ni tunaw pahrennae tawn laipalah nangmouh thung a kâen han tie ka panue. ³⁰ Nangmouh thung e a hnukkâbangnaw hai, ama koe lah sawn hanelah, ceipayonnae ka pâpho e tami a tho awh han. ³¹ Hatdawkvah tuehmue awh. Kai ni kum thum touh thung karum khodai tami pueng mitphi hoi na cangkhai e pahnim awh hanh.

³² Hmaunawngghanaw, atu kai ni nangmouh Cathut koe na hnawng awh. Nangmouh na rounng awh nahan, tami kathoungnaw hoi nangmanaw râw poe hanelah ka tet thai e Cathut e a lungmanae dawk nangmouh na hnawng awh. ³³ Kai ni api e sui ngun hnopainaw hai ka nôe hoeh. ³⁴ Hete ka kut hoi kama hoi rei kaawmnaw e pankinae pueng ka tawk tie hah na panue awh toe. ³⁵ Hottelah panki laihoi ka tawk teh, a thakayounnaw hah kabawp kawih lah ao tie hoi, poenae teh dâwnae hlak yawhawinae ao telah Bawipa Jisuh ama ni a dei e lawk hah na pâkuem awh hanelah ao telah a dei.

³⁶ Pawl ni a dei hnukkhu khok a cuengkhuem teh ahnimouh hoi cungtalah a ratoum awh. ³⁷ Abuemlahoi a khuika awh teh Pawl teh a tapam awh teh a paco awh. ³⁸ Ka mei bout na hmawt a mahoe hoi tie Pawl ni a dei e a thai

awh dawkvah lungmathoe laihoi Pawl hah long koe totouh a thak aw.

21

Jerusalem lah ceinae

¹ Ahnimouh koehoi Kos tuilum koelah long hoi pou ka cei aw. A tangtho vah Rhodes ka pha aw teh, haw hoi Patara kho daw ka pha aw. ² Hahoi Phoenicia lah ka cet e long buet touh ka kâcui aw. ³ Saipras tuilum ka hmu aw toteh hote hmuen koehoi avoilah hoi ka cei aw teh Siria lah ka raka aw navah Taire kho ka pha aw. Hawvah long daw e hnonaw ka rasa aw. ⁴ Hawvah a hnukkâbangnaw ka kâhmo aw teh ahnimouh koe hnin sari touh ka o aw. Ahnimouh ni Pawl hah Jerusalem lah a cei hoeh nahan Muitha lahoi a dei pouh aw. ⁵ Ahnimouh koe ka o hnukkhu hoi hot koehoi bout ka kamthaw aw. A yu a canaw abuemlahoi cungtalah kho teng totouh na thak aw. Tuipei teng khokcuengkhuem laihoi ka ratoum aw. ⁶ Hahoi buet touh hoi buet touh kut ka kâman aw hnukkhu kaimouh teh long daw ka luen aw teh ahnimouh hai amamouh im lah a ban aw.

⁷ Hahoi Taire kho hoi Ptolamais kho lah pou ka cei aw teh hawvah hmaunawngghanaw hoi ka kâhmo aw teh hnin touh ka o aw. ⁸ Atangtho bout ka cei aw teh Kaisarea khovah ka pha aw. Hawvah, Jerusalem vah kabawmkung hanlah a rawi aw e tami sari touh daw buet touh lah kaawm e Filip im vah ka luen aw. ⁹ Ahni koe profet lah kaawm e a canu pali touh ao.

¹⁰ Hawvah kasawhnawn lah ka o awh teh Akabus tie profet buet touh Judah ram lahoi a tho. ¹¹ Ahni teh kaimouh koe a tho navah Pawl e taisawm a la pouh teh amae a kutkhok a pâkhi teh, Judahnaw ni hete taisawm katawnkung hah Jerusalem kho hettelah a katek aw h vaiteh Jentelnaw e kut daw k poe lah ao han telah Kathoung Muitha ni a dei telah atipouh.

¹² Hote lawk ka thai aw h nah kaimouh hoi haw kaawmnaw ni Pawl hah Jerusalem lah a cei hoeh nahan ka haw aw h. ¹³ Hatnavah Pawl ni, nangmouh ni na khuika aw h teh, kai lungrei na thaisak aw h! Kai ni Jisuh e a min kecu daw k Jerusalem khovah katek hane dueng laipalah ka due han totouh coungkacoe lah ka o toe telah atipouh. ¹⁴ Kaimouh ni ka haw hla aw h toteh, Cathut a ngainae patetlah lawiseh ka ti aw h teh duem ka o aw h.

¹⁵ Hawvah dongdeng ka o aw h hnukkhu, ka kârasoup aw h teh Jerusalem lah ka cei aw h. ¹⁶ Kaisarea kho hoi a hnukkâbang tangawn hai kaimouh hoi cungtalah a tho aw h teh kaimouh ka luen aw h nahanelah ka rasoun e, apasueke a hnukkâbang lah kaawm e Saipras tamî Manason koe na ceikhai aw h.

Pawl ni Jem a kâhmo

¹⁷ Jerusalem kho ka pha aw h navah hmau-nawngnanaw ni lunghawicalah hoi na dawn aw h. ¹⁸ Atangtho vah Pawl hoi cungtalah Jem koe ka cei aw h teh kacuenaw hoi ao aw h. ¹⁹ Pawl ni ahnimanaw kut a man aw h teh a thaw taw k e lahoi Jentelnaw koe Cathut ni thaw a taw knae

kongnaw hah buet touh hnukkhu buet touh a dei pouh.

²⁰ Ahnimouh ni a thai awh navah Cathut a pholen awh. Hahoi ahnimouh ni Pawl koe, ka nawnggha, na panue e patetlah Judahnaw touklek thai hoe e, kâlawk dawk a lungkatangnaw ni a yuem awh. ²¹ Jentelnaw thung kaawm e Judah tami pueng hah Mosi e kâlawk pahnawt awh nateh vuensoma laipalah hoi Judah phung tarawi awh han loe telah na cangkhai ti teh kamthang sut a dei awh toe. ²² Nang na tho e hai be a panue a han doeh. Hatdawkvah bang ne sak awh han. ²³ Hatdawkvah, kaimouh ni na dei pouh e patetlah sak lah a. Hivah lawkkamnae ka sak e tami pali touh ao. ²⁴ Ahnimouh hoi reirei cet nateh thOUNGNAE phung lam sak kawi hah sak awh nateh, lû luengpalueng lah ngawnae aphu hah rawng pouh. Hottelah na sak pawiteh tami pueng ni na kong a dei awh e hah a tang nahoeH tet awh vaiteh, nang teh Mosi e kâlawk ka tarawi e doeh tie hah tami pueng ni a panue awh han. ²⁵ Jentelnaw ka yuem e naw kong dawK kaimouh ni ca na patawn awh toe. Meikaphawk bawKnae rawcanaw hah cat awh hanh, a thi cat awh hanh, lahuen kara e moi pueng cat awh hanh, kamsoumhoehE napui tongpa yonnae sak a hanh tie lawk tâtuengnae hah na patawn awh toe.

Bawkim dawK ruengrueng ati awh

²⁶ Hattoteh Pawl ni hote tami pali touh hah a ceikhai teh a tangtho vah thOUNGNAE phunglam hah a sak khai hnukkhu, bawkim thung a kâen awh teh thOUNG nahane atueng apout

hoehroukrak atueng na yit touh maw a ro han, hote atueng a baw hnukkhu thuengnae lengkaleng sak hane hah vaihma koe a dei pouh awh.

²⁷ Hnin sari hnin a kuep tawmlei torei teh, Asia ram lahoi ka tho e Judah taminaw ni Pawl hah bawkim thung a hmu awh. Tami pueng a puen awh teh Pawl hah a man awh. ²⁸ Isarel taminaw na kabawm a haw! Hete tami na-hoehmaw, Isarel taminaw kâtaran sak hanelah, Mosi e kâlawk pahnawt hane hoi hete hmuen pahnawt hanelah kacangkhaikung lah meng ao. Hete bawkim thungvah Grik taminaw bout a kâenkhai teh a kamhnawng sak. ²⁹ Hettelah a dei e heh Efisa tami Trophimus hah Pawl hoi kho thungvah a hmu awh teh Pawl ni hote tami hah bawkim thung a kâenkhai telah a pouk a dawk doeh.

³⁰ Hatnavah khothung ruengrueng ati awh. Pawl hah a man awh teh bawkim thung hoi a tâcokhai awh. Karang poung lah takhangnaw koug a khan awh. ³¹ Taminaw ni Pawl hah thei hane a panki awh navah, Jerusalem kho teh ruengrueng ati awh telah ransa 1,000 touk ka uk e Rom ransabawi ni kamthang a thai navah, ³² vai touh lahoi Rom ransa bawinaw hoi ransanaw teh yawng laihoi a tho awh. Ransabawi hoi ransanaw a tho awh e a hmu awh navah, Pawl ka hem e naw a kâhat awh.

³³ Ransabawi ni Pawl a man teh sumbawtaru-inaw kahni touh hoi pâkhit awh atipouh. Hahoi a kamthaw awh teh hete tami heh apimaw, bangmaw a sak, telah a pacei awh. ³⁴ Taminaw ni alouklouk lah a hram awh. Ransabawi ni

kamcenglah a panue thai hoeh dawkvah, Pawl hah ransaim imthung lah kâenkhai hanelah kâ a poe. ³⁵ Pawl teh khalailu a pha navah taminaw hoehoe a lungkhuek aw h dawkvah, Pawl hah a kâkayawt aw h. ³⁶ Bangkoktetpawiteh, Pawl hah thet aw h, thet aw h telah hoehoe a hram aw h daw k doeh.

Rangpui hmalah Pawl ni lawk a dei

³⁷ Ransaim thungvah Pawl a kâenkhai tawmlei Pawl ni bawipa, nang hoi lawk kâpan thai han maw telah atipouh. Ransabawi ni Grik lawk na panue maw atipouh. ³⁸ Hat pawiteh nang teh, hnuk lae tami thong pali touh kahrawngum ka cetkhai e dingca bawi Izip tami nahoehmaw telah a pacei. ³⁹ Pawl ni, Kai teh Judah phun, Cilicia ram thung kamthang e kho Tarshish hoi ka tho e tami doeh. Taminaw koe lawk na dei sak haw atipouh.

⁴⁰ Ransabawi ni hai lawk a dei sak. Pawl teh khalai daw k a kangdue teh a kut a nâ pouh teh, taminaw hah sairasuep lah ao aw h. Hatnavah ahni ni Hebru lawk lahoi lawk a dei.

22

¹ Hmaunawngaha hoi a nupanaw, atu kai ni ka dei e lawk kahawicalah thai aw h haw telah a dei navah, ² Hebru lawk hoi a dei e a thai aw h navah hoe cing ati aw h. ³ Pawl ni kai teh Cilicia ram Tarshish kho daw k ka khe e, Judah tami buet touh lah ka o. Hatei hete kho daw k ka roun g teh, Gamaliel kut rahim vah mintoenaw e phung lawk hah kacaicalah ka kamtu niteh, sahnin nangmouh pueng Cathut hanelah na lung a tang

awh e patetlah kai hai ka lung a tang van. ⁴ Kai ni hete lam ka dawn e napui tongpa tet hoeh, ka pâkhi teh thongim thung ka pakhum teh, a due han ditouh ouk ka rektap toe. ⁵ Hot patetlah vaihma kacue koehoi kamtawng teh, kacuenaw pueng teh, kai koe lah koung na kampangkhai aw. Kai ni hai ahnimanaw koe ca ka la teh, Damaskas kho e kaawm e, hote phung lah kâen e naw hah man vaiteh rektap hanelah Jerusalem hoi Damaskas lah ka cei.

Pawl ni a kampangkhai

⁶ Hatei Damaskas kho teng ka pha nah, kanîthun e tueng navah, kalvan hoi puenghoi ka ang e ni kai pet na kalup lah pheng a tue. ⁷ Hahoi kai teh talai ka rawp teh, Sawl Sawl nang ni bangdawk maw, kai hah na rektap vaw telah na dei pouh e lawk ka thai. ⁸ Kai ni yah, Bawipa, nang teh apimaw telah ka pacei torei teh, kai teh nang ni na rektap e Nazareth kho e Jisuh doeh, telah na ti pouh. ⁹ Kai hoi rei kaawm e naw ni angnae a hmu aw hiteh kai hanlah a dei e lawk teh thai aw hiteh. ¹⁰ Kai ni hai Bawipa, bang mouh ka sak han ka ti pouh navah, Bawipa ni thaw nateh Damaskas kho cet haw. Hawvah na sak hane kai ni na dei pouh han na ti pouh. ¹¹ Kai teh hote angnae bahu ni na tue torei teh ka mit a dawn toung dawkvah, rei kaawm e naw ni Damaskas kho na hrawi aw. ¹² Hatnavah Cathut ka bari e Damaskas kho e min kamthang e Judah tami Ananias ni, ¹³ kai koe a tho teh ka teng a kangdue. Ka nawngaha Sawl na mit ang seh ati navah ka mit a ang. ¹⁴ Ahni ni mintoenaw e Cathut

ngainae panue sak hanlah thoseh, tamikalan hmu thai nahane thoseh, ahnie lawk dei pouh hane thoseh, nang teh sut na hmoun toe. ¹⁵ Nang teh na hmu e hoi na thai e pueng tami pueng e hmalah kapanuekkhaikung lah na o han a ti. ¹⁶ Bangkokmaw atu rap na o. Thaw nateh Bawipa min kaw haw. Baptisma coe haw, na yonnae pâsu haw na ti pouh.

¹⁷ Hathnukkhu Jerusalem vah bout ka tho teh, bawkim thung ka ratoum lahun nah ka pouknae a mawm teh, Bawipa hah ka hmu. ¹⁸ Bawipa ni kai hoi kâkuen e lawkpanuesaknae hah taminaw ni a dâw awh hoeh han dawkvah, Jerusalem vah rap awm laipalah karang tâcawt leih na ti pouh. ¹⁹ Kai nihaiyah, Bawipa Sinakok buet touh hoi buet touh koe ka cei teh nang na kayuemnaw ka theituk teh thawng ka pabo e a panue awh. ²⁰ Nang kampangkhai lah kaawm e Stiven hah a thei awh navah kai kama roeroe raw hnâbo lahoi ka sak teh, kathetnaw e khohna ka ring pouh kung lah ka o. ²¹ Hateiteh, Bawipa ni, Cet leih, ramhlanae koe kaawm e Jentelnaw koe kai ni na patoun han telah kai koe na ti pouh, telah a dei.

Pawl teh Rom tami doeh

²² Het totouh a dei e a thai pouh teh, hot patet e tami hah talai van hring hanelah kamcu hoeh, thet awh titeh lawk kacaipounglah a hram awh.

²³ Taminaw niyah hottelah a hramki awh teh, a khohnanaw hah a kahek awh teh, vaiphu kahlun lah a kahei awh ²⁴ Rom ransabawi kalen ni taminaw hah a kaw sak teh, ransaim thung kâen sak hanlah kâ a poe. Taminaw pueng

ni bangkongmaw ahni hah telah a taran awh teh, telah a hram awh tie panue hane a ngai dawkvah, ruitaboung hoi hem vaiteh akungkhei hanelah kê a poe. ²⁵ Ahni teh phaivuenrui hoi a katek awh hnukkhu, a teng kangdout e ransabawi hanlah nangmouh ni Rom tami buet touh heh akungkhei laipalah hemnae kê na tawn a maw telah a pacei.

²⁶ Ransabawi ni hote lawk hah a thai toteh ransabawi kalen koe a cei teh, nang bangtelamaw ti han. Ahni ni kai teh Rom tami doeh na ti pouh. ²⁷ Hahoi ransabawi kalen e teh Pawl koe a tho teh, kai koe na dei pouh haw, nang teh Rom tami na maw telah a pacei toteh ue a atipouh. ²⁸ Ransabawi kalen e ni kai teh, Rom tami lah o nahanelah tangka moikapap poe laihoi doeh ka o thai atipouh navah, Pawl ni, kai teh Rom tami lah ka khe atipouh.

²⁹ Hatdawkvah ahni akungkhei hane naw teh ahni koehoi karanglah a kâkhoe awh. Ransabawi kalen ni hai Pawl heh Rom tami lah ao e hah a panue toteh a pâkhi e hah a taki.

Pawl lawkcengnae hmalah a pha

³⁰ Atangtho vah ransabawi teh Judahnaw ni yon a pen awh e hah kancengcairalah a panue han a ngai dawkvah, Pawl kateknae rathap hanelah kê a poe. Vaihma kalennaw hoi lawkcengkungnaw pueng a kamkhueng sak. Pawl hah a kaw awh teh, ahnimae hmalah a kangdue sak awh.

23

¹ Pawl ni sanhedrin lawkcengkungnaw hah takuetsuet a khet teh, hmaunawngghanaw, kai teh atu totouh ka tawksak e dawk kahawi e thoehawi panuenae lungthin hoi Cathut hmalah a thoung, ati pouh. ² Hatnavah vaihma kacue Ananias ni a teng ka kangdout e taminaw koe, Pawl e a pahni tambei pouh aw h telah kâ a poe. ³ Pawl nihai, ka pangaw hluk e tangkom, Cathut ni nama na hem han atipouh. Nang ni kai heh tahung laihoi kâlawk patetlah lawk na ceng nahlangva vah, kâlawk na tapoe teh kai hem hanelah kâ na poe maw, atipouh.

⁴ Ateng ka kangdout e naw nihai, nang ni Cathut e vaihma kacue na dudam, ati pouh aw h. ⁵ Pawl nihai, hmaunawngghanaw, ahni hah vaihma kacue tie ka panuek hoeh, Cakathoung ni na miphun ka ukkungnaw na pathoe mahoe h telah a dei, atipouh.

⁶ Pawl ni haw kaawm e tami atangawn teh Sadusinaw, alouknaw teh Farasinaw tie a panue dawkvah, hmaunawngghanaw kai teh Farasi buet touh lah ka o. Farasi e a capa lahai ka o. Kai teh kadoutnaw boutthawnae ngaihawinae kecu daw k hoi akungkhei e lah ka o telah sanhedrin lawkcengnae hmalah hram laihoi a dei. ⁷ Hottelah Pawl ni a dei torei teh, Farasinaw hoi Sadusinaw hai lawk apap aw h teh, kahni touh lah a kâkapek aw h. ⁸ Bangkongtetpawiteh, Sadusinaw ni boutthawnae awmhoeh, kalvan-tami awmhoeh, muitha awmhoeh telah ati aw h. Farasinaw ni teh hotnaw koug ao telah a yuem aw h.

⁹ Hahoi, hoe a hram awh teh Farasinaw koe e cakathutkungnaw bangpatet ni a kangdue awh teh, ahni koe a yonnae tica hai ka hmawt awh hoeh, Muitha nahoe pawiteh, kalvantami buetbuet touh ni a dei pouh thai, telah a oun awh. ¹⁰ Hoe kâounnae ao dawkvah ransabawi ni, Pawl hah vekrasen lah sawn a langvaih ati dawkvah, ransanaw koe Pawl hah amamae ransaim imthung lah a ceikhai hane kâ a poe.

Pawl thei hanelah arulah a kâcai awh

¹¹ Hatnae tangmin lah Pawl koe Bawipa a kangdue teh, lakueng hanh, Jerusalem vah kaie ka kong na kampangkhai e patetlah, Rom kho hai na kampangkhai han atipouh. ¹² Khodai toteh Judahnaw ni kho a khan awh teh, Pawl thei hoe roukrak banghai canei hoeh hanelah thoe a kâbo awh. ¹³ Hottelah arulah ka kâdei e naw, abuemlah tami 40 touh hlai a pha awh. ¹⁴ Ahnimouh ni vaihma bawinaw hoi kacuenaw koe a cei awh teh, kaimouh ni Pawl ka thei awh hoeh roukrak banghai ka cat a mahoeh, telah thoe ka kâbo awh toe. ¹⁵ Hatdawkvah nangmouh hoi sanhedrin lawkcengkungnaw ni ahnie a kong kahawicalah pacei han na ngai awh e patetlah ka sak vaiteh nangmouh koe Pawl a hrawi awh thai nahan Rom ransabawi koe thaisak awh. Hi a pha hoehnahlan thei hanlah coungkacoelah ka o awh han, atipouh.

¹⁶ Hote kho a khangnae hah Pawl e tawncanu e a capa ni a thai navah thongim thung a kâen teh Pawl koe a dei pouh. ¹⁷ Hatnavah Pawl ni ransabawi buet touh a kaw teh, ransabawi koevah hete nawsai ni lawk dei hane a tawn dawkvah, ahni hah ransabawi kalen koe cetkhai

haw atipouh. ¹⁸ Ransabawi ni a ceikhai teh ransabawi kalen koe a thokhai. Thongkabawt e Pawl ni, kai hah na kaw teh, hete nawsai ni nang koe hrawi hanelah a kâhei. Ahni ni nang koe lawk dei hane ao atipouh.

¹⁹ Ransabawi ni hote nawsai e kut a kuet pouh teh, aloukcalah a kaw teh, kai koe na dei hane lawk teh bangmaw atipouh. ²⁰ Hote nawsai ni, Judahnaw ni Pawl hah, hoe kamceng lah pacei hane boiboe lah a kâsak awh teh, tangtho vah sanhedrin lawkcengnae koe kaw hanelah nang koe kâhei hanelah a kâcai awh. ²¹ Hatei ahnimae lawk tang pouh hanh. Bangkongtetpawiteh ahnimouh thung dawk tami 40 touh hlai ni arulah hoi Pawl hah a pawp awh. Pawl ka thei awh hoehroukrak ka catnet a mahoe h ati awh teh, thoe a kâbo awh. Atu patenghai coungkacoe lah ao awh teh, bawipa, nange lawk doeh a ring awh toe atipouh.

²² Ransabawi ni, hete kongnaw kai koe na dei e heh api koehai dei pouh hanh lah atipouh teh hote nawsai hah bout a ban sak.

Pawl hah karum vah Kaisarea kho a thak awh

²³ Hathnukkhu, ransabawi kalen e ni ransabawi kahni touh a kaw teh, Kaisarea cei hanelah ransa cumhni touh sut kârakueng awh. Hahoi marangransanaw 70 touh, tahroe ka patuem thai e cumhni touh hai kârakuengkhai awh nateh, atu tangmin suimilam tako nah kamthaw hanlah sut kârakueng awh. ²⁴ Pawl kâcui nahanelah marang sut hmoun pouh awh. Khobawi Felik koe kahawicalah phatkhai awh

telah lawk a thui. ²⁵ Hathnukkhu ransabawi ni ca a thut teh telah a patawn.

²⁶ Klaudias Lisias ni khobawi Felik koevah ca na patawn. Nang koevah hnâroumnae awmseh.

²⁷ Judahnaw ni hete tami heh a man awh teh thei han toe ati awh navah, ahni teh Rom tami doeh tie ka panue toteh ransanaw hoi ka rungngang awh. ²⁸ Yon a hnei awh e hah bangne tie panue han ka ngai dawkvah, sanhedrin lawkcengnae hmalah ka kaw navah, ²⁹ ahni teh amamae kâlawk hoi kâkuen e kamcan hoi yon a pen awh teh, duekhai kawi hoehpawitech, thongim kamungkhai kawi yonnae a tawn tie ka hmawt hoeh. ³⁰ Hatei, Judah tami tangawn ni ahni thei hanelah a kâcai awh tie ka thai dawkvah nang koe karanglah ka thak. Yon kapen e naw hai nang na hmalah a dei awh nahanelah kâ ka poe toe.

³¹ Hat toteh, ransabawi ni kâ a poe e patetlah Pawl hah Antipatris kho totouh karum vah a thak awh. ³² Atangtho teh marangransanaw ni pou a ceikhai awh. Alouknaw teh a ban awh.

³³ Kaisarea totouh a ceikhai awh teh, khobawi koe, ca a poe awh teh, Pawl hai ama kut dawak a poe awh. ³⁴ Khobawi ni ca a touk teh Pawl teh nâ ram e maw telah a pacei. Cilicia dawak e doeh tie a panue hoi teh, ³⁵ na katoekungnaw a tho torei vah, nange lai teh na ceng pouh han telah a titech, Pawl hah Herod siangpahrang im vah khoup ring awh telah ransanaw kâ a poe.

24

Pawl yon a pen awh

¹ Hnin panga touh aloum hnukkhu vaihma kacue Anias teh kacuenaw hoi laicei Tertullas tihoi Kaisarea kho lah a cathuk awh. Hahoi, laicei ni ram kaukung koevah Pawl teh yon a pen awh toe. ² Pawl a kaw awh teh, Tertullas niyah Felik koevah Pawl e kong teh hettelah dei han a kamtawng. Nangmouh rahim vah tueng moikasaw karoumcalah ka o awh teh, na khokhangnae lahoi hete miphunnaw a rounng awh. ³ Hete thaw tawknae heh kho tangkuem lunghawi laihoi ka tawk awh. ⁴ Hatdawkvah, kasawlah kai ni na tarawk hoeh nahanelah, pahren lahoi kaie lawk ka dei e hah na thai pouh haw.

⁵ Kamcan dueng ka sak e hete tami heh talaivan pueng dawc kaawm e Judahnaw koevah lawkpungnae ao nahanlah tha ka poe e lah ao teh, Nazareth bawknae dawc darkhing ka hem e kahrawikung buet touh lah ao. ⁶ Ahni teh bawkim hai khet kamcu hoeh lah sak hane a panki dawkvah, kaimouh ni ahni teh ka man awh. Hathnukkhu, ahni teh kamamae kâlawk patetlah lawkceng han ka ti awh navah, ⁷ ransabawi Lisias a tho teh kaimae kut dawc hoi na lawp awh teh, ⁸ ahni katoenaw hai nang koe tho hanelah kâ a poe. Hete hnonaw abuemlahoi kâkuen lah nama roeroe ni lawk na ceng pawiteh ahnie lathueng kaimanaw ni yon kapen awh e pueng hah na panue han doeh telah atipouh. ⁹ Judahnaw ni hai hate lawknaw teh atang doeh ati awh teh hnâ rip a bo awh.

Felik hmalah Pawl ni lawk a dei

¹⁰ Hahoi ram ukkung ni Pawl hah lawk dei van nahanlah a kut a dâw pouh. Pawl ni hete miphunnaw heh kum moikasaw thung lawkcengkung lah na o tie ka panue dawkvah lunghawi laihoi nang koe lawk ka dei vai.

¹¹ Jerusalem vah Cathut bawk hanelah ka ceinae heh hnin hlaikahni touh hloi phat hoeh rah tie na pancepakaw pawiteh na panue han doeh.

¹² Kai ni bawkim dawk thoseh, sinakok dawk thoseh, khothung thoseh, lawk kâounnae, tami ruengruengti saknae ka sak hoeh tie hah hetnaw ni a panue awh.

¹³ Atuvah hetnaw ni yon na pen awh e heh ahnimouh ni kapanuekkhaikung tawn awh hoeh.

¹⁴ Hatei, bu louk ati awh e lamthung patetlah mintoenaw e Cathut doeh ka bawk tie nange hmalah ka kampangkhai. Kai teh kâlawnaw dawk a thut e hoi, profet cauknaw dawk a thut e pueng hai ka yuem teh,

¹⁵ ahnimouh ni a ngaihawi awh e patetlah tami kalannaw hoi tamikalan hoeh e naw hai a to hmalah bout a thaw awh han tie hah ka ngaihawi. ¹⁶ Hatdawkvah, kai teh Cathut hmalah hoi tami hmalah yon toun han kaawm hoeh e thoehawi panuenae kapek thai hanlah ouk ka panki.

¹⁷ Atu kum moi asaw hnukkhu, ka miphunnaw koe poehnonaw poe hane hoi thuengnae sak hanelah kai teh ka tho.

¹⁸ Bawkim dawk thoungnae ka coe tangcoung e kai hah ahnimouh ni na hmu awh navah tami kamkhueng e awmhoeh, ruengruengtinae banghai awmhoeh.

¹⁹ Hatei Asia ram hoi ka tho e Judahnaw ao awh. Ahnimouh ni kai lathueng yon pen hane tawn

awh pawiteh, bawipa, na hmalah amamouh roeroe a tho awa vaiteh na pen awa hanlah ao. ²⁰ Nahoea pawiteh, sanhedrin lawkcengnae hmalah ka kangdue lahun nah bang yonnae maw kai dawk a hmu awa tie hah atu hi kaawm e naw ni roeroe dei awa naseh. ²¹ Kai teh ahnimae hmalah ka kangdue teh, kadout tangcoungnaw boutthaw hringnae hoi kâkuen lah nangmae hmalah akungkhei e lah ka o tie lawk buet touh doeh ka hramkhai telah a dei.

Lawk tâtueng hane a tahruet awa

²² Felik ni hote konglamnaw hah kamcengcalah a panue dawkvah, ransabawi Lisias a tho torei nangmae lai teh akung na khei pouh han a titeh a tahruet pouh. ²³ Pawl hah khik paung laipalah ring awa. A huikonaw ni a khetyawt awa e hah ngang awa hanh telah ransabawi koe kâ a poe. ²⁴ A hnin youn touh ao hnukkhu Felik bawi teh Judah napui a yu Drusilla hoi a tho rawi. Pawl hah a kaw teh Khrih Jisuh thung yuemnae kong a dei e hah a thai roi. ²⁵ Hatei, Pawl ni a dei e lawk teh lanna, mahoima kâcakuepnae hoi ka tho hane lawkcengnae a dei navah, Felik bawi ni a taki teh la ban ei lawih, a to hmalah atueng ao torei bout na kaw han telah atipouh. ²⁶ Hatnavah, Pawl ni tangka na poe han doeh telah Felik bawi ni a ngaihaw dawkvah, atuhoitu a kaw teh lawk a kâpankhai.

²⁷ Kum hnin touh ao hnukkhu hoi Felik bawi tahungnae hmuen koe Porsia Festus ni a yueng lah a tahung. Felik bawi ni Judahnaw lunghawi sak hane a ngai dawkvah Pawl hah thongim sut a paung.

25

Sizar hmalah Pawl a kamthaw

¹ Festus siangpahrang teh, hote ram dawḁ a pha teh hnin thum touh ao hnukkhu Kaisarea khopui hoi Jerusalem kho lah a luen takhang.

² Hahoi vaihma kacue hoi Judahnaw thung dawḁ e a lungkahanaw ni Pawl teh a toe awḁ.

³ Ahnimouh ni kaimouh na pahrennae lah, Pawl hah Jerusalem lah na thak pouh loe telah a kâhei awḁ. Bangkongtetpawiteh, Pawl hah lam vah pawp vaiteh thei awḁ han telah sut a kâcai awḁ dawḁ doeh. ⁴ Hatnavah Festus siangpahrang ni Pawl hateh, Kaisarea khovah thongim thung ao. Hote kho dawḁ nâsittouh o hoehnahlan, kama roeroe ka cei han. ⁵ Hatdawkvah nangmouh thung dawḁ, kâtawnnae ka tawn e taminaw hah kai koe kâbang awḁ nateh, ahni yon pen hane awm pawiteh pen awḁ atipouh. ⁶ Hahoi hnin taroe, hnin hra touh ao hnukkhu vah Kaisarea kho a cei teh, lawkcengnae tungkhung dawḁ a tahung teh Pawl hah kaw hanelah kâ a poe.

⁷ Pawl a tho torei teh Jerusalem lahoi ka tho e Judahnaw ni Pawl hah khik a ven awḁ. Yon a pen awḁ e pueng a tang e buet touh hai awmhoeh. ⁸ Pawl ni vah Judah phung thoseh, bawkim thoseh, Sizar siangpahrang thoseh, ka payon hoeh telah a pathung.

⁹ Festus siangpahrang ni Judahnaw hah tang sak a ngai dawkvah Pawl hanelah, nang heh Jerusalem cei vaiteh kaie hmalah hete lai heh akungkhei hane na ngai maw telah a pacei.

¹⁰ Hatei Pawl ni kai heh Sizar siangpahrang

e lawkcengnae tungkhung hmalah ka kangdue dawkvah, hote hmuen koe kai heh akung na khei pawiteh a kamcu doeh. Nang ni kacailah na panue e patetlah Judahnaw koe yonnae khoeroe ka sak hoeh. ¹¹ Koe ka payon boilah duekhai kawi yonnae buetbuet touh koe ka sak pawiteh, due hane kangek hoeh. Hateiteh ahnimouh ni yonpen awh e naw heh buet touh hai tueng hoehpawiteh apinihai ahnimae kut daw k na phat sak mahoe. Sizar siangpahrang koe doeh nganga ka cei han atipouh.

¹² Hattoteh Festus siangpahrang teh thaw rei ka taw k huinaw hoi a kâpan awh teh, nang teh Sizar siangpahrang koe nganga ka cei han na ti dawkvah Siangpahrang Sizar koe na cei han atipouh awh.

Agrippa hoi a yu Bernike teh Festus koe a pai roi

¹³ Hathnukkhu hnin youn touh ao hoiyah Agrippa siangpahrang hoi a yu Bernike teh, Festus hoi kâhmo hanelah, Kaisarea kho a tho roi. ¹⁴ Hnin hni, hnin thum ao roi hoiyah, Festus ni Pawl e lai hah siangpahrang koe hettelah be a dei pouh. Hivah Felik ni thongim a pabo e tami buet touh ao. ¹⁵ Jerusalem ka pha navah, vaihma bawinaw hoi Judah kacuenaw ni ahni hah a toe awh teh rek hanelah a kâhei awh. ¹⁶ Hatei, yon pen lah kaawm e tami buet touh heh, yon kapenkung hoi minhmai kâhmo teh yon kâpen e hoi kâkuen lah, bout pathungnae ao hoehnahlan ahni hah alouklah thak pawiteh Romnaw e phung nahoe telah Judahnaw koe ka dei pouh.

17 Hatdawkvah, ahnimouh teh hete khopui dawk a pha awh toteh, pouk laipalah atangtho vah lawkcengnae tungkhung dawk ka tahung teh, ahni hah kaw hanlah kâ ka poe. 18 Pawl yon ka pen e naw a kangdue awh toteh, ka pouk e patetlah kathoute yonnae hah pen awh hoeh. 19 Ahnimae kamcan teh amamae phung lawk hoi ka kâkuen e hoi, yo kadout tangcoung e Jisuh teh bout a hring telah Pawl ni a dei e patetnaw hah doeh. 20 Kai teh het patetlah e kâounkhai e naw heh ka pouk panuek lounglang hoeh dawkvah, Pawl hah Jerusalem vah cei vaiteh hawvah, hete lai heh akungkhei hanelah na ngai ou telah ka pacei. 21 Hatei Pawl ni siangpahrang ni lawkceng e totouh na hrueng awh ei telah a kâhei dawkvah, Sizar Siangpahrang koe thak hoehroukrak paung hanelah kâ ka poe toe telah a dei. 22 Agrippa bawi ni Festus bawi hanlah kama roeroe ni a lawk thai han ka ngai atipouh teh Festus ni tangtho to thai lawih atipouh.

Agrippa hmalah Pawl a pha

23 A tangtho vah Agrippa siangpahrang hoi a yu Bernike teh puenghoi a kamthoup teh, ransa bawinaw, hote khothung e alawkpui lah kaawm e taminaw hoi rei a tho awh teh, impui thung a kâen awh. Hatnavah Festus siangpahrang ni kâ a poe teh Pawl hah a hrawi pouh awh. 24 Festus siangpahrang ni, Agrippa siangpahrang hoi hie kaawm tongpanaw, nangmouh ni na hmu awh e hete tami hoi kâkuen lah, Judahnaw pueng niyah, hete tami heh hring sak kawih nahoe telah a hramki awh teh, Jerusalem kho thung

hai thoseh, hi khothung hai thoseh, kai koe a kâhei awh. ²⁵ Hateiteh, ahni ni duekhai kawi bang buet touh boehai sak hoeh tie hah ka panue. Hatei, ama ni Sizar bawi koe nganga ka cei han ati dawkvah, hawvah thak hanelah ka kâcai toe. ²⁶ Ahnie a kong teh thut vaiteh siangpahrang nang koe poe hanelah kamceng e a kong buet touh boehai yah kai dawkvah awmhoeh. Hatdawkvah yon pennae buetbuet touh ka thut hane ao nahanelah, nang ni ahni hah akungkhei thai nahan nang na hmalah ka tâcokhai. ²⁷ Bangkongtetpawiteh, thongkabawt e tami buet touh heh a yonnae panuek laipalah patoun pawiteh kamcu mahoeh atipouh.

26

Agrippa hmalah Pawl lawk a dei

¹ Hattoteh Agrippa ni Pawl hanelah, nama e kong nama ni na dei thai toe atipouh. ² Hatdawkvah Pawl ni a kut a dâw teh, Agrippa siangpahrang, Judahnaw niyah kai yon na pen awh e naw hah sahnin nang na hmalah dei nahane atueng ka hmu e heh yawhawinae buet touh lah ka pouk. ³ Bangkongtetpawiteh siangpahrang nang teh, Judahnaw e singyoe hoi kamcan pueng na panue dawk doeh. Hatdawkvah pahren lahoi ka dei e lawk heh lungsaw lahoi na thai pouh haw telah ka kâhei.

⁴ Kai teh ka miphunaw koehai thoseh, Jerusalem kho thung hai thoseh, ka nawca hoiyah bangtelamaw kho ka sak tie hah Judahnaw ni koug a panue awh. ⁵ Ahnimouh ni

kanawca hoi na panue aw h dawkvah, kai teh kamamae phunglawk dawkvah kacingpounge Farasi buet touh lah ka o tie teh hi kaawm e naw ni dei ngai pawiteh a dei thai aw h. ⁶ Atuvah kai teh mintoenaw koe Cathut ni poe lah kaawm e lawkkam ngaihawinae kecu daw k lawk na ceng aw h. ⁷ Kaimae mip hun hlaikahni touh ni, karum khodai thahmei laihoi Cathut a baw k aw h teh, hote lawkkam patetlah coe hane a ngai hawi aw h. Siangpahrang, kai teh hete ngaihawinae daw k doeh Judahnaw ni yon na pen aw h. ⁸ Ka dout tangcoung e taminaw teh Cathut ni a thaw sak han tie hah yuem hanlah aw mhoe h telah nangmouh ni teh khuet na ti a vaw.

⁹ Atangcalah kai roeroe haiyah Nazareth tami Jisuh min hah taran han telah doeh ka pouk van teh Jerusalem vah hottelah doeh ka kâroe van. ¹⁰ Kai teh vaihma bawinaw koehoi kâtawnnae ka hmu teh, tami kathoung moikapap hah thongim thung ka paung teh, ahnimouh thei aw h nahai ka lungkuepkhai van. ¹¹ Sinakok tangkuem hai ahnimanaw hah atuhoitu runae ka poe teh, Cathut dudamnae lawk ngangngang ka dei sak. Hothloilah ahnimouh koe ka lungkhuek teh kho louk lah totouh ka pâlei teh ouk ka rektap.

Pawl lung kâthungnae hoi thaw poenae

¹² Hottelah hoiyah, ahnimouh rektap hanelah vaihma bawinaw ni kâtawnnae na poe e lahoi Damaskas kho lah ka cei. ¹³ Kanîthun vah lam daw k kanî angnae hlak ka ang e kalvan hoi e ni kai hoi ka huinaw abuemlae tengpam pueng koe

pheng a tue e hah ka hmu. ¹⁴ Kaimouh abuemlahoi talai lah koung ka rawp awh teh, Hebru lawk lahoi Sawl, Sawl bangkong kai na rektap. Sâw na pathui hane teh a pataw kaima, telah a dei e ka thai. ¹⁵ Hatnavah, kai ni Bawipa nang teh apimaw telah ka pacei navah Bawipa ni, kai teh nang ni na rektap e Jisuh doeh telah ati. ¹⁶ Thaw nateh na khok hoi kangdout leih. Nang koe ka kamnue ngainae teh Kai koe na hmu e naw hoi, bout na hmu hane naw hah kampangkhai hanelah nang teh na rawi toe. ¹⁷ Kai ni Judah miphunnaw e kut dawkhoi thoseh, Jentelnaw e kut dawkhoi hai thoseh, nang teh na rungngang han. Ahnimouh koe nang teh na patoun toe. ¹⁸ Hethateh, ahnimae mit na ang sak vaiteh ahnimouh teh hmonae um hoi angnae koe lah na rasa vaiteh, Setan kâtawnnae thung hoi Cathut koe lah kâthungsak vaiteh, ahnimouh ni Kai na yuem e lahoi yon ngaithoumnae a coe awh vaiteh, thounsaknae ka coe e naw thungvah, a kâthum awh thai nahane doeh atipouh.

¹⁹ Hatdawkvah, Agrippa siangpahrang kai ni kalvanlae vision hah ka ek thai hoeh. ²⁰ Ahmaloe poung lah Damaskas kho kaawm e naw, hath-nukkhu Jerusalem kho kaawm e naw hoi Judah ram dawkhoo kaawm e tami pueng koehoi Jentel miphun pueng koehai pankângai vaiteh Cathut koe kâthung hanelah pankângainae hoi kamcu e naw hah na sak awh nahanelah ka pâpho. ²¹ Hete kongnaw dawkvah Judahnaw ni bawkim vah na man awh teh thei hanelah a kâcai awh. ²² Hatei, kai teh Cathut pahren lungmanae ka coe dawkvah sahnin totouh tami kathoeng

kalen hanelah kampangkhai lahun e lah ka o. Hottelah kampangkhai navah, a to hmalah ka tâcawt han telah Mosi hoi profetnaw ni sut a dei tangcoung e hloilah alouke ka dei e awmhoeh. ²³ Ahnimouh ni a dei awh e teh, Khrih teh runae a khang hoi duenae koehoi apasuekpoung lah boutthawnae lahoi Isarelnaw hoi Jentelnaw koe angnae kamthang a pâpho pouh han tie doeh telah a dei.

Agrippa counnae

²⁴ Pawl ni hettelah a pâpho navah, Festus siangpahrang ni, Pawl nang teh na pathu toe. Ka tapuet lah na kamtunae ni na pathu sak toe telah hram laihoi a dei.

²⁵ Hatei, Pawl ni Festus siangpahrang, kai ka pathu e nahoeh. Lawkkatang hoi ka talue e lawk doeh ka dei. ²⁶ Agrippa siangpahrang ni hete kongnaw hah a panue dawkvah lungtang laihoi a dei. Hete kongnaw teh arulae a tho hoeh dawkvah, siangpahrang nang ni na panue hoeh e awm mahoe telah ka pouk. ²⁷ Agrippa siangpahrang, profet lawknaw hah na yuem maw. Na yuem doeh tie ka panue atipouh. ²⁸ Hattoteh Agrippa siangpahrang ni, nang ni na dei e lahoi kai hai khristen lah meimei ka coung toe ati. ²⁹ Pawl ni, bawipa nang dueng laipalah sahnin ka lawk ka thai e tami pueng ni hete sumrui hoi pâkhi e hloilah kai patetlah koung na o aw h nahan Cathut koe ka ratoum atipouh.

³⁰ Hahoi, Siangpahrang hoi Bernike hoi ateng ka tahung e pueng a thaw aw h teh, ³¹ a tâco aw h hnukkhu, hete tami teh, duekhai kawi,

hoehpawitech, katekkhai kawi yonnae buet touh boehai kahmawt hoeh telah buet touh hoi buet touh a kâpankhai awh. ³² Agrippa siangpahrang ni Festus koe, hete tami ni Sizar koe nganga ka dei han tet hoehpawitech hlout sak hanlah ao atipouh.

27

Pawl Rom khovah a cei

¹ Itali ram lah long hoi na cei han na ti pouh awh navah, Pawl hoi alouke thongkabawtnaw hai siangpahrang e ransa hu thung e ransabawi Julius koevah a poe awh. ² Asia ram long kâhatnae kho koe lahoi pou ka cet hane long ka kâcui awh teh ka cei awh. Masidonia ram Thesalon tami Aristarkas hai kaimouh hoi a cei van.

³ Atangtho teh Sidon ka pha awh. Julius ni Pawl hah a lungma dawkvah a huinaw koe a ceisak teh ahnimaie khetyawtnae hah a coe sak. ⁴ Haw hoi vah ka tâco awh teh kahlî hah kaimouh koe lah a kamlang dawkvah Saipras tuilum e kahlî a uepnae koe lahoi ka cei awh. ⁵ Hahoi Cilicia hoi Pamfilia tueng koe ka raka awh teh Licia khopui Mira vah ka pha awh. ⁶ Haw tueng vah ransabawi ni Alexandria kho hoi Itali kho lah ka cet hane long buet touh a hmu teh hote long dawkvah na kâcui sak awh. ⁷ Hnin kapap hnawn payai lahoi ka cei awh teh rucac laihoi Kanidas kho teng ka pha thai awh. Kaimouh teh kahlî kecu dawc patuen ka cei thai awh hoeh dawkvah, Krete tuilum kahlî a uepnae koe lahoi ka cei awh teh Salmon

talaidawn koehoi pet ka cei awh. ⁸ Tuipui rai lahoi nganga pou ka cei awh teh Lasea kho teng lungmawng tie long kâhatnae hmuen koe ka pha awh.

Pawl ni dei e lawk eknae

⁹ Haw e hmuen koevah hnin moi kasawlah ka roe awh teh rawcahainae hnin hai aloum toung dawkvah, hmalah cei hane hai taki a tho dawkvah Pawl ni na hroecoe awh atipouh. ¹⁰ Hmaunawngghanaw hete tuipui dawck ceinae heh long hoi hnopainaw dawck dueng laipalah, maimae hringnae dawck hai runae na poe hanelah ao tie hah ka hmu telah a dei. ¹¹ Hateiteh ransabawi ni Pawl e lawk hah tang laipalah, long kamawngkung hoi long katawngkung e lawk hah bet atanghnawn. ¹² Hote long kâhatnae koe vah kasik thapa thung pueng o hanelah a coung hoeh dawkvah, tami kapap ni kanîloumaka lah hoi kanîloumatung lah pou cei vaiteh, Krete tuilum e Finik hmuen koe pha han a ngai awh. Hawvah kasik thapa pueng o hanelah a pouk awh.

tûilî hoi kâhmonae

¹³ Akalah hoi kahlî a tho toteh khokhang awh e patetlah aku ep han doeh telah a pouk awh. Hatdawkvah sumtaai hah a phawk awh teh, Krete tuilum teng lahoi a cei awh. ¹⁴ Hateiteh, atueng a ro hoehnahlan vah kanîtho koe lahoi yah, Euroquilo kahlî katang e hah a tho. ¹⁵ Long ni kahlî a hmang thai hoeh toung dawkvah longhni pueng ka rasu awh teh, kahlî ni a paleknae koe doeh ka cei awh toe. ¹⁶ Kawda tuilum teng, kahlî a uepnae koe ka pha awh

toteh, ka ru poungh lahoi hloutnae longca hah ka kuet thai awh. ¹⁷ Hote longca hah Long van vah a pâhung awh teh long hah acak nahanlah rui hoi kacaklah a katek awh. Sadi mon dawkvah hmang payon vai ati awh teh lukkarei longhni a rahnoum sak awh teh long hah kahlî a palek sak awh. ¹⁸ Kaimouh teh kahlî ni puenghoi na hmang awh dawkvah, atangtho teh long daw k e hnonaw hah a tâkhawng awh. ¹⁹ Apâthum hnin teh amamae kut hoi long daw k e hnonaw hah a tâkhawng awh. ²⁰ A hnin moi kasawlah Kanî, Âsinaw hmawt awh hoeh. Tâlî hai hoehoe a tho dawkvah, a hnukteng teh hlout awh han doeh tie ngaihawinae pueng a kahma toe.

²¹ Hottelah taminaw teh rawca laipalah kasawlah ao awh dawkvah, Pawl teh ahnimouh hmalah a kangdue teh, hmaunawngghanaw kaie lawk hah na ngai a lah, Krete tuilum koehoi tâcawt laipalah awm awh pawiteh, hete runae hoi sungnae pueng heh kâhmo awh mahoe e. ²² Hatei atuteh na lungpout awh han awh, telah na dei pouh awh. Nangmouh thung daw k hoi api buet touh boehai na dout a mahoe e, long dueng doeh rawk tih. ²³ Bangkongtetpawiteh, kai na katawnkung ka baw k e Cathut e kalvantami ni paduem tangmin vah ka teng a kangdue teh, ²⁴ Pawl, na lungpuen hanh, siangpahrang hmalah na kangdue mingming han doeh. Hahoi Cathut ni nang hoi rei ka tho e pueng hai na kut daw k na poe toe a ti. ²⁵ Hatdawkvah ka huinaw na lungpout a hanh awh. Bangkongtetpawiteh, na dei pouh e patetlah ao han tie Cathut kâuep laihoi ka yuem doeh. ²⁶ Maimouh hai tuilum

buetbuet touh dawk long heh a mang han toe telah Pawl ni a dei.

²⁷ Hnin hlaipali hnin tangmin a pha navah kaimouh teh Adria tuipui dawk kâpayo awh lahun navah, karumsaning a pha toteh long teh tui kongteng buetbuet touh hoi a hnai toe telah ka pouk awh teh, ²⁸ tui hah ka bangnue awh bo teh, lam 20 touh a dung tie ka panue awh. Dongdeng o hnukkhu bout ka bangnue awh bo teh, lam hlaipanga touh a dung e ka panue awh ²⁹ Ahnimouh teh lungsongnaw hmang langvaih tie a taki awh dawkvah, sumtaai pali touh a pabo awh teh, khodai lawiseh telah a ratoum awh. ³⁰ Long kamawngnaw teh yawng hanelah a kâcai awh dawkvah, sumtaai ka pabawt e boiboe lah a kâsak awh teh hloutnae longca hah a rui a rasu awh. ³¹ Pawl ni ransabawi hoi ransanaw koevah, long thung na awm awh hoech pawiteh, na hlout awh mahoech atipouh. ³² Hattoteh ransanaw ni hloutnae longca a ruinaw thoukthouk a tâtueng pouh teh tui thung a pabo awh.

³³ Khodai tawmlei nah Pawl ni abuemlah bu ca hane a dei pouh teh, nangmouh hah bu na cahoehnae hah atuvah hnin hlaipali touh a pha toe. ³⁴ Hatdawkvah bu na ca awh nahanlah kai ni hroecoe awh. Hot hateh nangmouh na hlout awh nahane doeh. Nangmae na lû dawk e sam buet touh boehai kahmat mahoech atipouh. ³⁵ Hettelah a dei hnukkhu vah, Pawl ni vaiyei hah a la teh abuemlae hmalah Cathut koe lunghawi lawk a dei hnukkhu vaiyei a raen teh a ca. ³⁶ Hattoteh ahnimanaw abuemlah ni hai a thahmei awh teh a ca awh. ³⁷ Long dawkvah

tami 276 touh ao awh. ³⁸ Rawca kaboumlah a ca awh hnukkhu long dawk e catunnaw hah tui dawk a tâkhawng awh.

Long a rawk

³⁹ Khodai torei teh haw e a hmuen teh panuek awh hoeh eiteh, a kawngteng kaawm e a takin koe lah long kâhat sak hanlah a kâpan awh. ⁴⁰ Hahoi sumtaainaw hah a rasu awh teh tui dawk a pabo awh, mawngnae acung rui kalennaw a rasu awh teh, longhni a thung awh teh a kawngteng lah a cei awh. ⁴¹ Hatei Long teh tuicapa kahni touh kâcunae koe a pha dawkvah, long e a lû teh sadi van a deng teh, kâhuen thai hoeh toe. Ataknaw teh tuicapa ni a hem dawk koug a rawk.

⁴² Ransanaw ni thongkabawtnaw pueng yawng awh langvaih, hatdawkvah be thei han toe telah a pouk. ⁴³ Hateiteh, ransabawi ni Pawl hlout sak hanelah a ngai dawkvah, ahnimae pouknae a ngang pouh teh, tui kale thainaw hmaloe a kawngteng lah kale sak hane, ⁴⁴ alouke taminaw ni thingphek raboung naseh. Long dawk e hnopai buetbuet touh nakunghai, kuet laihoi kale hanelah kâ a poe. Hettelah hoi abuemlahoi kongteng lah runae awm laipalah koug a hlout awh.

28

Malta tuilum vah

¹ Kaimouh teh lungmawngcalah hoi a kongteng ka pha awh hnukkhu vah hote tuilum teh Malta tuilum doeh tie ka panue awh.

² Tamipathunaw ni kaimouh koe lungpatawnae a kamnue sak awh. Kho a rak teh hroung a pâding dawkvah hmai a patawi awh teh kaimouh abuemlah na kamben sak awh. ³ Pawl ni thingnaw a racum navah a thung hoi tahrn kathout a tâco teh Pawl e a kut dawk a khue pouh. ⁴ Tamipathunaw ni Pawl e kut dawk lawng kanghoi e tahrn hah a hmu awh navah, hete tami heh tami ka thet e han doeh, tui dawk hoi a hlout ei nakunghai, phunglawk ni hring sak han ngai hoeh telah buet touh hoi buet touh a kâpankhai awh. ⁵ Pawl ni hote tahrn hah hmai dawk a kathek, hatei, ama teh bangtelah hai awmhoeh ⁶ Ahni teh a takbuem a phing han, a kamlei vaiteh a due han, titeh a ring awh. Hatei, bangtelah hai ao hoeh torei teh a lungkâthung awh teh hete tami teh cathut han doeh atipouh awh.

Taminaw a dam awh

⁷ Hote hmuen koehoi a hnainae koe vah Publius telah kaw e tuilum khobawi e talai ao. Hote khobawi ni kaimanaw na o sak hloilah hnin thum touh thung rawca totouh na khetyawt awh. ⁸ Publius khobawi e a na pa teh a pâding e hoi a vontamci lah a pataw teh sut a yan. Hatnavah Pawl ni a kâen sin teh a ratoum pouh hnukkhu a kut a toung pouh teh a dam sak. ⁹ Hettelah a hnosak e a hmu awh navah tuilum kho kaawm e kapatawnaw pueng a thokhai awh teh damnae a coe awh. ¹⁰ Ahnimanaw ni barinae a sin awh teh na bari awh, ka ban awh to hai panki e naw moi a pâseng awh.

Rom kho a pha awh

¹¹ Thapa yung thum touh hnukkhu, tuilum koe kaawm e, kut sak kahrai ca kamphei e mei kâbet e Alexandria long hoi ka cei awh. ¹² Sirakus kho ka pha awh teh hote kho dawk hnin thum touh ka roe awh. ¹³ Haw hoi bout ka cei awh teh Regium kho ka pha awh. Atangtho vah akalae kahlî a tho dawkvah apâhni hnin vah Puteoli kho ka pha awh. ¹⁴ Hote kho dawk hmaunawngghanaw hoi kâhmo awh teh hnin sari touh o hanelah na coun awh. Hettelah hoi Rom kho ka pha awh. ¹⁵ Kaimae kamthang ka thai e Rom kho e hmaunawngghanaw teh kaimouh hoi kâhmo hanelah, Rom kho hoi Appius hno yonae hoi bangla kathum touh tie totouh a tho awh. Pawl ni ahnimouh a hmu nah, Cathut koe lunghawi lawk a dei teh a thahmei awh. ¹⁶ Rom kho a pha awh toteh Pawl teh ama ka ring hane ransa buet touh hoi aloukcalah o hanelah ransabawi ni kâ a poe.

Rom kho e Judah kacuenaw hoi a kâhmo

¹⁷ Hnin thum touh hnukkhu, Pawl ni Judah kahrawikungnaw a kaw teh, a kamkhueng sak teh, hmaunawngghanaw kai ni Judah miphun ahawihoehnae ka sak hoeh. Mintoenaw e singyoe hai ka pahnawt hoeh. Jerusalem kho thongim na pabo awh, Romnaw e kut dawk na hnawng awh. ¹⁸ Romnaw ni lawk bout na pacei awh hnukkhu, due han kamcu e yonnae a hmu awh hoeh dawkvah hlout sak hanelah a ngai awh. ¹⁹ Judahnaw ni a ngai awh hoeh toreï teh, Sizar siangpahrang koe ngangka ka cet e doeh. Ka taminaw koe yon pen han bangcahai ka tawn hoeh. ²⁰ Hete kong daw

nangmouh na kâhmo teh kâpan han ka ngai dawk na kaw awh e doeh. Isarel miphunnaw ni ngaihawinae kong dawkvah, hete sumbawtarui hoi kai teh na pâkhi awh atipouh. ²¹ Hattoteh ahnimanaw ni, nange kong dawk Judah ram hoi ca ka hmawt awh hoeh. Haw hoi ka tho e hmaunawngghanaw apinihai nang dawk na yon telah ka dei e awmhoeh. ²² Hatei, hete bawknae hoi kâkuen lah, kho tangkuem vah na taran awh teh, na pathoe awh tie hah kaimouh ni sut ka panue dawkvah, nang ni bangtelamaw na pouk tie kaimouh ni thai hanelah ka ngai atipouh awh.

Pawl e kamthang lawk daw pathungnae

²³ Hathnukkhu Pawl hoi hnin a kâdawk awh teh, ahni a luennae koe hoe kapap lah a tho awh. Pawl ni amom hoi tangmin lah ditouh ahnimouh koe Cathut uknaeram kong a cangkhai, a kam-pangkhai teh, Mosi e kâlawk hoi Profetnaw ni a thut e naw hno lahoi Jisuh kong hah a dei pouh. ²⁴ Atangawn teh Pawl ni a dei e hah a yuem awh. Atangawnnaw teh yuem awh hoeh. ²⁵ Hottelah buet touh hoi buet touh lungkânging hoeh hoi a cei awh navah, Pawl ni lawkkam touh a dei e teh, Kathoung Muitha ni Profet Isaiaah hno lahoi a dei e hah atang doeh. ²⁶ Cet nateh dei pouh, a thai awh han ei thai panuek awh mahoe, a hmu awh han ei hmawt panuek a mahoe atipouh. ²⁷ Bangkongtetpawiteh, ahnimouh teh a hnâpang, a mitdawn awh teh, a lungthin kamlang awh hoeh. Hoehpawiteh, a mit hoi hmawt awh vaiteh, hnâ hoi thai awh vaiteh, a lung hoi a thaipanuek awh vaiteh, kâthung awh vaiteh, kai ni ka dam sak han a ti. ²⁸ Hatdawkvah

Cathut e rungngangnae teh Jentelnaw koe poe lah ao toung dawkvah, ahnimanaw ni teh a ngai aw hah han tie hah panuek aw hah telah Pawl ni a dei pouh. ²⁹ Hete lawk hah Pawl ni a dei navah, Judahnaw teh thouk a kâoun aw hah teh a ban aw hah.

Lungmawng lah Pawl thaw tawknae

³⁰ Kum hni touh thung Pawl teh im a hlai e daw k a o, ama koe ka tho e naw pueng a luen sak teh, ³¹ banghai tarawknae aw m laipalah, Cathut uknaeram kong hah, taranhawi laihoi a pâpho teh, Bawipa Jisuh Khrih e a kongnaw hah a cangkhai.

Thai Phum Holy Bible
The Holy Bible in the Thaiphum Chin language of
Myanmar

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-12-08

PDF generated using Haiola and XeLaTeX on 11 Nov 2022 from source files dated 30 Nov 2021

84c7fe95-3b68-5ab6-b17e-a642d33ac078